

الطبعة  
الثالثة

# كأن فيه ثورة

محمد فتحي

اعداد  
ربيع الكتب  
المزيد من الكتب الحصرية

<https://www.facebook.com/groups/exchange.book>

رابط التوجه لجروب ربيع الكتب

كان في مرة  
ثورة



إهداء ..

العزیز العظیم .. (ربنا)

سبحانه وتعالی

أنت الکریم والقوی.

الرحیم والغفور.

الجبار و المنتقم

تعز من تشاء...، وتذل من تشاء.

تمهل ولا تهمل

تجیب المضطر إذا دعاك فی الوقت المناسب والمكان

المناسب، فأنت أعلى وأعلم، ونحن الفقراء إليك

یا الله..

رأیتک..

فی میدان التحریر.



## ملحوظة

الأحداث المذكورة في هذا الكتاب أحداث حقيقية، وأي تشابه بينها وبين ما تم على أرض الواقع هو من قبيل محاولات الوصف المتواضعة، لأن ما حدث أكبر بكثير من أي وصف..  
أو أي كلمات





هذا الكتاب إلى مصر اللي جاية، وولادي فيها، وليس  
برعاية كنتاكي





## مفتتح

حطيني خط ف كف إيدك، وافردني صابع يوحد ربنا

أنا اللي زيك بس انتي عمرك ماكنتي زينا

حطيني هلب ف مركبك.

حطيني جبل ف طوق نجاة اترمالنا وشدنا.

حطيني حرف ف سلسلة.

حطيني عين بتقرا سورة الزلزلة

حطيني ما شاء الله على صدرك تتوه في الرايحة والجاية

وانتي بتتهزهي

حطيني حبة لب

سخنين في دفا مقلة

وخافي من نبلة

ممكّن تكسر قزازك.. من قبل ما تقزقزي

حطيني صورة ف محفظة متشققة م العرق

حطيني حرف ف طرف سهم رشق في قلبك ع الورق

حطيني فرحة مع البشاير

أنا من زمان مش من يناير

أنا اللي كنت ليكي عيد

أنا طفل مات تحت الدويقة. أنا قلب أم خالد سعيد

أنا اللي رفضت تبقي سويقة. أنا جتلك اجري من بعيد

أنا اللي تعبت وشلت المهم. أنا اللي مت من كيس دم

أنا اللي حلمت اعيش بأمان.

ومات لي ألف لوا بطران

أنا اللي حببت سالي زهران

من ضحكها ف صورة بتلم

حطيني بعد ما سابوني. ويايا أحمد بسيوني

إسلام بكير وعمرو غريب. من عند ربي بيدعوني

أكون معاهم ويا كريم. واحمد إيهاب وحسين طه

أسماء هتفضلي فاكراها

مع اسمي مع لقي الجديد

أنا مش محمد أنا الشهيد

حطيني طلقة بتضرب

تعظيم سلام من جيش عظيم  
بيحي كل اللي وقفوا ف يوم  
يخبطوا الجرح الأليم  
حطيني وردة مع الصبار  
أنا كنت يوم مع الثوار  
على ظلمك انتي من ناس كثير  
اتدفنوا في ميدان التحرير



## شكراً

شكراً لكل من قال لا للظلم. كل من قال كلمة حق عند سلطان جائر. كل من رفض أن يكون شيطان أخرس.

شكراً للحليم الذي غضب، والصبور الذي ظنه الطاغوت ضعيفاً فحطمه للأبد.

شكراً للذين قتلوا في السجون وأقسام الشرطة ظلماً وبهتاناً ولم نعرف عنهم شيئاً، والذين غرقوا في العبارة، والذين قتلهم صخور الدويقة، أو أحرقتهم نيران بني سويف، أو سقطوا من الطائرة التي تحطمت بهم دون أن يأخذ أحد حقوقهم.

شكراً لشهداء الثورة الذين تلقوا الطلقات في صدورهم حين كنا في بيوتنا نشاهد نشرات الأخبار، ولمن أذهبوا عنا البأس والظلم وأبقونا في ألمانا لأننا لم نكن معهم.

شكراً لكل منظري الثورة الذين كانوا المتحدثين الرسميين باسم الشعب وحملوا أكفانهم على أيديهم مع كل حرف كتبوه، وكل موقف اتخذوه ضد نظام مبارك، وقمع الداخلية، ونباح العديد من الكتاب المرتزقة عليهم قبل الثورة بسنوات وسنوات.

شكراً لإبراهيم عيسى وعلاء الأسواني وعبد الحليم قنديل

وأحمد فؤاد نجم وبلال فضل وحمدي قنديل، وكل كاتب  
شريف وضع إصبعه في عين رأس الأفعى وحين ألقاه النظام في  
النار كانت برداً وسلاماً عليه.

شكراً للشرفاء ومبعوثي العناية الإلهية الذين أنقذوا هذا  
الوطن وحرروه

في ميدان التحرير

شكراً وشكراً وشكراً ومليون شكراً لأهل السويس المدينة  
الباسلة الذين لعبوا دوراً لا يقل عن أحد إن لم يكن يفوقه،  
وواجهوا رصاصات وبلطجة الأمن آنذاك بصدورهم. شكراً  
لصمودهم بعيداً عن الكاميرات والتغطيات الإعلامية.

شكراً للشيخ حافظ سلامة قائد مقاومة كل فساد وكل

محتل

وشكراً لأنك تقرأ الآن، ولا زلت تحلم معي بوطن أفضل

وعمصر.. بتاعتنا.



# يوميات الثورة

كيف بدأت الثورة المصرية، وما الذي حدث فيها حتى تنحى مبارك؟.

لعل الأمر يحتاج إلى flash back لما سبق الثورة بنحو خمس سنوات حتى يعرف الجميع أن الشعوب تمرض لكنها لا تموت بُدأً، فمهما صبرت فإن لصبرها حدوداً وعلى الطغاة أن يتقوا شر الشعوب.. إذا غضبت.

بروفة الثورة بدأت قبلها بأعوام من خلال عدد من الحركات السياسية التي خرجت بعد مسرحية التعديلات الدستورية في ٢٠٠٥ والتي كانت تمهيداً واضحاً لاستكمال مسلسل التوريث، وتولية مرشح الحزب الوطني للرئاسة في ظل أحزاب وهمية كرتونية تمارس دورها ككومبارس متكلم في حياتنا السياسية، ووطنيين شرفاء ألقوهم في غيابة الجب ولم يلتقطهم السيارة.

في تلك الفترة بدأت الحركات الاحتجاجية في التصاعد، ووجدنا المظاهرات تجتاح شوارع مصر، وعرفنا حركة كفاية التي بدأت قوية وحادة وواضحة وجمعت تيارات عديدة من الوطنيين المصريين الشرفاء، وتواكبت مع هذه الأحداث

انتفاضة قضاة مصر الشرفاء عبر نادي القضاة العظيم وحركة استقلال القضاء التي بدأت تظهر في الصورة بقوة مطالبة باستقلال القضاء وبوجوب الإشراف القضائي الكامل على الانتخابات، وفي يوم الاستفتاء على التعديلات الدستورية بدأت أول بروفة حقيرة من الأمن لقمع المتظاهرين حين استعانت وزارة الداخلية في عهد الخائن حبيب العادلي بعدد من البلطجية والمرتزقة لضرب المتظاهرين عند سلام نقابة الصحفيين والاعتداء على عدد كبير ممن شاركوا في المظاهرة.

فيما بعد أصبحت المظاهرات والحركات الاحتجاجية شيئاً عادياً، ويعرف المشاركون فيه أن العدد الذي سيتظاهر أو سيعتصم سيتم تفريقه والاعتداء عليه من قوات الأمن المدعومة بالبلطجية.

لكن الأمر كان يخبيء العديد من المفاجآت للنظام الأمني الذي حكم مصر، ففي ٦ أبريل استجاب عدد كبير من الناس لدعوات الفيس بوك التي أطلقها عدد من الشباب لإضراب عام لشعب مصر، وتظاهرات مواكبة في بعض الأماكن المتفق عليها، وأشهرها مدينة المحلة التي تعرضت في هذا اليوم لمجازر واعتقالات منظمة لم يعطها الإعلام المرتعد أي اهتمام يذكر مع التأكيد على القنوات المصرية الأرضية والفضائية الخاصة على

تناول هذا الموضوع بصورة لا تثير الناس ولا تشرح ما حدث  
بجذافيره.

صحيح أن إضراب ٦ أبريل لم ينجح في العام التالي، لكن  
في ٦ أبريل ٢٠١٠ تم الاعتداء بعنف شديد على المتظاهرين في  
هذا اليوم، مما جعل الجميع في حالة احتقان شديدة لاسيما وأن  
هذا اليوم كان يمكن أن يمر بسلام والمتظاهرين يهتفون بمطالب  
شرعية بعيداً عن الإساءة لأشخاص

خلق هذا نوعاً من الألم والرغبة في الثأر لدى الشباب الذين  
تم الاعتداء عليهم، وكرهوا الداخلية التي أصبحت تتعامل  
وكأنها مالكة البلاد، والحاكم بأمره في كل شئ بسياسة  
الضرب والاعتقال والتخويف والتعذيب والتنكيل، وفي يونيو  
من نفس العام حدثت أكبر صدمة وضربة لجهاز الشرطة  
وأجهزة الدولة المختلفة حين اغتالت الشاب خالد سعيد بعد أن  
قتله ضرباً في الاسكندرية على سبيل التحري؛ ليثور الناس بعد  
نشر صور خالد سعيد الشاب الجميل الذي لا توجد لديه أي  
ميول سياسية والذي جمع الناس حوله لتخرج مظاهرات قوية  
تطالب بحقه وتثور ضد الشرطة الظالمة وتطالب بمحاكمة القتلة.

خرج الجميع للمطالبة بحقوقهم بعد أن أيقظتهم صورة خالد  
سعيد التي توضح وحشية التعذيب الذي تعرض له من مخبري

الشرطة، وولد جروب جديد على الفيس بوك اسمه "كلنا خالد سعيد"، وخلال أيام من إنشاء الصفحة بلغ عدد المنضمين للدعوة أكثر من مائتي ألف مشترك، وظل أدمن الجروب الذي تحول لشخص غامض لا يعرفه أحد يجيد صياغة ما يكتبه ويطلب بالثأر لخالد ومحاكمة من تسببوا في قتله، ثم سرعان ما تحول لأحد أشهر المجهولين في مصر...، ومع مرور الوقت واقترب الصفحة لنصف مليون مشترك، ومع مسرحية الانتخابات المزورة التي تمت في البرلمان المصري في نهاية ٢٠١٠، ومع حادث كنيسة القديسين الذي فضح القصور الأمني، وتسبب في مقتل الكثيرين في الأسكندرية، وفي أعقاب ثورة الشعب التونسي على طاغيته زين العابدين بن علي والتي أسفرت عن خلعه وإجباره على الهروب وترك تونس، ومع كل هذا الضغط الشديد على الناس كان لابد من الانفجار، وهكذا خرجت الدعوات لمظاهرات في مصر تطالب بالإصلاحات، وأطلق الدعوة للمظاهرة جروب كلنا خالد سعيد وحركة ٦ أبريل وعدد من الناشطين السياسيين الذين تضافروا وتوحدوا في لحظة تاريخية للدعوة إلى التظاهر في ٢٥ يناير ٢٠١١، وخرجت الناس بالفعل، ونادوا بمحاربة الفساد والتعذيب والبطالة، وكان يمكن أن تكون مظاهرة عادية لولا الغباء الذي حدث من تعامل أمني وحشي مع المتظاهرين وضرهم

بالرصاص الحي الذي أدى لسقوط قتلى؛ ليقسم الجميع بعدها في ميدان التحرير أنهم لن يعودوا إلى بيوتهم إلا بعد أخذ ثأرهم من الرجل الذي تسبب في قتل خيرة شباب مصر .

وكان هذا الشخص هو حسني مبارك المسئول الأول عن كل الفساد في مصر، وبدأت كرة الثلج تكبر وتكبر وهي تندرج في اتجاه الإطاحة بالنظام المصري الفاسد بأكمله..

وقد كان

وحتى لا ننسى فهذه هي يوميات الثورة كما رصدتها المواقع الإخبارية الشريفة

الثلاثاء ٢٥ يناير ٢٠١١م

بدأت مظاهرات ومسيرات جماهيرية تطالب بالتغيير فيما أطلق عليه "يوم الغضب" بمشاركة آلاف المصريين في القاهرة وعدد من المحافظات، استجابة لدعوات نشطاء على موقع التواصل الاجتماعي "فيسبوك"، سقط خلالها أربعة قتلى، أحدهم من رجال الأمن في مصادمات بين المتظاهرين وقوات الأمن بعد تصاعد حدة الاحتجاجات التي عمت العديد من محافظات مصر..، وصعد الأمن من اعتدائه على المتظاهرين في المساء وبعد رحيل معظم الكاميرات ليتعامل معهم بمنتهى

الوحشية محاولاً فض اعتصامهم بميدان التحرير، وسقط قتلى لم يتم الإعلان عنهم مما خلق شعوراً بالثأر عند كل من شارك في هذا اليوم، واستفز من لم يشارك للمشاركة في تظاهرة كبيرة أطلق عليها جمعة الغضب وحدد لها الناس موعداً واحداً هو عقب صلاة الجمعة التالية لتخرج المظاهرات من المساجد الكبرى في مصر.

### الأربعاء ٢٦ يناير

استمرت المظاهرات رغم تحذيرات وزارة الداخلية للمتظاهرين، ورغم ارتفاع عدد الضحايا إلى خمسة قتلى وعشرات الجرحى، فضلاً عن اعتقال المئات بينهم ثمانية صحفيين، بالإضافة إلى ذلك قامت السلطات المصرية بالتضييق على الإنترنت ووسائل الاتصال كما قامت بحجب مواقع للتواصل الاجتماعي (تويتر وفيسبوك)، للحد من تنامي عدد المتظاهرين المطالبين بالتغيير، وتقليص الحشود التي كان يسعى إليها الثوار .

### الخميس ٢٧ يناير

تواصل اشتعال المظاهرات في القاهرة وعدد من المدن الرئيسية لليوم الثالث على التوالي، وردد المتظاهرون هتافات مناوئة للنظام الحاكم .

كما وقعت اعتداءات كبيرة من جانب قوات الأمن على

مئات المتظاهرين، حيث استخدمت قوات الأمن القنابل المسيلة للدموع والرصاص المطاطي في محافظتي السويس والإسماعيلية شرقي البلاد .

وفي هذا اليوم دعا د.محمد البرادعي الرئيس السابق للهيئة الدولية للطاقة الذرية والحائز على جائزة نوبل للسلام وقلادة النيل العظمى و أحد أقطاب الجمعية الوطنية للتغيير..دعا الرئيس مبارك إلى التقاعد، معبراً عن استعداده لتولي السلطة لفترة انتقالية إذا طلب الشعب ذلك .

وبدأ الرئيس الأميركي باراك أوباما يؤكد أن العنف ليس حلاً للوضع الحالي في مصر، وأن الإصلاحات السياسية "ضرورية بشكل مطلق" من أجل خير مصر على الأمد البعيد .

الجمعة ٢٨ يناير

قامت السلطات المصرية بقطع خدمة الإنترنت لمحاصرة "جمعة الغضب" ومنعت المتظاهرين من الاستفادة من الرسائل النصية القصيرة في الساعات الأولى من اليوم، قبل أن تقطع الاتصالات بأكملها، وتنشر قوات العمليات الخاصة بكثافة في القاهرة، كما شنت حملة اعتقالات واسعة لتحجيم دور قيادة المحتجين .

- بدأت التظاهرات بشكل غير مسبوق وخرجت من مساجد مصر الكبرى عقب صلاة الجمعة مباشرة وهي تكتف

"الشعب..يريد..إسقاط النظام" وسط مواجهات وصدّامات عنيفة مع الشرطة التي اعتدت على المتظاهرين، وأفرطت في استخدام الرصاص الحي والطلقات المحرمة دولياً، وفي هذا اليوم وقعت مواجهات عنيفة بين الشرطة والمتظاهرين في مدينة السويس التي تبعد نحو ١٠٠ كيلومتر شرق القاهرة، كما سقط عدد من القتلى وعشرات الجرحى، وتم اعتقال المئات في المظاهرات التي اندلعت بعد صلاة الجمعة في عدة مدن مصرية، بينها العاصمة القاهرة مطالبة بتغيير النظام ورحيل الرئيس مبارك، في حين أفادت الأنباء بإحراق مقر للحزب الحاكم في بعض المدن المصرية .

- وفي السادسة نزل الجيش وانسحبت الشرطة واختفت تماماً، وأعلن عن حظر تجوال من السادسة مساءً اخترقه كل المصريين ولم يعبوا به، وفي اليوم نفسه ظهر الرئيس أوباما يدعو مبارك إلى اتخاذ خطوات فعلية لتجسيد الإصلاح السياسي، والتوقف عن استخدام العنف ضد المحتجين، والرئيس مبارك يخرج في التلفزيون الرسمي ليلاً ليطلب من الحكومة التقدم باستقالتها موضحاً أنه سيكلف حكومة جديدة .

السبت ٢٩ يناير

الرئيس مبارك يعين مدير المخابرات العامة اللواء عمر سليمان نائباً له، ويكلف وزير الطيران المدني الفريق أحمد شفيق بتشكيل الحكومة المصرية الجديدة .



والاحتجاجات الغاضبة تتواصل في القاهرة والمدن المصرية بعد خطاب الرئيس مبارك المتأخر، وأسلوب حديثه المانع، وبدأت المطالب تعلو لتنجيته عن السلطة.

في الوقت ذاته ارتفعت حصيلة القتلى إلى ٦٨ من المحتجين في القاهرة والإسكندرية والسويس .

وأحرقت العديد من مقار أقسام الشرطة في شتى أنحاء مصر بعد مواجهات أسفرت عن وقوع قتلى لا سيما بعد إطلاق الشرطة للنيران بشكل مكثف وفتحها لزنائين الحجز للخارجين على القانون حتى يهربوا ويقفوا بجانبهم ضد هجوم المتظاهرين

وفي اليوم نفسه تزايد عدد القتلى في عدة مناطق بمصر، في وقت أعلنت فيه القوات المسلحة المصرية أنها ستدفع بقوات كبيرة بكل المدن لحفظ الأمن وحماية الأحياء السكانية .

كما حدث تمرد في سجن أبو زعبل، وإطلاق قوات الأمن الرصاص الحي على المعتقلين، وورود أنباء عن وقوع عشرات القتلى في اقتحام قوات الأمن لسجن القناطر في دلتا النيل .

تواصل إجلاء الرعايا الأجانب عن مصر التي تعصف بها احتجاجات غاضبة تطالب بإسقاط النظام، وسط تصاعد أعمال العنف والانفلات الأمني، واحتشاد عشرات الألوف من المحتجين في ميدان التحرير في احتجاجات الغضب العارمة وسط إصرار المتظاهرين على إسقاط النظام الحاكم في مصر . وفي هذا اليوم دعت وزيرة الخارجية الأميركية هيلاري كلينتون إلى ما أسمته "تحولاً منظماً" بمصر لا يؤدي إلى فراغ في السلطة، معتبرة أن تعيين نائب للرئيس غير كاف .

أما الداخلية المصرية المقالة فأصدرت تعليماتها بإعادة انتشار قوات الأمن في جميع أنحاء مصر بدءاً من الاثنين باستثناء منطقة ميدان التحرير وسط القاهرة، وذلك بعد انسحاب مفاجئ وغامض لها في وقت سابق .

وأوباما يؤكد دعمه لانتقال سلمي للسلطة إلى حكومة تلي تطلعات الشعب المصري، والسلطات المصرية تمنع قناة الجزيرة من العمل في مصر، وتلغي بثها على القمر الصناعي المصري نايل سات لبعض مناطق الشرق الأوسط .

مبارك يكلف رئيس الوزراء الجديد أحمد شفيق ببدء حوار مع المعارضة، كما كلفه بأن تحافظ الحكومة على الدعم وتضع حداً للتضخم، وتوفر فرص العمل، و"كاثرين أشتون" الممثلة العليا للشؤون الأمنية والخارجية في الاتحاد الأوروبي تدعو الرئيس مبارك للدخول في حوار فوري مع المعارضة، والتجاوب مع تطلعات المحتجين المناهضين للحكومة . ويبادر الرئيس مبارك بتكليف نائبه عمر سليمان بإجراء اتصالات مع جميع القوى السياسية بشأن حل كل القضايا المثارة المتصلة بالإصلاح الدستوري والتشريعي .

### الثلاثاء ١ فبراير

سيول المتظاهرين تتدفق على ميدان التحرير وسط القاهرة، حيث احتشد به أكثر من مليون شخص، تلبية لدعوة القوى السياسية لمظاهرة مليونية للمطالبة برحيل الرئيس مبارك وسط احتجاجات في بقية المدن .

والرئيس مبارك يعلن في خطاب بثه التلفزيون الرسمي أنه لن يترشح لولاية رئاسية جديدة، قائلاً إنه سيعمل خلال الشهور القادمة الباقية من ولايته للسماح بانتقال سلمي للسلطة . ويستخدم مبارك الخطاب العاطفي ليظهر أنه سيعيش ويموت في

مصر للدغدغة في مشاعر الناس الذين تعاطف بعضهم معه، وفي الوقت ذاته ظهر رئيس الوزراء أحمد شفيق لأول مرة ليتحدث عن أن أمن المتظاهرين "على رقبتة"، وأنه سيحميهم وفي الوقت ذاته خرجت مجموعة كبيرة ومنظمة من المسلحين أو من يسمون مصرياً "البلطجية" تتعرض للمتظاهرين في ميدان طلعت حرب قرب ميدان التحرير، حيث يحتشد مئات الآلاف مطالبين بتنحي الرئيس مبارك، وذلك بعيد خطاب الأخير الذي وجهه للمصريين .

الأربعاء ٢ فبراير

ائتلاف المعارضة يدعو لمظاهرة كبرى الجمعة؛ لإرغام مبارك على ترك منصبه والحزب الوطني الحاكم يسير مظاهرة مؤيدة لمبارك

وفي هذا اليوم يعلن الأمين العام لجامعة الدول العربية عمرو موسى أنه سيفكر بجدية فيما إذا كان سيسعى للترشح للانتخابات الرئاسية المقررة في مصر في سبتمبر المقبل . ورئيس البرلمان المصري يؤكد عزمه إقرار التعديلات الدستورية التي تطرق إليها الرئيس مبارك في خطابه خلال فترة قصيرة، مؤكداً الأنباء التي تحدثت عن تعليق عمل البرلمان إلى حين الفصل في الطعون المقدمة بشأن نتائج الانتخابات البرلمانية الأخيرة .

وفي هذا اليوم يشهد ميدان التحرير أبرز حركة من حركات العنف قام بها مؤيدو الرئيس مبارك، حيث دخلوا الميدان على ظهور الخيل والجمال، أوقعوا خلالها أكثر من ٨ قتلى وأكثر من ١٥٠٠ جريح من المظاهرين السلميين، فيما واصل المعارضون المطالبة بتنحي الرئيس عن السلطة .

حدثت صدامات عنيفة بين المظاهرين السلميين وبلطجية مبارك المدفوعين بعناصر من الشرطة ترتدي الزي المدني وعدد من المسجلين الخطر الهاربين بواسطة وزارة الداخلية وبتوجيه من عدد من رجال الحزب الوطني؛ لتبدأ معارك عنيفة بين الجميع في محاولة لإجهاض الثورة وفض اعتصام الناس في التحرير، وفي هذا اليوم أظهر المتظاهرون صلابة وإصرار على مواقفهم رغم قنابل المولوتوف التي ألقيت عليهم ورغم القتلى الذين وقعوا بين صفوفهم، واستطاعوا في النهاية تحقيق الانتصار على البلطجية الذين تراجعوا مذمومين مدحورين

### الخميس ٣ فبراير

ساحة الميدان تمتلئ بالشباب الجرحى، وأبرز قوى المعارضة بمصر ترفض عرض رئيس الحكومة المصرية أحمد شفيق بدء حوار وطني، مشرطة التنحي الفوري للرئيس مبارك وتشكيل حكومة وحدة وطنية تضم جميع الأطياف على الساحة

السياسية بالبلاد، فيما تواصل اعتداءات مؤيدي مبارك، حيث قاموا بإطلاق نار كثيف بالقرب من ميدان التحرير، بينما صدرت تعليمات أمنية للمراسلين الأجانب بمغادرة الفنادق المحيطة بالميدان .

وعمر سليمان نائب الرئيس يعلن أنه لا الرئيس ولا ابنه جمال مبارك سترشحان لانتخابات الرئاسة، قائلا: إنه سيعاقب كل الضالعين في إثارة العنف والانفلات بميدان التحرير، والرئيس مبارك يصرح للصحفيين الغربيين بأنه يود الاستقالة من منصبه، لكنه يخشى إن فعل ذلك الآن أن تفرق بلاده في فوضى .

### الجمعة ٤ فبراير

أكثر من مليون شخص يؤدون صلاة الجمعة في ميدان التحرير حيث دعا الخطيب الحشود والشباب إلى الصبر حتى إسقاط نظام الرئيس مبارك، والمسيرات الحاشدة تنطلق في الإسكندرية ومدن أخرى عقب ما يسمونه "جمعة الرحيل" التي تطالب برحيل مبارك .

### السبت ٥ فبراير

تمت استقالة هيئة المكتب السياسي للحزب الوطني الحاكم، وتعين حسام بدرأوي محل الأمين العام للحزب صفوت

الشريف وأمين السياسات، الأمين العام المساعد للحزب جمال  
نجل الرئيس مبارك، والمبعوث الأميركي إلى مصر فرانك ويسنر  
يقول: إن الرئيس مبارك يجب أن يبقى في السلطة في الوقت  
الحالي حتى يدير التغييرات المطلوبة للانتقال السياسي،  
والمتحدث باسم الخارجية الأميركية فيليب كراولي يقول: إن  
ويسنر عبر عن رأيه الشخصي ولم ينسق مع الإدارة الأميركية .

وقائد المنطقة العسكرية المركزية بالجيش المصري اللواء  
حسن الرويني يطالب المتظاهرين بمغادرة ميدان التحرير، ويخفق  
في ذلك، حيث اصطف شباب التحرير أمام الدبابات وطالبوا  
بالسير على جثثهم قبل مغادرة الميدان، ومبارك يصر على  
ممارسة صلاحياته .

### الأحد ٦ فبراير

قوى المعارضة ومنها جماعة الإخوان المسلمين تجري حوارا  
مع عمر سليمان ولا إشارة لتنحي مبارك .

### الاثنين ٧ فبراير

إعلان التحفظ على وزير الداخلية السابق حبيب العادلي  
تمهيداً لمحاكمته عسكرياً .

## الثلاثاء ٨ فبراير

منظمة هيومن رايتس ووتش تعلن عن مقتل نحو ٣٠٠ شخص خلال الأحداث الجارية في مصر، والمتظاهرون يحاصرون مقر البرلمان ومقر مجلس الوزراء غداة تظاهرات هي الأضخم منذ بدء "ثورة ٢٥ يناير".

## الأربعاء ٩ فبراير

مقتل ٥ أشخاص وإصابة ١٠٠ آخرين في مدينة الخارجة بمحافظة الوادي الجديد إثر اشتباكات مع الشرطة التي استخدمت الرصاص الحي .

## الخميس ١٠ فبراير

المجلس الأعلى للقوات المسلحة المصرية ينعقد في غياب الرئيس حسني مبارك ويعلن البيان رقم "١" ويقرر الانعقاد بشكل دائم لمتابعة الأوضاع في مصر، وعدد المتظاهرين المطالبين بتنحي مبارك في ميدان التحرير والساحات والجسور المحيطة به يتجاوز ثلاثة ملايين متظاهر .

والرئيس مبارك يؤكد في خطاب قبيل منتصف الليل تمسكه بالحكم حتى انتهاء ولايته، ويفوض نائبه اختصاصات رئيس الجمهورية وفقا للدستور، ونائبه عمر سليمان يؤكد في كلمة



له بعد خطاب مبارك التزامه بتحقيق الانتقال السلمي للسلطة وفقاً للدستور ويدعو المتظاهرين للعودة إلى منازلهم واستئناف أعمالهم

أما المتظاهرون فيرفضون بشدة خطابي مبارك وسليمان، ويؤكدون تمسكهم بمطلبهم الرئيسي وهو تنحي الرئيس وسقوط النظام، وآلاف المتظاهرين يتوجهون إلى القصر الجمهوري ومبنى التلفزيون بعد خطاب الرئيس مبارك، والجيش ينصب الأسلاك الشائكة حول القصر الجمهوري .

### الجمعة ١١ فبراير

ملايين المصريين يتظاهرون في القاهرة ومختلف المدن والآلاف منهم توجهوا نحو القصر الرئاسي بالقاهرة انطلاقاً من ميدان التحرير حيث أدى مليونان على الأقل صلاة الجمعة، والجيش يعلن بيانه رقم "٢" ويعلن فيه إنهاء حالة الطوارئ فور انتهاء الظروف الحالية وضمان إجراء انتخابات رئاسية حرة .

في السادسة مساءً: عمر سليمان يعلن تنحي حسني مبارك وتسليم الحكم للجيش، والمجلس الأعلى للقوات المسلحة في مصر يصدر البيان رقم ٣ ويقول إنه ليس بديلاً عن الشرعية التي يرتضيها الشعب المصري، الذي أطاح اليوم بنظام الرئيس محمد حسني مبارك بعد ١٨ يوماً من المظاهرات والاعتصامات .

ينتهي هذا اليوم بالفرحة العارمة التي عمت أرجاء مصر  
بسقوط نظام حسني مبارك، واتسعت أصداء الفرحة لتعم  
عواصم عربية وأوروبية.

# كان فيه مرة ثورة

(حدوتة كومبو لعمر وتقى)

حبيب قلبي عمر

ونور عيني تقى

عمور وتوتة

الكلام ده هتقروه وتفهموه لما تكبروا

ممکن تلاقوه في كتب التاريخ في المدرسة ( لو حظكم حلو  
والناس المسئولين عن المدارس محترمين)، وممكن ما تلاقهوش  
خالص ( لو حظكم وحش واتسرق منكم ماضيكم زي ما  
ناس كثير اتسرق ماضيها ومستقبلها)

ممکن حد يقول اللي حصل بطريقة تانية

وممكن حد يقول انه أصلاً ما حصلش!!

بس الأكيد إن دي هي الحدوتة الحقيقية اللي انا شفتها

بعيني

والأكيد انكم بتصدقوا بابا، وعارفين ان بابا أصدق من أي

كتاب تاريخ ممكن يكتب عكس اللي بتقروه هنا

وعشان كده الكلام ده مش للي بيقرأ دلوقت في ٢٠١١

الكلام ده ليكم انتم

عشان لا قدر الله .. لا قدر الله .. لو حد قال حاجة وحشة

على يوم ٢٥ يناير ٢٠١١

أو يوم ٢٨ يناير ٢٠١١

أو على المظاهرة المليونية

أو على الشباب اللي نزلوا في ميدان التحرير وغيروا التاريخ

والسياسة ورسّموا أحلى صورة لوطن كان في أحلامهم بس

وأسقطوا نظام كامل

تعرفوا ان دول ناس شرفاء ومحترمين

ما تصدقوش أي كلام وحش يتقال عنهم خالص

ولا تصدقوا أي حاجة ممكن تشوفوها في التلفزيون المصري

اللي هو مش تلفزيون .. ومش مصري

ده بتاعهم .. مش بتاعنا

وعشان تفهموا

وعشان الناس اللي حوالكم تفهم ليه اللي حصل حصل

لازم نتكلم عن الموضوع من الأول..

من الأول خالص

من أول كان يا مكان

يا سادة يا كرام

ولا يحلى الكلام

إلا بذكر النبي عليه الصلاة والسلام

أنا بابا محمد فتحي

حد ممكن يسألکم: هو مين يعني بابا

وليه هو اللي بيحكى

أنا بحكى عشان دي الحدوة بتاعتي، وكل واحد ممكن

يحكى الحدوة بتاعته على مزاجه

انما الحدوة دي حدوة بلد بحالها

تجربو: تعرفوا هو بابا مين

وعاش ازاي أصلاً وهو قدكم

أو وهو أكبر منكم بشوية صغيرين

شوية نونو يا عمر وانت فاهمني



أنا واحد من شباب كثير اتولدوا سنة ١٩٨٠

لما تيمت سنة واتعلمت اطلع صوت واعمل حركات العيال الصغيرة واتف على اللي قدامي زي أي طفل مصري في كتالوج المصريين بيتعلم "يتف على عمو" قبل ما يتعلم الكلام اتقتل الرئيس السادات اللي كانوا بيقلوا عليه بطل الحرب والسلام، واللي كان رئيس مصر لما انتصرت على إسرائيل في ٦ أكتوبر ١٩٧٣

اتقتل في نفس اليوم سنة ١٩٨١

اتقتل وهو لابس بدلته العسكرية، واللي قتلوه كانوا شايفين انه ظالم وطاغية وفرعون

ماكتش اعرف السادات وبعد ما قرئت عنه لما كبرت أدركت انه كان راجل محترم وعظيم لكنه كان زي أي حد بتركبه العظمة . يشوف نفسه صح وكل الناس اللي بتعارضه غلط

ولأنه كان شايف ناس كثير غلط

كان طبيعي ان ناس كثيرة تشوفه هو أصلاً غلط

غلط لازم يتصحح

وفعلاً..الناس دي - للأسف - قتلوه

وبعدها جه النائب بتاعه عشان يقى الرئيس

وأصبح محمد حسني مبارك رئيس جمهورية مصر العربية

يااااااه عارفين يعني إيه رئيس مصر

رئيس أحلى وأجمل وأطهر وأجدع بلد في الدنيا

صاحبة أقدم واجمل حضارة في التاريخ

حاجة جامدة جداً

فخر وشرف ما بعده شرف

البلد اللي اتذكرت في القرآن الكريم.

البلد اللي النبي عليه الصلاة والسلام أوصى بأهلها وقال أن

بها خير أجناد الأرض.

البلد اللي كانت مقبرة الغزاة ومطعمهم في كل صفحات

التاريخ

البلد الجميلة دي أصبح رئيسها هو محمد حسني مبارك

ولما سألوه هتبقى زي جمال عبد الناصر اللي كل الناس

كانت بتحبه وبتعتبره بطل وصاحب حلم كبير كل الشعوب

العربية كان نفسها تحقه وتتوحد

والا زبي السادات اللبي هو بطل الحرب والسلام

رد وقال حقيقة مدهشة

قال: أنا اسمي حسني مبارك!!!

ولما حلف اليمين وقال أقسم بالله العظيم على رعاية البلد دي .. كان بيحلفه وإيده مربوطة من ضرب النار اللبي أصابه لأنه كان قاعد جنب السادات ساعة ما السادات اتضرب بالنار.

بس الرصاص اللبي قتل السادات لم يقتل حسني مبارك اللبي كان قاعد جنبه ولازق فيه، واتقال ان اللبي قتلوه قالوا له : مش عاوزينك انت .. عاوزين السادات

واتقال كمان من بعض الناس انه كان شريكهم!!!

لكن رغم ده كله كانت صورة حسني مبارك عند الناس في الوقت ده انه بطل، وانه عمره ما يعمل كده

كان قائد سلاح الطيران في أكتوبر ١٩٧٣

واهو أصبح الرئيس

الناس استبشرت خير، وقالوا انه راجل كويس لما عمل مصالحه، وخرج كل المعتقلين السياسيين اللبي اعتقلهم السادات من شخصيات عامة وصحفيين وأدباء وناس محترمة



كثيرة جداً رماهم السادات في السجن لأنه مش عاوز وجع  
دماغ

مبارك لما أفرج عنهم الناس اتبسّطت، وخصوصاً انه  
استقبلهم عنده في القصر، وطبّطب عليهم وأكرم ضيافتهم،  
وقال لهم يعيشوا حياتهم في أمان

وطلع بعدها قال انه مش هيرشح نفسه أكثر من مرتين،  
وانه مش هيجدد، وان الكفن مالموش جيوب

يا سلاااام

قد إيه الراجل ده تحس انه زاهد في الحكم، ومش عاوز غير  
فترتين يخرج بعدهم ويبقى الرئيس السابق.  
قد إيه الكلام ده خلى منظره عند الناس انه حد محترم وفيه  
فرق واضح بينه وبين كل اللي قبله من الرؤساء اللي ما  
خرجوش من الحكم إلا ميتين.

لما سمعت الكلام ده لما كبرت شوية كنت مبسوط أوي  
بالريس بتاعنا

أنا عشت في عصر الرئيس محمد حسني مبارك

وحببته في فترة من الفترات

حببته جداً كمان

بس اكتشفت لما كبرت اني قعدت ٣٠ سنة في عهده..

وشفت حاجات كتيرة بتتغير..

ما عدا هو!!!

اللي اشتغل في عصره وهو عنده ثلاثين سنة طلع معاش..

وهو كان لسة قاعد.

اللي اتجوز في بداية عهده خلف وولاده اتجوزوا وجابوا

أحفاد.. وهو لسة قاعد

اتغير عليه ٥ رؤساء لأمريكا..، وهو لسة قاعد

اتبدلت الدنيا وسقط الاتحاد السوفييتي وتوحدت الألمانيتين،

وتم هدم سور برلين وحصلت حروب في الدنيا كلها..

وهو لسة قاعد

انتو حتى اتولدتوا في عهده مش في عهد حد تاني، ولما

بدأت كتابة السطور دي على فكرة كان لسة قاعد!!

انا كمان عشت ف عصره وكبرت ف عهده ومالقتش

غيره

لقيت دمه خفيف شوية، وكنت معجب جداً بيه وهو

بيطلع يتكلم مع الناس بالبدلة الصيفي المتواضعة، ويتعامل

كان بيروح زيارات ويقابل سكان مصر الأصليين، ويدخل  
ع الفلاحين ويقول لهم عايزين نشرب شاي

وكان ممكن كمان ياكل معاهم

يا سلام ع التواضع..، وصور يا مصور ، وانقل يا  
تليفزيون، واكثي يا صحافة

كان حاجة تفرح جداً فعلاً، وكانت أخطاؤه قليلة، والناس  
كانت مبسوطة انه كمل طريق السلام بتاع السادات ورجع  
سيناء بالكامل، وحتى طابا ماسبهاش وجابها بالتحكيم الدولي.

رجعلنا آخر شير كان محتل في مصر

وكان كمان بيرجع علاقات مصر بالدول العربية اللي  
قاطعتها بسبب السادات واتفاقية السلام.

الناس كانت مبسوطة منه فعلاً، وكانت مستحمة، والبني  
آدم المصري صبور ولا أجدها جمل، وممكن يستحمل أي  
حاجة عشان خاطر بلده، وممكن كمان يقتنع بأي شئ طالما انه  
بيحب اللي بيقلوه، واللي بيقلوهه بيقلوهه بأسلوب حلو

المصري يحب الكلمة الحلوة وتأسره الابتسامة

وهو ده اللي كان حاصل مع حسني مبارك في الوقت ده  
لأن الناس كانت مصدقاه

وبعدھا بسنين الناس بدأت تغني له وتقول له: اخترناه،  
وبايعناه

والغريب اھم كانوا بيغنوناه كده في احتفالات أكتوبر اللي لما  
تقعد تفكر وتشوف كان بيتصرف عليها قد إيه تجد أننا أمام  
كارثة؛ لأن حجم الإنفاق عليها كان بينيلنا مصانع، أو بطورلنا  
قطاع من قطاعات الدولة، أو على الأقل يرصف شوارع مش  
متسفلتة، وينور طرق مافيهاش كهربا..

كان بيتعمل احتفال للقوات المسلحة واحتفال للتليفزيون  
بيتكلفوا كبير جداً.

احتفالين عشان حدث واحد وف أسبوع واحد

كانت الاحتفالات بتعمل عشان الشعب المصري يفرح  
ويفتكر أكتوبر

بس كان بيتصرف عليها آلاف بقت مئات الآلاف بقت  
ملايين، وماحدث يعرف الفلوس دي كانت بتيجي ازاي  
وتروح فين، ولا حد كان بيراجع ليه الفلوس دي بتصرف  
بالبدخ ده على الاحتفالات دي

و مع إن أبطال حرب أكتوبر الحقيقيين وأصحاب النصر  
الحقيقي هما الشعب المصري

الا إن في كل سنة كان النصر العظيم بتاع الشعب المصري  
ده بيتنسب لشخص واحد بيقولوا له اخترناه

و كنت بسأل نفسي: إيه علاقة اخترناه بحرب أكتوبر

وبعدين هما مين اللي اختاروه ؟

أنا شخصياً اكتشفت اني ما اخترتش حد

ولا بايعت حد

طب ليه حد يتكلم باسمي

أه صحيح كنت بجه وقتها .. بس ليه برضه حد يتكلم

باسمي من غير ما أفوضه، ومن غير حتى ما يستأذني

واللي يضايق ان الأغنية كمان بتقول

"واحنا معاه لما شاء الله"

وما شاء الله عندنا يعني للأبد

إنما يريد ربنا ان مشيئته تنفذ في ٢٠١١

سبحان الله أنا كنت بجه فعلاً زي أي عيل صغير ارتبط

باللي بيشفه قدامه ومايشوفش غيره

على ولاد الحرام

صحيح هانت عليه ..

إنما عادي يعني..

جل من لا يخطئ

أنا واحد من الناس اللي لا شافت عبد الناصر

ولا شافت السادات

ولا شافت حرب ونصر أكتوبر اللي كان بتاع الشعب

المصري والناصريين نسبوهم لتخطيط جمال عبد الناصر

وفي عهد السادات نسبوهم ليه لوحده ولعبقريته، وسموه بطل

الحرب والسلام

وفي عصر مبارك نسبوهم لضربته الجوية.. فبقت الضربة

الجوية هي السبب.

شايفين ازاي عند ناس كثيرة قدرة على التطبيل والنفاق مع

إن اللي انتصر ده هو الشعب المصري مش حد تاني؟

أنا لا حاربت يا عمر ولا دخلت تحديات كبيرة يا تقى

أول ما اتولدت زي اللي كانوا قبلي

اللهم إلا ٣ حاجات

بس حاجات كبيرة مش نونو يا عمر..وانت برضه فاهمني



٣ بس بالظبط تقدر تلف وتدور حوالهم من غير ما تزود

ولا تنقص

حاجة اسمها الفقر

وحاجة اسمها الفساد

وحاجة اسمها القمع

حد هيقولي ماهو القمع فساد، فعلى طول هقول لك ما هو

فيه فساد من غير قمع.

فساد الخبائة.

فساد اسرق بس من غير ما تحف

فساد أنا مبسوط كده بفسادي طالما مش جهرس حد

بالفساد ده

طالما فسادى غير مميت وغير قاتل

فساد ياخذ ومايأذيش

وملعون أبو أي فساد في أي مكان تحت أي مسمى

إنما فساد أخف من فساد

و كل الفساد الخفيف ده ماكانش موجود عندنا وقتها

لأن الفساد اللي كان موجود كان فائض ويمكن تصديره

لو فكرت مصرف ده

ده كان ممكن كمان يسد ديون مصر

كنت من الناس اللي بتعاني من الـ ٣ حاجات دول ومتبهدة

منهم

الفقر لأن الشعب المصري اللي كان تعداده وقت ما بدأت

أوعى للدنيا كان ٦٠ مليون

كان ٥٩ مليون منه تقريباً فقراء

ويخدموا المليون الباقية

وشغالين عندهم ومن أجلهم

ولما بتتكلّم يقولوك تنظيم الأسرة

و شد الحزام

وامسكوا نفسكم

والريس يطلع في الخطابات يقول لك:

" لو عندك واد والا اتين هتعرف بجيبه شراب.."



ولو عندك أكثر مش هتعرف غير ترفيله الشراب المقطوع  
ويبقى منظره وحش!!

آه والله

الرئيس كان يقول كلام زي ده بالظبط، وقالوا في أكثر من  
خطاب

وكان يقول ان عندنا دعم هو اللي مخلي العيش بشلن  
(خمس قروش)، رغم انه برة بيتباع بجنيه وأكثر كمان!!

والله العظيم كان بيطلع ويقول كده

وكنا بنقول : يا سلاااام..الواحد بيوس إيده والله ع النعمة  
وبلاش يتبطر

أبويا وامي - اللي هما جدو و تيتا - كانوا بيقولوا كده

أبويا وأمي اللي كانوا مقضينها اقساط وجمعيات، واللي  
المثل المفضل عندهم كان "على قد لحافك مد رجلك"  
و" العين بصيرة والإيد قصيرة" .. مع إن كل الدنيا وقتها  
كانت تقول لك " إن عشقت اعشق قمر، وان سرقت اسرق  
جمل" ..

يعني اسرق حاجة كبيرة

سرقوا بلد كاملة

انما الحمد لله

ما كناش حرامية ولا اترينا على كده

أما الفساد اللي كنا بنعانيه فكان لأن معظم الأغنيا دول  
كانوا أغنيا بسلب ونهب وسرقة الملايين الأضعف منهم.

الفساد ده معشش في البيوت وعلاماته في كل خطوة  
بتخطيها وبيقابلك من أول ما تصحى من النوم لغاية ما تنام.

مش بس كده

ده الفساد بيواجهك كمان بعد ما تموت

أنا فاكر لغاية دلوقت قرار اهبل بنقل التراب والمقابر فجأة  
وبدون استئناف وعادي جداً

وكلنا عارفين القرف والمشاكل اللي بينخش فيها أي حد  
عايز يورث، وازاي بتدفع من الورث ده فلوس كتيرة ورشوة  
كتيرة لجهات كتيرة عشان تعرف تاخده.

عارفين المخدرات اللي مالية الدنيا بعلم الأمن وبترويجه

كمان، ولما كانت بتحصل مواجهاات بين الأمن وبين التجار  
كان كثير منها بيكون مزيف، والباقي ما ييمنعش من انتشار  
تجارة المخدرات

لدرجة ان موضوعات أفلام السينما في الفترة دي كانت  
كلها عن الإدمان

أما القمع اللي كنا بنواجهه فكان قمع لأن اللي كان بيقول  
كلامي اللي فات ده كان بيقمع سواء من الإعلام اللي لازم  
يكذبه ويطلع مايفهمش، أو يطلع حاقد، أو يطلع هو  
شخصياً حرامي ومذنب وعميل .

الإعلام اللي بيتبني وجهة نظر واحدة وبيقول على نفسه  
أكثر إعلام حر في الدنيا.

اللي معمول لخدمة ناس بعينها، مش لخدمة كل الناس  
أو اللي بيهيج الناس على أي معارض ويصوره ف صورة  
عميل فالناس تتعاطف معاه أكثر حتى لو هو كده فعلاً.

الإعلام بتاع أزهي عصور الديمقراطيةية

واللي هو فيه رقابة على التلفزيون والصحافة وغيرها  
وغیرها وغيرها

أو قمع من نوع تاني كلنا اتعرضنا له.. قمع من الشرطة اللي

الناس بقت هي اللي ف خدمتها مش العكس

الشرطة اللي بتتعامل مع معظم الناس على إنهم حرامية أو

بلطجية

واللي بتكلم أي شخص بروح امك وروح ابوك، واللي

بتهينه أو بتعذبه

أو أقلها تديله قلمين على وشه وعلى قفاه يفضل بسببهم

يكرهها طول عمره ويعتبر ان الموضوع تار بايت بينه وبينها

الشرطة اللي لما تعوزها ماتلاقيهاش، ولو عايز تعمل محضر

أو تشتكي حد لازم تكون عارف رتبة كويسة عشان يوصي

عليك أو تدفع لأمين الشرطة فلوس عشان يكتبلك المحضر صح

وكويس، وتدي فلوس تانية لأمين الشرطة اللي هييجي يقبض

أو يسحب الشخص اللي بتشتكيه، وفلوس تالته تدفعها رشوة

لأمين الشرطة بتاع تنفيذ الأحكام عشان يخرج يقبض على

الشخص اللي خدت ضده حكم.

الشرطة اللي فيها المطافي اللي في الغالب بتوصل بعد الحريقة

ما تخلص، واللي عشان تعمل من خلال السجل المدني بتاعها

بطاقة أو مستند لازم يطلع عينك وبرضه تدفع رشوة، واللي لو

عايز تعمل رخصة قيادة سيارة وتخلص أمورك تدفع فلوس

لبعض أفرادها فيجيبها لك من غير اختبار ومن غير حتى ما تكون بتعرف تسوق عشان تزل وتسوق وتعمل حوادث تموت ناس كثيرة بسبب فساد ظابط ادالك رخصة ما تستحقهاش لمجرد انك دفعت رشوة.

نفس الشرطة اللي لو فيه خناقة بتيجي بعد ما تنتهي، واللي لو تعرف فيها رتبة كبيرة تقدر تسند عليه عشان يبقى ضهرك وواسطتك في حاجات كثيرة ويبقى لك هيبة وسط الناس وتقدر تبلطج عليهم براحتك.

في النص الثاني من التمانينات .. ولما بدأت أكبر، واكبر هنا يعني بقيت طفل مدرك للحاجات اللي ينفع احكيها، كنت من الناس اللي نزلوا يستقبلوا الرئيس وهو راجع من الدار البيضاء في أول عودة له من مؤتمر القمة العربية بعد فترة قطعة لمصر استقبلوه فيها العرب بمنتهى الحفاوة والاحترام.

كنت واقف في طريق المطار مع ناس كثيرة استقبلته، وهتفت له وهما مش فاهمين بيهتفوا له، وعشان إيه.

وفي اليوم ده ادولنا وجبة .. وعلم

ساعتها عرفت ان ده هو الأسلوب المتبع في الانتخابات والمؤتمرات الجماهيرية والاستفتاءات والخطب وعند عودته من

ما اقدرش انكر اني كنت بحبه فعلاً وقتها

كنت عيل، وفرحان اني بخرج واهتف واشوف الرئيس  
بيعملنا باي باي من العربية، ونشوفه لثواني رغم وقوفنا في  
انتظاره ساعات قبلها

وكنت فرحان طبعاً بالوجبة والعلم اللي كان دائماً بيتاخذ  
منا لما نرجع لمركز شباب الشراية على أساس انه عهدة، بينما  
الحقيقة ان ناس كانت بتاخذوه وبتبيعه!!

كان عندي ساعتها استفسار عن الفلوس اللي بيجيولنا بيها  
وجبات، ومين بتيجي؟، وهي بتاعة مين؟، بس ما حدش كان  
بيسمعني، وكل الناس كانت بتقوللي اسكت يا ض..

أقعد ساكت وبطل لماضه.. مش هناخدك معانا تاني.

ولما الناس المحترمة كانت بتجاوبني كانت تفهمني وتقوللي  
انها من الميزانية

يعني الدولة بتاخذ ضرايب من الناس عشان تدي لمراكز  
الشباب فلوس عشان تطلع ناس يهتفوا للرئيس ويقولوله بالروح  
بالدم نفديك يا مبارك ويضحكوا علينا بسندوتشين وعلم!!!!

شفت اللفة الغريبة دي كلها اللي بتثبت انك شخصياً انت

اللي بتصرف ع البلد مش العكس؟!

وانا بكير كنت، لسبب لا أعرفه، بحب اتفرج على جلسات

مجلس الشعب

كنت بشوف د. رفعت المحجوب رئيس مجلس الشعب في الوقت ده وهو بيقول موافقة من غير ما يعد الأيادي اللي مرفوعة، وشففت الشتيمة والخناقة اللي حصلت في مجلس الشعب بين وزير الداخلية زكي بدر والمعارضة بسبب اعترافات عضو حزب الوفد أيمن نور عن جريدة الوفد والحزب وفيركه لصور عن التعذيب في اقسام الشرطة

فيما بعد زكي بدر هيشتم المعارضة ويسبلها الدين في مؤتمر عام يعزل بسببه، وتنشر إحدى الصحف (جريدة الشعب على ما أتذكر) وقائعه بنص الشتيمة البذيئة لزكي بدر في صفحتها الأولى، بنما ابنه الباشمهندس احمد هيمسك بعدها ب ٢٠ سنة رئيس جامعة عين شمس ويدخل البلطجية للجامعة لكي يفضوا مظاهرات داخلها، وبعدها هيكافأ بأنه يمسك وزارة (التربية) والتعليم مع ان أبوه اتشال لأنه (.... الأدب) وكمل انت النقط زي الشاطر.

فيما بعد كمان أيمن نور هيتقال عليه العصفورة، وانه بياخذ أوامره من أمن الدولة، وانه حبيب وزارة الداخلية، وبعدين

هيبقى معارض يوصف بأنه محترم، وبعدين يبقى زعيم حزب  
الغد والثورة البرتقالية التي تريد التغيير، وبعدين هيبقى الوصيف  
في انتخابات رئاسة سورية ووهية ينال فيها حوالي نصف  
مليون صوت، وبعدها هيبقى المزور اللي اتسجن في قضية  
تزوير كل الناس متأكدة إنها ملفقة، وبعدين يتسجن، وبعدين  
يبقى مناضل ويشبهه البعض بنيلسون مانديلا، وبعدين هيطلع  
من السجن ويتحول لمعارض مع إيقاف التأثير.

لما كبرت حبة كمان سمعت عن أزمة السكن اللي البلد  
فيها، وعرفت ان مفيش حد لاقى شقق، وان أسعار الشقق  
غالية جداً، وبعدها بعشرين سنة اكتشفت ان كان فيه أراضي  
كثيرة جداً موجودة الدولة باعتها لمستثمرين بملايين عشان  
بيعوها للناس بملايين.

يعني في وقت الأزمة الدولة ما حلتش رغم وجود أراضي  
وشقق، وفي وقت الرخاء الدولة نصبت ع الناس ومصت دمهم  
وساعدت الفاسدين على انهم يكوشوا على البلد ويمتلكوا  
الأراضي بتاعتها، والجاني هو السياسة واللي بينفذها اسمه وزير،  
واللي بيعينه اسمه الرئيس حسني مبارك. يعني المسئول عن كل  
شئ في البلد دي هو حسني مبارك .. لو البلد دي كويسة بجد  
يبقى هو مسئول، ولو البلد منيلة بنيلة زي ما كانت يبقى هو



السبب في ده بدون أي نقاش.

كنت بسمع كمان وقتها عن حاجة اسمها شركات توظيف الأموال، ودي شركات كانت بتأخذ فلوس من الناس وتشغلها لهم وبعدها يدولهم الفلوس بأرباح كبيرة جداً أكبر من كل البنوك

كانت إعلانات الشركات دي في التلفزيون وفي الصحافة، وكان بيروح يفتحها سياسيين ومستولين وشيوخ.

كانت كل الناس واثقة فيها لأن البلد سايباها، ولأنها عمالة تكبر وتكبر وتكبر، وما حدش بيقول عليها حاجة

لكن فجأة .. الشركات دي طلعت نصابة وسرقت فلوس الناس، ومعظمهم هرب برة مصر بالفلوس دي، وناس كتير وقعت من طولها وطبت ساكرة بعد ما اكتشفوا ان تحويشة العمر اتنصب عليهم فيها

وفضلت المشكلة دي سنين كتيرة بتتحل، يا إما بالقبض على أصحاب الشركات، يا إما بجدولة الديون دي عشان تبقى خسارة كبيرة لكل الناس، وهزة جامدة لاقتصاد البلد اللي فلقونا بإنهم بيصلحوه، وانا هنحس بفرق قريب

لما بقى عمري ١٠ سنين شفت التزوير في الانتخابات وانا

الناس كلها كانت عارفة مين هينجح ومين هيسقط  
ومين بيدفع ويشترى الأصوات فينجح، ومين مايدفعش  
فيسقط، ومين تبع الرئيس، ومين تبع الإرهابيين اللي اسمهم  
الإخوان المسلمين  
مين اللي الشرطة تبعه وبتحميه وبتنجاهه، ومين اللي  
الشرطة بتشده قبل الانتخابات وترهبه عشان ينسحب أو  
يسقط.

وفي بدايات التسعينيات بدأت موجة الإرهاب.

جماعات إسلامية متطرفة كثيرة نزلت الشارع، ونفذت  
اغتيالات كثيرة، وفجرت أماكن أكثر، وسيطرت بشكل كبير  
على الشارع، وبدأت مخطط لتفجير مواكب وزراء وسياسيين  
كبار

في الفترة دي عيطت ع البنت اللي اسمها شيماء واللي  
كانت ضحية تفجير من التفجيرات دي. من قبلها أو يمكن من  
بعدها مش فاكر كان المحجوب اتقتل وصفوت الشريف وزير  
الإعلام اتعرض للاغتيال، ووزير الداخلية محمد حسن الألفي  
كمان تعرض للاغتيال ونجا بأعجوبة..، والفترة دي كانت

مشوشة عندي في ذكرياتها لأنها كانت سودا وقائمة ومليانة  
خراب

كنت بزعل ع الناس اللي اغتالوهم، بس بفرح بوقفة  
الناس كلها إيد واحدة ضد ببيع اسمه الإرهاب.

وكنت بسأل نفسي مين دول، وازاي البلد دي سابتهم  
لغاية ما توحشوا، ومين أصلاً السبب في توحشهم ده.

لكن للأسف الشديد الإعلام الغبي تكفل ان كل اللي يبقى  
بدقن يبقى إرهابي ومتشدد عشان يبوظ حاجات كتيرة في  
مفاهيم الناس لسة ما حدش عارف يعالجها لغاية دلوقت..،  
وساعدهم في ده وحيد حامد اللي عمل مسلسل العائلة  
بتكليف من وزير الإعلام، وكتب مقالات كتيرة عن الموضوع  
ده، وعادل إمام اللي عمل فيلم الإرهابي، واللي لا يخلو فيلم  
من أفلامه من التهكم أو السخرية من كل ما له علاقة بالدين  
أو التدين وتصويره في صورة إما المتشدد الإرهابي، أو العبيط  
الأبله.

وزارة الداخلية كمان اتعاملت بغباء في الوقت ده

كان فيه ناس بيتقبض عليها في الفترة دي لأنها نازلة تصلي

الفجر .. يعني صلاة الفجر كانت تهممة!!!

آه والله، وكانت كمان تخلي الشرطة تشك في اللي بيصليها  
في الجامع واللي مداوم عليها!!!

أنا بكتب الكلام ده يا عمر انت وتقى عشان تعرفوه لأنه  
مش موجود في كتب تاريخ، ولا اتقرر في مدارس، والله أعلم  
مين هيكتب عنه ومين مش هيكتب خالص

بكتبه لأنني انا شخصياً معرض للنسيان زي ما ناس كثير  
جداً نسيت كل اللي حصل من ذل ومهانة وفساد، وافتكرت  
طيبة قلبها وأخلاق القرية بتاعة (اعتبار الكبير أب) حتى لو  
ظالم

وعشان لو لقيتم حد بيقول حسني مبارك حبيبا وكان  
راجل محترم تحترمهم آه، إنما كمان تفكروهم باللي كانوا  
عايشينه ومش شايفينه

وعشان الناس اللي عيطت عليه لازم تفتكر  
كلهم تقريباً عارفين اللي انا بقوله بس ناسيين  
أنا شخصياً - وكنت لسة عيل مش فاهم - كنت حابب  
جداً في فترة التسعينات الريس سواء في المصايب اللي قلتها  
أو قبلها أثناء حرب العراق على الكويت  
فاكر والله لما ساعد الكويت وعمل مؤتمرات ولقاءات

وحرركات جامدة

ولما وجه لصدام حسين الرئيس العراقي ٣٢ مناشدة انه  
يرجع عن غزو الكويت

ولسة فاكر الإشاعات اللي ساعته انتشرت في كل حنة  
بتاعة صدام ومفاجأته لمبارك اللي هيبعتها في صندوق

كنا ملهين بمصايينا وبدور مصر الريادي والبلد من جوة  
مخونحة

لما حصل زلزال في يوم ١٢ أكتوبر ١٩٩٢ اكتشفنا ان  
معظم البناء اللي كان في البلد كان كده وكده.

بيوت كثير أوي وقعت من الزلزال ع الناس اللي فيها،  
وبيوت تانية بقت عايزة ترمم أو تتكس هي ومدارس ومباني  
ومستشفيات

والغريب في الأمر ان بيوت كثيرة كانت بيوت جديدة مبنية  
ف عصر مبارك اللي كان لسة ما كملش ١١ سنة في الحكم

يعني البناء اللي ف عهده كان بناء ضعيف، وأي زلزال  
يوقعه

ده حتى التوابع بتاعة الزلزال أنا فاكر والله انها وقعت  
بيوت!!

يعني المسئول الأول عن موت الناس دي مش الزلزال، انما الفساد اللي خلى بيوت جديدة تقع على روس اصحابها وتقتلهم

الفساد اللي خلى صاحب بيت ماعندهوش ضمير ياخذ رخصة بناء من مهندس حي مرتشي مرؤوس لرئيس حي فاسد مرؤوس لمحافظ مغيب مرؤوس لوزير ضايع مرؤوس لرئيس وزرا مايتكلمش غير في البنية التحتية والخطط الخمسية والناس من حواليه بتعاني وبتموت مرؤوس لرئيس جمهورية هو اللي بيعين كل دول بمزاجه، وهو اللي موافق على وجودهم واستمرارهم، وهو اللي ما بيعاسبش المخطئ لو أخطأ

أنا فاكر كويس ان في اليوم بتاع الزلزال ده الاتصالات وقعت والناس مابقتش عارفة تعمل مكالمة تليفون تظمنن على أهاليها ومعارفها

يعني بعد ١١ سنة في الحكم ما كانش فيه لا بناء ولا اقتصاد ولا اتصالات

متخيلين ١١ سنة دي يعني إيه؟

يعني مدتين تقريباً في حكم أمريكا اللي بتبقى مدته الواحدة

٦ سنين

ومع ذلك البلد كانت مخوذة من جوة.

بايظة.

مليانة فساد.

بدأت تبقى عندي علامات استفهام حوالين الرئيس، وبدأت  
اقرا من خلال مشروع اسمه القراءة للجميع.

المشروع ده خلى الناس تلتف حوالين القراءة وخلي جيل  
كامل يحب القراءة، ويلاقي مكبات كتيرة قرية منه تساعده  
انه يبقى حد مثقف

وكان المشروع برعاية حرم الرئيس

وكان بيتفرض ع الأطفال دائماً يقولوها: "ماما سوزان"

طبعاً مش عارف ليه ماما مع إن ماما في البيت، ومع إن  
مصر نفسها عمري ما قتلها يا ماما، رغم ان مصر هي أمي  
على رأي عفاف راضي

بس عادي يعني ما هو فيه ماما نجوى اللي كانت بتقدم  
برنامج مع بقلظ والكل يقول لها يا ماما

وفيه ماما سامية شرابي مذيعة الأطفال المعروفة الله يرحمها  
وكانت الناس برضه بتقول لها يا ماما

مفيش مشكلة يعني ان حرم الرئيس هي كمان نقول لها يا  
ماما، رغم ان ولادها علاء وجمال كبار في السن عن أي طفل  
في الفترة دي

كانت حرم الرئيس - اللي عرفت انها ذات أصول إنجليزية  
وان رسالة الماجستير بتاعتها كانت عن الفقر والعشوائيات-  
بتظهر كثير جداً في التلفزيون، وتحس انها بتدور على دور ليها  
في الأحداث.

جيل كبير مدينلها بأحلى أيام طفولته في احتفالات عيد  
الطفولة اللي كانت بتعمل تحت رعايتها في فترة ، واللي فجأة  
توقفت بعد أن فقدت اهتمامها بيها بعد ما سابت لنا أشهر  
أغاني أطفال اتغنت للأطفال المصريين في الوقت ده

كانت أغاني جميلة اوي بالمناسبة وذكرياتي أنا وجيلي عنها  
بتفكرنا بجمال الفترة دي وحبنا لبلدنا..مش تقوللي شخبط-  
شخايط وبوس الواو! 😊

أغاني للأطفال عن البلد.

أغاني تحبهم فيها وتقول لهم : "كل بلاد الدنيا جميلة لكن  
اجمل من بلدي لا"، وأغاني تعلمهم السلم الموسيقي "صوت  
المزيكا يتكلم..بيقول لك إيه الله أعلم..من دو ري مي فا



صول لا سي.. كل المزيكا بترالم لم"، وأغاني تانية تعلمهم أهمية  
غسيل الأسنان" الصف فوقاني.. من فوقه لتحتيه..، والصف  
التحتاني.. من تحته لفوقيه.. وبكدة لا بتلوث.. أسناني ولا  
تسوس".

الأطفال في المرحلة دي فعلاً مدينين للست دي بحاجات  
كثيرة، ومدينين كمان لشوقي حجاب ونادر ابو الفتوح اللي  
كانوا بيكتبوا الأغاني دي، ولصفاء أبو السعود اللي هي أشهر  
مطربة غنت للأطفال في مصر

كانت سوزان مبارك جميلة أوي في المرحلة دي.

وبتعمل مشروعات حلوة.

مرة القراءة للجميع.

مرة مشروع بناء ١٠٠ مدرسة بعد الزلزال، ومن كتر  
التبرعات اللي كانت - ولأول مرة في التاريخ - بتتذكر في  
نشرة الأخبار ال ١٠٠ مدرسة بقت ١٠٠٠ مدرسة.

لم نعرف هل بنيت فعلاً والا لأ؟..، ولم نعرف اتبنت  
فين؟، ولا هل تم صرف هذه التبرعات بشكل صحيح والا  
لأ؟.

ومع مرور الوقت كان نفوذ السيدة الأولى أو ماما سوزان

وظهورها بيزيدوا.

بقت الأم الروحية للمعاقين، وبقت راعية ذوي الاحتياجات الخاصة، وبقت رئيسة جمعية الرعاية المتكاملة، وبقت رئيسة جمعية الهلال الأحمر، وكانت صاحبة فكرة مكتبة الأسرة التي وضعت صورتها على كل إصداراتها، ووجهت لها شكراً في كل كتاب صدر، وكانت رئيسة شرفية على ما أتذكر للمؤتمر الدولي للسكان اللي طلعت بعده بسياسة تبنتها الدولة كلها لمكافحة ختان الإناث

كانت رئيسة حاجات كثيرة أوي.

وبدأت حاجات كثيرة تعملها، وتنشأها مخصوص زي المجلس القومي للطفولة والأمومة مثلاً، واللي انا مش عارف دوره إيه؟ ولا يعمل إيه؟ ولا الناس اللي هناك بياخدوا فلوس ومرتبات على إيه؟ رغم ان شغلهم مجهول، وموسمي، وينفع يقوم بيه ناس كثيرة من غير مجلس ومن غير مقر ع النيل على طول في المعادي .

وبعد فترة كمان اتعملها مخصوص حاجة اسمها المجلس القومي للمرأة ما نعرفش دوره إيه، وهل هو مرتبط بشخصها والا بسياسة دولة؟

ومن قبل كل ده جمعية الرعاية المتكاملة اللي برضه مش عارفينلها دور حقيقي ومؤثر في البلد، وكل الحاجات دي ماسكينها أصحاب أو معارف الهانم وأصدقاءها أو جيرانها.. تخيلوا؟؟؟

صحيح معظم الحاجات اللي كانت ماسكاها سوزان مبارك حاجات خيرية في الوقت ده، لكن اللي يهمني انها أصبحت ملئ السمع والأبصار، وبصحة عدد من الوزراء اللي كانوا يساعدوها في كل حاجة. يعني يسيبوا أشغالهم وفاضينلها هي بس، والأهم من كل ده انه لما كان حد عادي او طبيعي يحاول يوصل مبادرة أو مشروع للإعلام أو لأي وزير من دول ماكانش بيستقبله أساساً.

يعني أنا فاكر كويس أوي ان صحفي في مجلة الشباب زمان عمل تحقيق حلو اوي باعتباره مواطن عاوز يقابل الوزير، وذهب للوزارة، وطلب مواعيد، وترك بياناته، وكان ملح في السؤال لكن لم يقابله أي وزير باستثناء وزير الكهرباء في ذلك الوقت ( ماهر أباظة) اللي قابله باعتباره مواطن ولما عرف انه صحفي اتضايق شوية، وبعدين أشاد بيه وشكره، وراح يكمل شغل

بدأت الأبواب المفتوحة تتقل قدام الناس، وبدأت الصورة

الوردية يسيطر عليها حبة ناس بقو معروفين انهم ماسكين البلد في ايدهم، وانهم الكل في الكل، وان مفيش حد يعرف يكلمهم أو ينتقدهم ولو نقد موضوعي.

بدأ يبقى فيه نفوذ قوي جداً لصفوت الشريف وزير الإعلام، وكمال الشاذلي وزير مجلسي الشعب والشورى، والاتنين قيادات في الحزب الوطني الديمقراطي الحاكم والتي يفوز في الانتخابات بالتزوير، والتي يبسمع كلام رئيسه اللي هو - وباللصدفة - نفس رئيس جمهورية مصر العربية واسمه حسني مبارك !!

كل الناس المحترمة بالمناسبة كانت دائماً بتطلب من حسني مبارك انه يسب رئاسة الحزب الوطني ويقلل من صلاحياته شوية ، ومع ذلك كان مطشش الكل. يعني ازاى يبقى رئيس الحزب الوطني اللي هو طلع والا نزل حزب وفي نفس الوقت رئيس البلد كلها اللي مليانة أحزاب تانية مناقسة ومعارضة للحزب الوطني؟

ازاي كمان يبقى هو رئيس الجمهورية وفي نفس الوقت رئيس مجلس القضاء الأعلى ورئيس الحزب الوطني ورئيس المجلس الأعلى للشرطة والقائد العام للقوات المسلحة

كثير اوي بصراحة.. وكل الناس المحترمة كانت بتقول كده،



بنية تحتية، ومرة يقول لك اصبروا عشان نرجع علاقتنا بالدول العربية اللي حوالينا، ومرة يقول لك اصلها ظروفنا الاقتصادية الصعبة واحنا هنعمل إصلاح اقتصادي، ومرة يقول لك الإرهاب، ومرة يقول لك أعداء مصر والمتربصين بها، ومرة يقول لك حرب العراق والكويت والمصريين اللي راحو هناك يجاربوا، ومرة الزلزال ومرة السيول ومرة ومرة ومرة

إيه ده؟

كل دي مصائب كانت بتجمعنا حوالين شخص واحد الإعلام كان مصور لمعظم الناس انه عاوز يحل، وانه مالهوش دعوة بكل ده أو بأي فساد وغلط بيحصل، وانا لازم نساعده مع إن اللي كان يفكر كويس كان يلاقيه ماينفعش خالص، وهو نفسه قال في حوار له قبل كده ان أقصى طموح له كان انه يبقى سفير في دولة أوروبية زي إنجلترا مثلاً مش رئيس جمهورية

طب فين الإصلاح الحقيقي اللي جوة البلد

فين التغيير اللي يخلينا من أفضل بلاد الدنيا

فين المرتبات اللي لما تتحسن نحس فعلاً انها زادت مش نحس

بعد رفع الأسعار انها يا ريتها ما زادت وفضلت زي ما هي؟

فين الأزمات اللي بتتحل مش بتترل على دماغنا زي حجر كبير بيتدحرج من قمة جبل عالي جداً ومايل جداً جداً؟

كل دي كانت أسئلة مش لاقيلها إجابة

كانت الناس معجبة بالرئيس في حواراته مع التليفزيون الإسرائيلي اللي كان بيحرج فيها المذيع دائماً، ويكلمه بقتامة ويتدبرق عليه، ومش واخدين بالهم ان إسرائيل شايفة حسني مبارك (صديق)، وانه بيحافظ على أمن إسرائيل، وان وجوده مهم في المنطقة، وهو نفسه له أصدقاء من وزراءها ورؤساء وزرائها يهنتهم ويهنتوه بالمناسبات المختلفة ومنها أعياد ميلاد كل منهم، وهو ما لم نعرفه إلا بعد أن أصبح العالم مفتوحاً على مصراعيه بفضل الفضائيات و الإنترنت وثورة الاتصالات بشكل عام .

في منتصف التسعينات تقريباً يا (عمر) ويا (تقى) الرئيس كان رايح يحضر مؤتمر القمة الأفريقية في أديس أبابا في أثيوبيا، وفجأة طلع عليه ناس كانوا عايزين يغتالوه، فقام قايل للسواق لف وارجع تاني، وخذ أول طيارة ورجع على مصر

الناس في اليوم ده فضلت تتكلم على حكمة الرئيس وشجاعته الفائقة، وعلى أعداء مصر اللي عايزين يدمروها عشان بيكرهوا الرئيس.. بس ماعرفتش لغاية دلوقت إيه

الشجاعة في فكرة" لف وارجع ثاني"!!

كان الرئيس ساعتها متضايق وطلع في خطاب يشتم في السودان ويقول لنائب الرئيس السوداني وقتها د.حسن الترابي: اختشي لأن المؤشرات كانت بتقول ان هو اللي دبر عملية الاغتيال.

بس الظاهرة اللافتة للنظر في الوقت ده إن ناس كتيرة أوي راحت للرئيس بيته عشان تقول له حمد الله ع السلامة وكأنه جارنا اللي راجع م العمرة، وفاكر كويس أوي انهم نقلوا اللقاءات دي على الهوا في التلفزيون

الصحفيين والأدباء والفنانين وغيرهم وغيرهم كلهم راحو للرئيس يقولوله حمد الله ع السلامة

رجعت وقتها لناس كبار اسألهم ده حصل في أي حته في العالم قبل كده؟

قالولي : لأ

الرئيس في الفترة دي عمل لقاءات كتيرة مع ناس جت تظمن عليه وكأنه خارج من مستشفى ومروح على بيته، وحسيت وقتها انه عمدة كفر طهرمس مش رئيس دولة كبيرة بينما التلفزيون المصري والصحافة المصرية كانت بتنقل ده على



إنه مظهرة حب من الشعب للريس !!

في الأيام دي المصانع والمنشآت الحكومية كانت بتدي أوامر للعمال يروحوا بالآلاف لبيت مبارك (اللي ما اعرفش كل الناس عرفته فجأة ازاي)، ويقفوا ناحية القصر ويهتفوا له " بالروح .. بالدم..نفديك يا مبارك/بالروح..بالدم..نفديك يا مبارك)

التهاف ده بالذات كان بيعصبي جداً

لأني أقسم بالله العظيم لو الريس قال لحد فيهم تعالى موت بدالي وافديني بروحك وبدمك ما كان حد هيرضى.

كل الناس اللي طلعت - بلا استثناء - كانوا طالعين بتوجيهات من الوزراء اللي معينهم الريس.

يعني أصلاً أصلاً كأنهم طالعين بتوجيهات من الريس نفسه، وكان الريس يقول لهم تعالوا اتطمنوا عليا وهعملكم باي باي وتروحوا تاني!!!!!!

تصدق يا عمر انت وتقى انهم كانوا بيحسبوه نص يوم، ويعملوا الحضور والانصراف بناء على اللي عمل المسيرات المؤيدة وراح عند القصر، واللي كان بيزوغ كانوا يخصموا منه أو يكتبوه غياب!!.

والغريب ان في الفترة دي ما كناش بنسمع عن تجمعات عطلت مرور، ولا عن شرطة بتعرض للتجمعات دي، ولا عن أمن مركزي بيحفظ النظام، ولا عن اشتباكات أو قتلى نتيجة التدافع والزحام.

شفت الرئيس وهو بيخرج من شباك بيتهم يعمل للناس باي باي ويقول لهم متشكر..اتفضلوا، فيروحو مروحين، وقارنت ده بالملايين اللي نزلت تنادي جمال عبد الناصر انه ما يتنحاش، و الملايين اللي نزلت في جنازته بدون أي دافع لهم على ذلك اللهم إلا محبتهم الحقيقية لجمال عبد الناصر، وقارنت ده بسلوك الناس في هذا الموقف مع مبارك، فأدركت أن مبارك من الذين يحبون النفاق، ومن السهل أن تضحك عليه، وعلى الرغم من كلامه الدائم عن كونه يميز الذين ينافقوه من الذين يحبوه إلا إن التجربة علمتني ان اللي يقول انا ما يتضحكش عليا، وانا ما حدش يعرف ينافقني هو اول واحد بيتضحك عليه ويحب الناس تنافقه .

كانوا في الفترة دي بيتكلموا عن عصر مبارك بوصفه أزهى عصور الديمقراطية، والعصر الذي لم يقصف فيه قلم، ولم تعطل صحيفة، ولم ينكل بصحفي، وكل هذه الاسطوانات التي ترددت كثيراً في هذه الآونة إلى ان جاء الرئيس وقرر فجأة لأن

بعض اصحابه متغاضين من الصحافة انه يقيد حرية الصحافة بقانون كل الناس وقفت ضده فيه وعرفوا جزء من شخصية مبارك اللي ياما قال ع الصحفيين كلام حلو عشان يلاقوه فجأة بيقول لهم: "مش موافقين ع القانون ليه.. هو انتو يعني على راسكم ريشة".

كان الرئيس ساعات يعمل اتصال بواحد من الصحفيين الكبار ويقول له: "قرت اللي كتبه فلان.. مش عيب برضه.. الظروف مش مستحيلة.. أنا قلت اكلمك انت ما اكلمهوش هو عشان مايفهمنيش غلط.. أنا باتكلم بصفتي مواطن مش بصفتي رئيس"، والشاهد على ده أنيس منصور في أكثر من كتاب ليه، وكواليس الوسط الصحفي اللي كانت عارفة ان الرئيس مايطقش يوسف إدريس ولا هيكلا ولا مصطفى أمين ولا توفيق الحكيم

كان لازم من قانون يسجن ناس كتيرة

بس الصحفيين وقفوا قصاد القانون ده

وانتصرت إرادة الصحفيين رغم كل شئ ، واتلغى القانون.

كانت النعمة السائدة في الوقت ده ان الحرية اللي في عصر حسني مبارك أكثر بكثير من الحرية اللي في عصر أي ريس

قبله، وان اللي بينتقد سياساته ماكانش يستجري انه يعمل كده أيام عبد الناصر والسادات وإلا كانوا سجنوه واعتقلوه، وكانت ناس كتيرة مصدقة الكلام ده ومقتنعة بيه. ناس ما تعرفش عن الحرية غير الفتافيت اللي بتترميلهم منها، واللي بيرضوا بيها وبيعتبروها حرية لأنهم مايعرفوش حاجة عن الحرية اللي بيجد.

ناس مش مدركة ان الحرية دي من حقنا، وان احنا اللي بناخد حريتنا مش الحاكم مش هو اللي ييمن أو يتفضل بيها علينا

في الفترة دي تقريباً شفت مشاهد تانية غريبة جداً عمري ما شفتها قبل كدة أو سمعت عنها في أي مكان في العالم

مشاهد تنفع لفيلم رعب مش لبلد محترمة

شفت ناس كانت بتخرج بعرايض مكتوبة بالدم عشان تباع الرئيس لفترة رئاسة جديدة ويقولوا له : انت القائد وانت للأبد، وانت وبس، ونعم لزعيم الاستقرار، ونعم للأمن والأمان، ونعم لحكمة مبارك، وكل الحاجات دي

شفت مجلس الشعب (المزور) رايح لغاية عنده في مسرحية رخيصة عشان أعضاؤه يوصلوله رغبة الناس ( اللي هما ما

اختاروه همش أصلاً، واللي هما ما حدش طلب فيهم انهم يتكلموا  
بإسمه) في إنه يكمل رئاسة مصر، ويفضل على كرسي الحكم.

كلهم راحوا يسلموا ع الرئيس في بيته، ويقولوله أرجوك  
رشح نفسك في المدة الجديدة، وبعدين يسلموا عليه ويمشوا بعد  
ما يوصوا المصور بإنه يصورهم وهما يسلموا ع الرئيس عشان  
ياخدوا الصورة يكبروها ويعلقوها في بيوتهم.

فاكر كويس أوي ان كان واقف جنبه كمال الشاذلي الله  
يرحمه، وإن اللي كان يجي يسلم على الشاذلي بعد ما يسلم ع  
الرئيس كان يزقه بطريقة مستفزة ويرفض يسلم عليه .

كان منظر غريب اوي ضايقي جداً زي ما كان مضايقي  
انهم يجيبوا راجل بتاع قانون اسمه أحمد فتحي سرور بمسكوه  
التعليم، وكان بيخرب فيه وما نعرفلهوش إنجاز ، بل على  
العكس ده هو اللي لغى سنة ٦ ابتدائي بمقرراتها بسلطانها بيابا  
غنوجها .. عادي جداً على أساس انها مش مهمة، وبعدين  
ماعملىش رؤية للتعليم المصري، ولا صلح حاجة، والأدهى انه  
ساب وزارة التربية والتعليم خالص وودوه مجلس الشعب عشان  
يقتي رئيسه ، وعشان يقول موافقة ويفصل قوانين ويقول لك  
: كله بالقانون، ولما أحكام تتاخذ بالبطلان ضد أعضاء مجلس  
الشعب كان يكبر دماغه ولا كأنه واخذ باله، وكان دائماً يقول

العبارة المستفزة الشهيرة : "المجلس سيد قراره".

يا حبايبي ماكانش فيه سياسة عدلة أصلاً..يعني بعد ما سرور مشي من وزارة التربية والتعليم عينوا راجل محترم صحيح بس كان دكتور أطفال هو اللي مسك وزارة التعليم (حسين كامل بهاء الدين)، وفي الفترة دي يبجي وزير صحة يكون كل همه يعمل مؤتمر للسكان ويلخص سياسة الوزارة في محاربة ختان الإناث بينما المستشفيات زي الزفت ( ماهر مهران) والناس بتموت فيها، والشرطة كانت سمعتها بتسوء مع مرور الوقت والناس بتخاف منها بدل ما تحبها، ولما يبجي حد يشتكي يتشد، أو يقال له "إحنا في حالة طوارئ"، أو يتفبر كله حاجة أو يتخوف بيبعب الإرهاب واذا اشتكيت يقال الناس دي بتعمل فينا كده عشان خايفين علينا وعارفة مصلحتنا.

كل الناس كانت عارفة وبتسمع عن تقفيل المحاضر، وان في نهاية كل سنة الشرطة بتبقي عايزة تقفل محاضر كثير عشان تثبت انها شايفة شغلها، فتاخذ عاطل على باطل وتشتبه في أي حد ماشي في الشارع، أو تملكك للناس اللي بينهم وبين بعض مشاكل فيروحو واخذينهم عاملينهم محاضر، ده غير الإتاوات اللي بيحصلها ظباط الشرطة من تجار وناس كثيرة، غير الفلوس اللي بتتاخذ نتيجة ندب ظباط الشرطة لقطاعات زي الكهرباء

والمطارات والسياحة والحراسات وكل دول كانوا بياخدوا  
فلوس زيادة على مرتباتهم، وفي الوقت ده كنت تلاقى - ولسة  
بتلاقى - المرور زي الزفت، والتعليم زي الزفت، والصحة زي  
الزفت، والزراعة كمان زفتين تلاتة!!

كانوا يقولونا ان مصر كانت سلة غلال العالم في التاريخ  
ويجوا في الجغرافيا يقولونا ان من أهم الحاجات اللي  
بنستوردها هي القمح!!

في أواخر التسعينيات وبداية الألفية الجديدة كان فيه كلام  
ومستندات وتحقيقات حوالين ان القمح ده قمح مسرطن، وان  
المبيدات اللي سمح وزير الزراعة في الوقت ده بدخولها لمصر  
كانت مبيدات مسرطنة ومسيبة للسرطان، واتعمل أكثر من  
تحقيق أو موضع حوالين الجريمة دي لكن لا حياة لمن تنادي،  
ولم يحاسب الوزير يوسف والي حتى الآن أو ينال حتى محاكمة  
تليق بما قيل عنه وما قدم ضده من مستندات!!!!

واللي يغيظك ان البلد كلها تبقى عارفة مين الفاسد ومع  
ذلك ما حدش يحاسبه أو يكلمه أو يتشجع ويرفع عليه قضية.

واللي يغيظك أكثر وأكثر ان ناس كثير كان عندها حلول  
لمشاكلنا ومحققه نجاحات ومعروفة بضميرها الحي ومع ذلك  
كانوا بيتجنبوا ويخلوهم بعيد ما يتكلموش، وان اتكلموا ما

ياخدوش بأرائهم أبداً

واللي يضايقك كمان ان الفساد فضل يكبر لغاية ما أصبح منظومة كاملة كلها بتنفذ على بعضها وكأننا ف مافيا.

أنا مثلاً أعرف شخصياً واحد كان بلطجي بيستعينوا بيه في الانتخابات، وهو في نفس الوقت مرشد يرشد الشرطة عمن لا يرضى عنهم لكي يستطيع الضباط أن يثبتوا أو يوحوا بأنهم يقومون بعملهم على أكمل وجه رغم كون الموضوع يعتمد في الأساس على نفيركة، لكن هذا الرجل كان يفعل ذلك مقابل أن تكون الشرطة هي ظهره وهي الداعمة له، ومع مرور الوقت أصبح البلطجي المرشد رجل أعمال بعد ان نجح مشروع تجاري أقامه، ولأنه ماينساش الجميل عمل مرتب شهري لظباط وأمناء شرطة القسم اللي بيته يتبع له، ومرتب شهري تاني مع هدايا وحاجات حلوة لظباط القسم وأمناء الشرطة اللي مكان عمله يتبع له، وهكذا أصبح الموضوع مافيا، فلو حد مزنونق في أي شئ يروح للبلطجي يخلصهاله من القسم بطريقته، ولو حد اتمسك في مصيبة أو اتاخذ بسبب جريمة البلطجي رجل الأعمال ده يطلعه منها، وأكد مش لله.دي حاجة فعلاً عاملة زي المافيا..يعني أكيد هيجتاج للي خدمه ده في يوم من الأيام عشان يساعده ف حاجة أو يردله الخدمة.



ياااه ع المستنقع والبكابورت اللي الواحد عاش فيه

وياااه على شعور الواحد لما يسمع ناس تتكلم عن مبارك

الأب ومبارك أحسن حاكم لمصر وان بلدنا بتتقدم بينا!!

واللي يجز في نفسك ان كل الناس كان عندها حلول لكل

الفساد اللي بيحصل، ولو ركبت تاكسي سواق التاكسي

يفضفضلك ويقول لك الحل، ولو ركبت مترو تلاقى كل

الناس ولا أجدعها محللين سياسيين محترمين، وبيتكلموا في اللي

يصلح حال البلد، بس ماחדش كان بيسمعها أبداً وكانوا

بيعتبروه كلام قهاوي ومصاطب.

أو كانوا بيوظوا الدنيا بفساد أكبر في قطاعات تانية زي

الإسكان عشان نخش في دايرة معقدة وجهنمية من الفساد

ماחדش كان عاوز يحلها لأن الكل منتفع منها

يعني مثلاً أزمة الإسكان وان مفيش شقق (رغم الأراضي

الكثير الموجودة واللي عرفنا دلوقت كانت بتباع لمن وازاي)

هي اللي خلت الناس تبور الأراضي، وبالتالي تبوظ الزراعة،

وبالتالي يختل ميزان الصادرات والواردات الزراعية، وهي اللي

خلت السوق السودا تنتشر في ظل نقص المواد التموينية، وكنا

بنسمع عن صفقة بلوييف فاسد أكلناه، وصفقة فراخ منتهية

الصلاحية اشتريناها من الجمعية اللي تبع الحكومة، وطيور

جارحة دخلوها البلد على إنها فراخ مجمدة بينما هي نسور  
وصقور وطيور غريبة!!

الفساد كان يقابلنا من أول ما نصحى من النوم لحد ما ننام  
أول ما تصحى وتلاقي المية مقطوعة أو ضعيفة في بلد النيل  
اللي بتكتشف ان مواسيرها ملوثة، وانك لو عايز تضمن  
صحتك لازم تركب فلتر على الحنفية عشان تشرب مية انت  
ضامنها، وفي الوقت نفسه فيه أماكن في مصر في الأرياف  
ومناطق بعيدة عن القاهرة بتعاني من ان مافيهاش مية وبتشترىها  
بجراكن من الشارع.

وانت نازل من بيتك وماشي في الشوارع كنت تلاقي  
أعمدة النور منورة بالنهار، ومطفية بالليل، ومفيش حد  
بيحاسب المسئول على كده، ولا إهدار المال العام اللي بيبقى  
من فلوسنا على الكهرباء دي، وكانت النتيجة الحتمية لده هو  
اللي حصل في سنة ٢٠١٠ من انقطاع في الكهرباء، ومن  
مطالبات للناس بترشيد استهلاكهم للكهرباء في بلد السد  
العالي. مش بس كده دول كانوا بيقلوا ماحدث يركب  
تكييفات عشان هي دي اللي بتعمل ضغط عالي على الشبكات  
وبتخلي الكهرباء مقطوعة!!!.

مواصلاتنا غير آدمية، وغير مصممة بشكل محترم، وطلعلنا

في المقدر مكتوب حاجة اسمها اتوبيسات رحلات مسميها النقل الجماعي وسايقينها شمامين وبلطجية وأطفال أحداث، وبعضها مملوك في السر لظباط شرطة بيشفلوه كمشروع يجيلهم فلوس، ومترو الأنفاق اللي كنا فرحانين بيه أصبح مرادفاً للإهمال والمسولين والبلطجية يركبوه ويتمشوا فيه بالاتفاق مع الشرطة المسئولة عنه مقابل نسبة أو إتاوة.

أي مصلحة ليك في أي مصلحة حكومية كان لازم تدفعها رشوة عشان تخلص بسرعة وتتعامل كويس وانت بتعملها، وان انت ما عملت شدة بنفسك الموظف بيطلب منك ده بنفسه وبمتهى البجاجة

مش بعمم طبعاً لأن التعميم غلط..

بس الأغلب الأعم في بلدنا كان كده فعلاً

بجاري ضاربة، وشوارع مش متسفلتة، وأماكن بتبقى نظيفة وقت زيارة المسئولين، ومزروعة شجر جديد ترجع زي ما كانت واسوأ، وبيتقلع منها الشجر بعد ما المسئولين دول بيمشوا من زياراتهم المفاجئة اللي كل الناس عارفة معادها!!!.

مافيا فساد كلها موصلة لبعضها، والكشف عنها سهل بس ماחדش عاوز يحاسب.

ده حتى واحد من رجال أعمال مبارك كرمه واداله جايزة  
اتهم بعدها بسنين قليلة في قضية فساد كبيرة.

الفساد كان في كل مكان والله ويمكن تتكعبل فيه وانت  
ماشي في كل مكان..، والكل عارفه وشايفه، والكل عارف  
الحل، والحل ما ينفعش بيحي إلا من عند واحد بس مش عاوز  
يحل

واحد اسمه حسني مبارك

واحد هو اللي بيعين الحكومة بمزاجه

وهو اللي بيحدد الوزرا بمزاجه

وهو اللي بيحط السياسات بمزاجه

ومجلس الشعب المزور ما يقدرش يحاسبه؛ لأن كلهم  
مستفيدين منه ، وكلهم بيحميهم الرئيس وحزبه ورموز نظامه

بتسألني عن المعارضة في الأحزاب؟؟؟

رموز المعارضة يا ابني معظمهم في البلالا.

كارتون

أو كائنات هلامية أشبه بالجيلي بتلظ من غير أي فائدة.

ده حتى الجيلي بيتاكل وطعمه حلو، إنما هما خربوها

وقضوها حنجوري وخلص

حاجات كثيرة كانت في منتهى الفساد وهما عارفين،  
وعمرهم ما أخذوا موقف قوي يخرج النظام أو يحسن الناس  
انهم بيتكلموا باسمهم وعارفين مشاكلهم

مرة طلعلونا في المقدر مكتوب وقالولنا ان فيه مشروع اسمه  
توشكى وان هو ده مشروع ولادنا وهو ده التخطيط لمستقبل  
مصر بعد ٢٠ سنة، وبعدها بفترة فشل المشروع واكتشفنا  
الوهم والفساد اللي كانوا فيه وامتلاك الأمير الوليد بن طلال  
أحد أغنياء العالم لمساحات شاسعة منه بثمان بجنس..دراهم  
معدودات!!

كل الناس عارفة مين الفاسد ومين الحرامي ومين اللي فاهم  
ومين اللي مش فاهم ومين ببيوظ من غير ما حد يكلمه أو  
يراجعه ومع ذلك مفيش حد بيغير

مين الحيتان اللي مكوشين ع البلد

ومين اللي بيعمل كل اللي هو عايزه من غير ما حد يقدر  
يكلمه

ومع ذلك برضه ما حدش يقدر يتكلم

وبعدين اترفع سقف الحرية

أترفع أوي لدرجة ان الناس بقت بتتكلم

بس ما حدش بيسمع

وان سمع فيطنش

أو بياخد اللي بيتكلم على قد عقله

أو بيعتبر ان اللي بيتكلم عنده أجندة، وانه عميل، وانه

خاين، وانه تبع الأمريكان، أو تبع الإخوان المسلمين، أو تبع

الأشكيف المخيف بتاع ألف ليلة

في الوقت ده قرئت

وناس كتيرة في بلدنا ما بتحبش القراية

لأنها فرحانة بجهلها وتناحتها

ويمكن لأنها عارفة ان مفيش فايده

قرئت عن تحقيق هيتنشر في جرنان اسمه الشرق الأوسط

الدولي عن البيزنس

لأ.. مش أي بيزنس

بيزنس أولاد الرئيس

علاء وجمال مبارك

كانت الأسئلة عن ثروة مبارك نفسه ممنوعة ولو حتى على

ماكناش عارفين بيقبض كام ولا فلوسه بيعمل بيها إيه ولا  
ثروته قبل وبعد الرئاسة ولا أي حاجة من الكلام ده

ماكناش عارفين عياله حتى بيشتغلوا إيه

ولا مع مين

ولا ازاي

كانت كلها إشاعات، وكل إشاعة لا تستند على أي  
حقيقة إلا أن الناس دي مش مننا

يعني كنا بنسمع ان علاء مبارك هو شريك أحمد بهجت في  
جولدي اللي كان اسمها جولديستار واللي بقى اسمها إل.جي

وان جمال بينخش يشتري سندات ويلعب في البورصة

صباح الاجتهاد

بيتعب بصراحة

ولما الشرق الأوسط أعلنت عن التحقيق ده

وقالوا انه بالمستندات

وقالوا انه العدد الجاي

بعدها على طول طلع منع للطبع ولدخول العدد ده

مش بس كده

ده حصل كمان إغلاق لمكتب الجرنان بقرار من صفوت

الشريف

اتشردوا الناس اللي كانت شغالة هناك كلهم وماعرفناش إيه

اللي كان في التحقيق

وبعدها بفترة - مش فاكر كانت شهور والا سنين -

رجع الجرنان والمكتب في مصر بعد اعتذار رسمي، و ماحلش

برضه عرف أي حاجة عن بيزنس أولاد الرئيس، ولا الموضوع

أصلاً نزل بعد كلام على مستوى عالي مع الملك فهد الله يرحمه

كان صفوت الشريف يقول دي افتراءات من غير ما يخلينا

نقرا

صفوت الشريف اللي كان في المخابرات وكان قواد حسب

الملفات يستخدم الفنانات استخدام جنسي لجلب المعلومات في

الستينات

واسمه موجود - إلى الآن - في قضية فساد المخابرات

الشهيرة بعد النكسة

الراجل ده كان حسني مبارك ممسكوا إعلام مصر

وبعدها مسكه الحزب الوطني كله



ومسكه كمان مجلس الشورى

يعني المجلس الأعلى للصحافة، بحيث هو اللي يقول إيه  
الجراید اللي تطلع وإيه الجراید اللي ما تطلعش

ولجنة شؤون الأحزاب اللي ما طلعتش حزين على بعضهم  
من بتاع ١٥ سنة، واللي لازم تطلع أحزاب تبعها تسمع الكلام  
وتقبض وتتخرس خالص وتديها دعم

أو تنهي أحزاب ممكن صوتها يعلى أو تعمل صداع زي  
حزب الغد

في الفترة دي بدأنا نسمع أكثر عن جمال مبارك اللي كنا  
بنشوفه يلعب كورة في فريق الصقور هو وعلاء مبارك في  
نادي اسمه نادي حورس كان موجود جوة الاستاد

بالنسبة لنا كانوا ولاد الرئيس

وكان كل شئ ممكن يبقى كويس لولا حاجة واحدة

ان جمال مبارك بدأ يلعب سياسة بدل الكورة

وبدأ يلعب في البلد كلها مش في الاستاد بس

وبدل ما الجمهور بالنسبة له عدة مئات قاعدة في المدرجات

أصبح شعب قوامه ٨٠ مليون مواطن.

بقينا نشوفه في النشرة بيطلع كعضو في المجلس الاقتصادي المصري الأمريكي (بأمانة إيه مش عارف)، وبعدها بدأ يكبر ويكبر، ويتقال انه هيعمل حزب، ويتزوج له على إنه وزير الشباب القادم، وانه يريد الخير للشباب، وبعدها عمل جمعية اسمها جيل المستقبل واخذة مبنى كبير جوة جامعة القاهرة ذات نفسها في الوقت اللي ممنوع أي حد يبقى له ربع أو تلت المبنى ده في أي جامعة مصرية، والوقت اللي الجامعات المصرية كلها بلا استثناء تعمل في خدمة الحزب الوطني، وتضطهد أي نشاط سياسي لا يتوافق مع الحزب الوطني داخل الجامعة بحجة ان مفيش سياسة في الجامعة!.

بدأ جمال مبارك يكبر ويكبر. ظهوره كان بيزيد، وصلاحياته بتوسع زي الأستك، ومن مجرد واحد كان بيشتغل في بنك أصبح واحد بيتحكم في بلد.

بدأ جمال مبارك يتدخل بعلم ومباركة أبوه في كل كبيرة وصغيرة، وهو اللي اقترح سياسات اقتصادية كثيرة بهدلت مصر من أول تعويم الجنيه، ومروراً بكوارث تانية بتتكشفلنا مع مرور الوقت زي انه كان مشارك في شركة من شركات البورصة في السر.

ومع جمال بدأت شلة تانية تظهر. شلته الشخصية. أصحابه

والشلة بتاعته من رجال الأعمال والناس المستفيدين اللي كانوا  
بيقوموا في دماغه انه عبقرى، وانه بتاع سياسة، وان فكره  
الجديد ده هو اللي ممكن ينقذ مصر

ولأن مامته كانت بتجبه باعتباره آخر العنقود فكانت هي  
كمان متحمسة جداً انه يقاله دور في البلد.

وبين يوم وليلة أصبح جمال مبارك المحاسب اللي كان  
بيشتغل في بنك أوف أمريكا، واللي مالهوش في السياسة، واللي  
عمره ما اتكلم فيها ولا أظهر موقف يستحق الاحترام أو  
الإعجاب هو أمين لجنة السياسات بالحزب الوطني  
الحاكم. وأصبح المحظوظين فقط هم المنضمين لهذه اللجنة حيث  
يحظون بمصاحبته، وبرؤية طلعتة البهية، وبمشاركته التخطيط  
لسياسات البلد.

بدأت الناس كلها تتكلم عن مبارك اللي ناوي يورث  
الحكم لابنه جمال، وأصبح موضوع التوريث هو الشغل الشاغل  
للمعارضة اللي بقت بتعارض التوريث وتلغنه آناء الليل  
وأطراف النهار.

بدأنا نسمع عن ناس غريبة اقتحموا حياتنا السياسية من  
بوابة انهم تبع جمال وابوه والحزب. ناس رجال أعمال  
وصحفيين وفاسدين معروفين بالاسم، وبدأت أسماء كثيرة

تتفرض عينا منهم الشماشرجية، ومنهم اللي يبسبحوا بحمد  
الريس ووولده جمال، ومنهم المشتاق، ومنهم المستفيد بشدة من  
وجودة بالقرب منهم لأنه يسرق على قفاهم ويستخدم صلته  
بيهم عشان يوصل للي هو عاوزه

بقى فيه أحمد عز اللي كان بيعزف درامز واللي أصبح  
محتكر الحديد واللي كسب مليارات في جلسة بورصة واحدة،  
وأصبح أمين التنظيم في الحزب الوطني، والراجل اللي بيصرف  
ع الحزب، وع الحملات بتاعة الريس، واللي بيتحكم في  
أعضاء الحزب الوطني بإشارة من صباعه ويمشيهم ع العجين ما  
يلخبطوهوش.

كانت كل الناس بتتكلم عنه لكنه كان بيخرج زي الشعرة  
من العجينة من أي مطب بيتعرضه نتيجة دعم ابن الريس ليه.

بدأ كمان يبقى فيه حد اسمه هشام طلعت مصطفى بتاع  
مدينة الرحاب وشركة طلعت مصطفى الرهيبه واللي كان  
عاوز يشتري جريدة الدستور أقوى وأشرس جرنان معارضة  
ف مصر عشان يديه هدية لوالده الرئيس؛ لأنه كان بيعتبر  
الريس أبوه، والغريب ان هشام ده كانت نهايته شبه الأفلام  
العربي لما اتورط في التحريض على قتل مطربة درجة تانية هي  
سوزان تميم اللي صرف عليها ملايين وسابته فقرر انه ينتقم

منها وراح مسلط عيها ظابط أمن دولة سابق

بقى فيه محمد أبو العنين بتاع سيراميك كيوباترا اللي ف لحظة من اللحظات كان ممكن يقع لما اكتشفوا انه بيهرب فياجرا في شحن السيراميك بتاعته بس واحد من الشركة هو اللي شال القضية وطلع منها أبو العنين زي الشعرة م العجينة، وبقى عضو برلماني دولي كمان !!

ده غير المنظرين اللي زي د.علي الدين هلال عميد كلية الاقتصاد والعلوم السياسية الأسبق اللي كان نفسه يبقى وزير وقريب من السلطة، واللي لما بقى وزير شباب كان وزير فاشل، وشالوه على طول بعد ما مصر اتنيلت وماجابتش ولا صوت لما كانت متقدمة لتنظيم كاس العالم، وفازت عليها جنوب أفريقيا

وأسماء تانية كثيرة ممكن تبقوا تعرفوها لو فتحتوا أي جروب على الفيس بوك مكتوب فيه القائمة السودا لأن دول خلاص خلداهم التاريخ كناس خربوا مصر وقعدوا على تلها.

ومع تزايد الكلام بتاع ان جمال هو اللي عمل الفكر الجديد في الحزب، وهو اللي بيقود ثورة الإصلاحات بدأ الرفض حواليه يكبر من المثقفين الحقيقيين اللي ماباعوش ضمائرهم، ومن المحترمين اللي رفضوا ان بلدهم تبقى عزبة بتاعة عيلة

حسني مبارك اللي كان بيتكلم على ان مفيش حاجة اسمها توريث مع إنه كان بيعمل عكس كده هو وابنه والألايش بتوعه في كل خطوة أو قرار او قانون بيطلعوه.

في الفترة دي بابا اشتغل في جرنان الدستور اللي كان رئيس تحريره ومؤسسه هو عمو إبراهيم عيسى أبو يحيى وفاطمة، واللي كان من أقوى المعارضين لحسني مبارك ونظامه، وكان هو وكل شباب الصحفيين في الجرنان بيحاربوا التوريث وينشروا فضايح الحزب الوطني ووزارة الداخلية ورموز الفساد في مصر كلها، وبيتهموا بشكل مباشر الرئيس مبارك بيانه السبب. كانت السخرية أقوى أسلحة الجرنال اللي بدا أول عدد بافتاحية اسمها "استعنا على الشقا بالله"، وهو الجرنان اللي رسم فيه العبقرى عمرو سليم مبارك من قفاه وبقى بيتكلم عليه بمنتهى السخرية عشان ينتقم للشعب المصري منه، وكان عمو بلال فضل بيكتب فيه على اللي بيحصل في مصر وهو بيدي (قلمين) لكل الناس الي بيهدلونا ويهدلوا مصر مع كل مقال بيكتبه، أما المايسترو إبراهيم عيسى فكان الأكثر جسارة وقسوة، ولا ينسى أحد له مقاله التاريخي "إنك ميت" واللي فكر فيه الرئيس بيانه بني آدم، وانه هيموت زي الكل، وانه هيسأل عن الفساد اللي في عصره، وعن البلطجة وقلة الأدب

والسرقة والنهب اللبي وافق عليهم بسكوته .

كان ابراهيم عيسى على رأي هيكل مش جندي مشاه في الصحافة زيه) والكلام لهيكل)، وإنما قائد وحدة كوماندوز صحفية.

في الوقت ده الكلام بدأ يكثر والانتقادات بدأت تزيد وبدأت تظهر حركات احتجاجية زي حركة كفاية اللي كانت بتقول كفاية ذل وكفاية قهر وكفاية فساد والأهم من كل ده : كفاية مبارك.

وف مرة كان مبارك يفتح معرض الكتاب فوقف مثقف محترم هو د.محمد السيد سعيد الله يرحمه وقال ان البلد محتاجة إصلاحات، وإن الدستور لازم يتعدل، وان هو شخصياً معاه مشروع للتعديلات والمواد اللي محتاجة تعديل .

الراجل قال ده من هنا، والرئيس اتظربن من هنا، وقال له بمنتهى السخرية: الورقة دي تحطها في....جيبك!!

كان موقف مستفز فعلاً وخصوصاً لما كل الناس خرجت من اللقاء تحكيه لبعضها.

بس العجيب ان الرئيس خرج بعدها بكام أسبوع بمشروع تعديلات دستورية للمادة بتاعة رئيس الجمهورية وترشيحه

عشان تسمح بالانتخاب مش الاستفتاء، وبعد ما هلى حبة  
ناس من المستفيدين والمنافقين اكتشفنا ان المادة بتتعدل عشان  
تبقى على مقاس مرشح الحزب الوطني، واللى هو يا إما حسني  
مبارك نفسه واللى قال انه هيفضل يحكم مصر ما دام في الصدر  
قلب ينبض، يا إما ابنه من بعده، وربما ف حياته كمان

وف يوم الاستفتاء على المادة دي حصلت واحدة من أقدر  
عمليات وزارة الداخلية اللي استعانت ببلطجية ومسجلين خطر  
وشراشيع (راجعوا فيلم خالي فرنسا) عشان يعتدوا بالضرب  
والسب والشتم والتحرش الجنسي تحت رعاية ظباط وأمناء  
وزارة الداخلية عشان يهدلوا الناس اللي خرجت تتظاهر ضد  
التعديلات دي عند نقابة الصحفيين في شارع عبد الخالق  
ثروت.

كل الناس شافت ده بعينها، واتعرض ده على الفضائيات،  
وكل اللي اتبهدلوا وتم الاعتداء عليهم طلغوا ف جرايد  
وتليفزيونات وماحدث جابلهم حقهم

حتى البنات اللي تم التحرش بيهم واتقطعت هدومهم ما  
اتكلمتش عنهم ماما سوزان ولا عبرهم المجلس القومي للمرأة  
ولا حد جابلهم حقهم لغاية النهاردة.

في سنة ٢٠٠٥ الانتخابات البرلمانية اتزورت بطريقة فجة



وفضحت المستشارية فهي الزيني التزوير اللي حصل لصالح مصطفى الفقي مرشح الحزب الوطني والمفكر والكاتب وسكرتير الرئيس الأسبق للمعلومات، وخرج القضاة يطالبوا باستقلالهم، ومشوا في مظاهرات بعد ما تم الاعتداء على واحد منهم عن طريق الشرطة في مظاهرة من المظاهرات وبعد ما تم إحالة اثنين منهم للتحقيق

وفي الانتخابات الرئاسية كانت قمة المسخرة اللي حصلت لما نزل قصاد مبارك حبة كائنات حية تنسب إلى أحزاب المعارضة بينما هم كومبارس صامت دائماً، ويسمح لهم بالكلام في مناسبات محدودة

الوحيد اللي كان صوته عالي كان واحد اسمه أيمن نور هو اللي جاب نص مليون صوت في مواجهة مبارك في الانتخابات، وهو برضه اللي اتلفقته بعد كده قضية تزوير دخل بسببها السجن لأنه كان دائماً يقول انه الوصيف وانه يتحدى حسني مبارك وعاوز يناظره.

يا حبابي ده واحد من المترشحين الله يرحمه بقى كان لابس طربوش، وكان حزبه فاتح مدارس لتعليم الحلاقة وتفسير الأحلام، وهو اللي قال انه يتمنى ان حسني مبارك يكسب، وان هو شخصياً - لا قدر الله - لو كسب هيتنازل حسني مبارك

لأنه هو الأفضل!!!

وفي السنين اللي بعد كده كانت كل حاجة رايحة في سكة  
واحدة بس

سكة الندامة اللي هي سكة التوريث

بقى الفساد هو اللي بيحكم بالطول وبالعرض  
وسامبوكسات كمان

بجموعة جمال مبارك بقت في قمة الطغيان، والشرطة كانت  
في قمة الفساد، وبتعتمد على تعذيب الناس، وإرهابهم وتمير  
رسايل ليهم ان ماحدث هيحاسبهم أبداً أبداً

كان حسني مبارك ماحدث بيحاسبه، وجمال مبارك  
ومجموعته ماحدث عارف يلهمهم.

ده حتى الوزراء والمسئولين من رجال الأعمال كان معروف  
فسادهم، ومعروفة قضاياهم، ومع ذلك مستمرين ولا يحاكموا  
إلا لو غضب عليهم مبارك

كانت فترة صعبة بيخرج فيها جمال مبارك لسانه للكل،  
والصحافة القومية لعبت أقدر أدوارها وهي معلقة مشانق  
للمعارضين المحترمين وبتتهمهم بالعمالة أو بالغباء أو بالموالاة  
للإخوان المسلمين وكل الحاجات اللي بتثبت انهم بيكتبوا

بالريموت كترول، وان رؤساء التحرير الحقيقيين هما ظباط أمن الدولة اللي بيقولولهم يكتبوا إيه، ويشتموا مين، ويدوهم معلومات مضللة، ودورات في النيل من سمعة الشخصيات المحترمة.

حتى الأطفال لم يسلموا من بطش الناس دي، وأتباعهم في كل مكان.

يعني كانوا عاوزين يسقطوا بنت كبت في موضوع تعبير حاجات ضد مبارك لمجرد أنها كبت أنها لا تحبه رغم أنها طفلة، والموضوع ما اتحلش الا لما مبارك اتدخل، وغالب الموضوعات ما كانتش بتتحل الا لما حسني مبارك بيتدخل عشان بيان هو المنقذ والحلو والجميل اللي بيدي توجيهات واللي بيحب الناس بينما الحقيقة ان النظام المخوخ والفارغ لا يستطيع وزراؤه أن يتصرفوا في قضايا الرأي العام وقضايا أخرى كثيرة إلا بالرجوع إليه وموافقته سواء هو أو المحروس جمال مبارك أو الفاسدين اللي معينينهم في مراكز قيادية.

ده غير ان طفل صغير عذبه واحد من المخبرين وقتله من غير ما حد يحاسبه، والقضية اتنست بعد ما خدتلها كام يوم في الجرايد

بدأت فيديوهات التعذيب لظباط الشرطة وهما بيعذبوا ناس

ويصوروها بموبايلاتهم تنتشر وتفضح قلة الأدب والفساد في قطاع الشرطة على إيد المدونين ومستخدمي الإنترنت المرسين واللي بقو ييمثلوا قوة كبيرة في فضح الفساد وكتابة الحقيقة

بدأت الكوارث تزيد وتزيد

في قصر ثقافة بني سويف ونتيجة إهمال وزير الثقافة فاروق حسني وموظفيه، وأثناء عرض مسرحية من المسرحيات المسرح بلع وانحرق. ماكانش فيه معدات إطفاء حريق، وباب المسرح فقله واحد من الموظفين واختفى!!!

وكانت النتيجة ان عدد كبير من خيرة شباب ومبدعي ونقاد ومواطني مصر ماتوا محروقين، ولم يحاسب أحد حساب يشفي الغليل، ولم يقبل الرئيس استقالة فاروق حسني وزير الثقافة والمسئول سياسياً عن هذه المهزلة، وتمسك بيه.

وف عرض البحر عبارة غير مطابقة للمواصفات غرقت وغرقت معها ناس مصريين غلابة، وكانت التقارير كلها بتقول ان العبارة بايظة وماينفesch تشتغل ومع ذلك كانت بتخرج وتشيل أرواح ناس؛ لأن صاحبها عضو حزب وطني وعضو مجلس شورى ويرتبط بصداقة مع زكريا عزمي اللي هو دراع الرئيس اليمين جوة قصر الرئاسة وعضو الحزب الوطني

الشهير، وفي اليوم ده الرئيس راح يتفرج على ماتش مصر في  
كاس الأمم الأفريقية اللي اتلعبت على أرضها وماحدث عبر  
الناس اللي تم إنقاذهم وكان ماتش الكورة أهم من أرواح  
الناس

وعلى الأرض، وفي منطقة الدويقة اللي ساكنين فيها ناس في  
العشش تحت جنب المقطم الناس اتسحرت ونامت في  
رمضان.. بس ماصحيتش تاني يوم

ماصحيتش لأن صخور جبل المقطم اللي ياما بلغوا عنها انها  
مشروخة وماحدث عبرهم وقعت على نافوخهم وموتتهم مع  
عيالهم الصغيرين في الوقت اللي ظباط شرطة كانوا بيأجروا  
شقق في مشروع سكن سوزان مبارك اللي في المنطقة اللي هناك  
لحسابهم مع إن ناس تانية مش لاقية حتت تسكن فيها

حوادث الطرق كانت بتزيد من غير مبرر إلا الفساد وقلة  
الأدب بتاعة المسؤولين اللي كانوا مايقوموش بأدوارهم بضمير  
وما بيتقوش ربنا في الناس المسئولة منهم

مرة حصلت حادثة قطر فقالوا انها كانت بسبب جاموسة،  
ومن قبلها بسنين حريقة ولعت في قطر من قطارات الصعيد  
ومات ناس كتيرة وماحدث اتحاسب.

يوم بعد يوم كانت البلد بتسرق وتتهب والشرفا بيتهانوا  
أو بيتخطط للتخلص منهم بفكرة ما يدينهم أو التشكيك فيهم  
واغتيالهم معنوياً أو بتسليط ناس تانية عليهم يرفعوا قضايا  
ضدهم في كل مكان ويتحكم فيها عليهم بالحبس.

في الوقت نفسه مئات الأماكن في مصر أصبحت تسمى  
باسم مبارك وكان مصر أصبحت عزبته الخاصة يورثها لابنه  
لنجد مكتبة مبارك ومستشفى مبارك وأكاديمية مبارك ومدينة  
مبارك العلمية وكل شئ مبارك مبارك مبارك.. إضافة طبعاً إلى  
السيدة حرمه سوزان هانم اللي أصبح اسمها هي كمان على  
أكثر من منشأة في مصر، وعشان فعاليات كثيرة تحظى بدعم  
من الدولة ومؤسساتها لازم اسمها يكون عليها كراعية  
للموضوع.

البلد كانت بتتسرب من بين إيدين أهلها وماحدث  
عارف يعمل حاجة، وكان لابد من دم جديد للمعارضة بعد ما  
حركة كفاية بدأت تختفي ، وبعد ما حزب الغد اتدمر من  
الداخل.

بدأت تظهر حركات احتجاجية تانية زي حركة ٦ أبريل  
اللي دعت لإضراب نجح جداً وأظهر الدولة في صورة العاجزة  
وأخرج الداخلية اللي ماكانتش عارفة تعمل إيه .. مش معقول

هتزل الناس من بيوتها وتقول لهم امشوا في الشوارع الفاضية يعني، وفي نفس اليوم كان عمال المحلة مضربين وداخلين في صدمات شديدة مع الشرطة اللي سحلت منهم ناس كتيرة وحولت المحلة لما يشبه ساحات الحرب وسط تعقيم إعلامي شديد بأوامر مباشرة تثبت خرافة حرية التعبير في مصر.

مع مرور الوقت كانت كورة الثلج بتدحرج وتكبر أكثر واكثر والناس بتحصلها أزمات من الفساد اللي شايفاه في كل مكان. فانت سنين والوضع فساد في فساد. رجع واحد اسمه البرادعي من رحلته الطوية جداً في العمل كمدير عام للهيئة الدولية للطاقة الذرية، وحائز على جائزة نوبل وقلادة النيل وقال ان البلد محتاجة تغيير وإصلاحات حقيقية، ولمح إلى انه ممكن يرشح نفسه في انتخابات رياسة الجمهورية.

وعلى طول بدأت عمليات الاغتيال المعنوي للرجل عبر التشكيك فيه، في الصحف القومية، وترويج معلومات كاذبة عنه، وانتقاده بضرارة، ونسب الغزو الأمريكي للعراق ليه، وكان ناقص ينسبوله انه السبب في توسيع ثقب الأوزون

كانت عملية مفضوحة للتخلص والتشكيك في الراجل اللي بيمثل خطر حقيق على جمال مبارك وشلته، والبلد حصل فيها حراك وتغيير وحركات جديدة بعد عودة الراجل اللي ما

ينفعش أقيمه دلوقت تقييم شامل وعادل، وانما أكيد انتو  
هتقيموه لما تقرؤوا الكلام ده وتفهموه ان شاء الله.

في ٢٠١٠ كانت الدنيا في قمة البوظان.

كهربا بتقطع في بلد السد العالي .

فساد بيغيظ فينا.

بلطجية سياسيين ماسكين مصر وبيتصرفوا فيها كأنها  
مكتوبالهم في الميراث واحنا معاها، وشرطة فاسدة مابتراضاش  
تعترف بأخطاءها أبداً .

وف يوم من الأيام كان فيه ولد قاعد على كمبيوتر في نت  
كافيه في اسكندرية.

جم مخبرين من الشرطة ضربوه، وشدوه برة السايبر، ونزلوا  
فيه ضرب في مدخل العمارة اللي جنب المكان..

الولد ده شاب صغير اسمه خالد سعيد

ومن كتر الضرب والتعذيب.. مات.

قتلوه في ساعتها وحاولوا يخبوا الكارثة اللي عملوها زي ما  
خبوا كوارث كثيرة

بس الناس صعب عليها الولد جداً. نزلوا في مظاهرات



وتضامنوا مع الشهيد خالد سعيد وأمه وعيلته، وفضحوا الشرطة بنقل قضيته وجعلها قضية رأي عام على النت ومن بعدها في كل مكان.

في الوقت ده نشأت صفحة على الفيس بوك اسمها كلنا خالد سعيد عددها عدى ال ٢٥٠ ألف مشترك وكانت بتنقل قضية خالد وتجمع الناس حوالين رفض التعذيب وفضح الفساد والدعوة للتغيير والمطالبة بالقضاء على الفساد .

الشرطة كانت ماسمعتش عن حاجة اسمها برقع الحياء، ولذلك طلعا بيان قالوا ان خالد سعيد ده هارب من التجنيد، وانه ما اتقتلش، انما بلع لفاقة بانجو خنفته وهو بيهرب من الشرطة .. فمات!!!

بالبسطة دي كانت بتبوظ ١٠٠ قضية وتتطرمخ فمأحدش يعرفها حل، ولا حد يعرف يحط إيده على الجاني المعروف من كل الناس، فمرة الشرطة تطلع الجاني مختل عقلياً وانتحر، ومرة تطلع الجاني في حرايق كبيرة مجرد ماس كهربائي!!.

الصحافة القومية الفاجرة برضه ما سكتتس ولا كانت بتسكت في القضايا اللي من النوع ده..يعني في قضية خالد سعيد روجت لكلام الشرطة، وواحد من الوجوه المكروهة والمتلونة والحقيرة في الصحافة القومية كتب مقال قال فيه ان

كل المظاهرات اللي بتحصل دي بسبب (حشاش)!!!

قتلوا الولد أكثر من مرة، وفضلوا يقتلوا فيه حتى بعد ما مات وتقرير الطبيب الشرعي طلع تقرير مابع ما يدينش حد خالص.

كانت القضية رايحة لنفس السكة اللي بتروحلها كل القضايا المشابهة لما بتقيد ضد مجهور أو بتقلب المجني عليه لجاني. ما حدش كان عارف يجب حق الولد خالص رغم البلاغات والعالم كله اللي اتكلم عن القضية، بس الشباب رفضوا ده، وأثاروا القضية للدرجة اللي خلت من المستحيل تجاهلها بعد ما عرفوا مين المخبرين اللي قتلوا خالد سعيد، واتفعت ضدهم قضية منظورة لغاية لحظة كتابة السطور دي. بدأت الناس تفوق، وبدأ الشباب يحطوا أنفسهم مكان الولد الجميل المحترم اللي بيحب المزيكا، واللي ممكن يكونوا مكانه في يوم من الأيام في مواجهة فساد يحول المجني عليه لجاني، والمقتول لقاتل، والمظلوم لظالم، وخارج على القانون. وفي آخر السنة حصلت الانتخابات البرلمانية.

حصلت بفجر كبير، وتزوير ماسبقلوش مثيل من رجالة جمال مبارك، والناس لقيت نفس الناس الفاسدة، ونفس الوشوش المكروهة هي اللي مفروضة عليها.

نفس الحرامية هما اللي داخلين مجلس اشعب رغم تأكيد مبارك انها هتتم بشكل نزيه وضمانته الشخصية للتراهه دي.

إنما ضمانه مين يا عم. التزوير كان عيني عينك، والأحكام القضائية اللي صدرت بإيقاف الانتخابات في أكثر من دائرة لم تنفذ، وتقفيل اللجان بمساعدة البلطجية والشرطة اللي استعانت بيهم متصور صوت وصورة ومع ذلك ماحدث محترم في السطة أو في قصر الرئاسة لفت نظره اللي بيحصل؛ لأن أكيد الناس دي ماكانتش بتتصرف من دماغها، وإنما بتعليمات جاية من قصر الرئاسة، وتحديدًا من حسني مبارك.

ومع دقائق ساعة أول يوم في السنة الجديدة ٢٠١١ حصل تفجير عند كنيسة القديسين في اسكندرية، وماتت ناس كتيرة أقباط ومسلمين، وكان الموضوع اللي يغيظ ان مفيش تأمين للكنيسة رغم تهديدات قبلها بأعمال إرهابية في مصر ضد الكنايس.

تخيلوا لما ده يحصل بالشكل ده ممكن يتسمى إيه..

أكيد تواطؤ وإهمال وفساد وقلة أدب كمان.

ومع التحقيق مع ناس كتيرة أمن الدولة قتل واحد كمان أثناء التحقيق معاه هو سيد بلال اللي خدوه مقر لأمن الدولة

سليم ورجعوه ميت.

واتكرر سيناريو خالد سعيد، بس المرة دي كان من الصعب انهم يقولوا عليه بلع لفاقة بانجو لأنه كان من الجماعة السلفية ومشهور بتدينه الشديد، وماحدث اتكلم من الداخلية اللي ضغطت على مصلحة الطب الشرعي عشان تطلع تقرير يفيد ان سيد بلال لم يموت من التعذيب.

في الوقت ده الناس في تونس كانوا ثاروا بعد ما حرق واحد من التوانسة اسمه بوعزيزي نفسه بسبب العيشة المرة، والشرطية اللي صفعته على وشه، وقام الناس في تونس بمظاهرات في كل مكان.

مظاهرات ما وقفتش الا لما شالت راس الأفعى

الرئيس زين العابدين بن علي

ولأن ديول النظام بتاعنا كانت خايفة جداً، ولأن الراجل الكبير في مصر كان مغرور بما فيه الكفاية، فالمحللين والصحفيين والمنظرين والمسئولين فضلوا ماسكين على كلمة واحدة

مصر مش زي تونس .. مصر مش زي تونس

واللي حصل في تونس عمره ما هيحصل في مصر

كانوا خايفين وواقين في الوقت نفسه ان مبارك عمره ما

هيمشي أو يخرج بإرادة الشعب غضب عنه

والكلام ده كان بيستفز الناس زيادة

وكانت كل حاجة على وشك الانفجار بجد

بدأت ناس عادية جداً من اللي حست بالظلم تفقد الأمل،  
وأكثر من واحد راحو ولعوا في نفسهم عند مجلس الشعب وفي  
أماكن تانية.

وفي النص الثاني من يناير جروب كلنا خالد سعيد مع  
جروب ٦ أبريل مع جروب الجمعية الوطنية للتغيير اللي  
البرادعي أبرز رموزها، إضافة لناس معارضين وناشطين على  
النت دعوا لمظاهرات غضب سموها ثورة يوم ٢٥ يناير وكانت  
بتطالب بالعيش والحرية والكرامة الإنسانية.

كنت واحد من الناس اللي كفروا بالمظاهرات نفسها لأنها  
ما بتغيرش حاجة، ولأن الوشوش اللي بتترها كل مرة معروفة،  
والنتيجة معروفة.

كام واحد هيتزلوا ويتضربوا ويرجعوا بيوتهم وولا حاجة  
هتتغير، وكنت واحد من اللي اتريقوا على الدعوات اللي  
كانت بتوصلني عشان الثورة لأني كنت رافض انها تتسمى  
ثورة بأي حال من الأحوال، ومفيش ثورة بتتحدد على عينك

يا تاجر بمواعيدها، وأماكن الخروج، وأسماء وأرقام تليفونات  
قادتها كمان، والمنسقين المسئولين عنها.

ده غير ان كلمة مظاهرات هي الأنسب لأنها مش هتوصل  
خالص لمرتبة الثورة.

كنت دائماً بقول وقتها ان لازم الموضوع يدار بذكاء أكبر،  
وان من حقي اتريق والناس تسيبني أتريق؛ لأني ما قلتش لحد ما  
يتزلش، وبالتالي أنا حر في رأيي. الموضوع ده خسرتي ناس من  
اللي ما قبلوش رأيي رغم ان اختلافي كان على المسمى والطريقة  
مش الهدف اللي كلنا نفسنا فيه، واللي كنت واحد من اللي  
كتبوا عنه كتب ومقالات.

ومع ذلك تزلت

أنا صحيح كنت بتريق

بس ما كنتش بتريق على الناس.. كنت بتريق على التنظيم.

ما كنتش بتريق ع المبدأ.. كنت بتريق ع المسميات.

ما كنتش بتريق على المحترمين.. كنت بتريق على كل واحد  
حب يقسمنا نصين.

نص وطني وهو ده اللي هيتزل، ونص مش وطني لأنه مش

هيتزل

كلنا في الهم سواء

وكلنا في مصر واحد

ومع ذلك نزلت

يوم ٢٥ يناير لقتني بانزل شبرا...، واشوف الناس واهتف

معاهم

روحت بدري لأنك يا عمر انت وتقى كنتم محتاجين اني

ابقى معاكم في يوم مختلف بالنسبة لكم

يوم عيد ميلادكم

لا هو يوم عيد ميلادك صحيح يا عمر، ولا عيد ميلادك يا

تقى بس حبيت انا وماما نعمله ف يوم بين المعادين عشان انتو

الاتنين تفرحوا

فاكر كويس لما كنت بتضحك يا عمر وكنت ببقى

مبسوط أوي أوي، وفاكر كمان انك كنتي مستغربة يا تقى

بسبب صغر سنك لأنك كنتي لسة مكملة سنة مافاتش كام

يوم، وكنتي مش فاهمة حاجة خالص.

وفاكر اني في نفس اليوم كنت باتصل كل شوية بصديقي

عمو محمد حسين أو يتصل بيا عشان يقولي أخبار المظاهرات

في المطرية قبل ما يبجي هو كمان يحضر عيد ميلادكم

ولما اتصلت مرة أو اثنين بالدستور عشان انقلهم أخبار  
حسيت ان ده اعتذار على عدم تقييم الأمور بالصورة  
الصحيحة، وان عمر الاعتذار ده ما هيكمل الا لو نزلت يوم  
الجمعة ٢٨ يناير.

مهما حصل هتزل

وحتشاهد قبل ما انزل، واوصي مراتي بعيالي، واوصي أهلي  
تمراتي وباقي العيلة

ولما الداخلية استخدمت غيابها المفرد يوم التلات بالليل  
وضربت الناس اللي تظاهرت في اليوم ده واعتقلت منهم ناس  
كثيرة

ولما اتقطعت الموبايلات، ووقفت خدمات النت والفيس  
بوك وكل حاجة عرفت ان اللي هيتزل هيتطحن، بس اللي  
هيكمل..هيكسب، وقد كان

يوم الجمعة الموافق ٢٨ يناير ٢٠١١ واللي انا بعتبره يوم  
الثورة الحقيقي كانت عندي مشكلة هي باختصار:

هصلي الجمعة فين ؟

أصلي في مسجد الاستقامة في ميدانالجيزة واللي عرفت ان  
البرادعي هيصلي فيه مع الحركة الوطنية للتغيير وابراهيم عيسى



وأسماء الغزالي حرب

والا أروح مسجد مصطفى محمود اللي هتنتلق منه  
المسيرات للتحرير في وجود ناس كتيرة برضه.

والا أروح مسجد عمر مكرم اللي في التحرير نفسه عشان  
ابقى هناك من الأول

لغاية ما نزلت من بيت جدو وتيتا في الشراية ماكتش  
عارف

ليست الكوتشي، والبنطلون الجيتز، وقلت ان النهاردة يوم  
مناسب جداً لرياضة الجري، واني هتعلم النهاردة اختراق  
الضاحية من كل ناحية من كتر عمليات الكر والفر اللي  
الواحد هيخش فيها مع الأمن المركزي

خدت تاكسي من الشراية وانا بقول له " ميدان الجيزة".

واحنا على أكتوبر لقتني بقول له : "ممكن نروح نشوف  
مصطفى محمود الأول"

واحنا في جامعة الدول لقتني بقول له نزلي هنا. الأذان كان  
أذن، والناس كتيرة هناك بأعلام ولافتات.

شفت تقريباً كل الشباب اللي كنت عارف وحاسس  
ومتأكد اني حشوفهم هناك. شفت نوارة نجم وهي بتقول

للبيض على فكرة مش حرام اتنا نصلي بالجزمة  
شفت فنانيين وأدباء وصحفيين وقوى وطنية.

شفت من الفنانين خالد يوسف وخالد النبوي ومحمد العدل  
وتامر حبيب وآسر ياسين وخالد الصاوي وجيهان فاضل  
وغيرهم وغيرهم

شفت من شباب جيلي من الكتاب والأدباء محمد صلاح  
العزب وأيمن مسعود ومحمد عز الدين واحمد عبد الجواد ومحمد  
مصطفى وغيرهم وغيرهم.

قابلت عم حمدي عبد الرحيم اللي كان عامل لسة عملية  
في عينه، واللي أصر انه يتزل رغم خطر القنابل المسيلة للدموع  
على العملية.

شفت ناس كبيرة في السن، وشفت أطفال مع أهاليهم،  
وناس غنية، وناس فقرها طابع عليها العزة.

شفت شباب من كل الطبقات، وبنات محجة، ومنتقبة،  
ومتبرجة على رأي البعض.

شفت بنات كانوا مغطيين جسمهم كله، وبنات كانوا  
متحررات جداً للدرجة اني متأكد لو كانوا نزلوا لوحدهم في  
يوم تاني كانوا أكيد.. أكيد هيتعرضوا للتحرش

والغريب ان ما حلتش لمسهم، وكان فيه احترام فظيع ليهم  
والكل كان موحد هدفه، ومش فاضي يبص لأي شئ ثاني.  
وبدأت الخطبة.

الخطبة كانت غريبة جداً، والأجواء بمجرد بدايتها كانت  
أغرب

الراجل الخطيب قال: "في البداية وقبل أن أدخل إلى  
موضوع خطبتنا اليوم أريد أن أنبه على شئ هام جداً احتراماً  
لهذه الشعيرة"

عقلنا بدأ يودي ويحيب، بس الراجل راح قايل أجدع إفيه  
حصل في اليوم ده

" أرجو من الجميع....."

أبوة

" أرجو من الجميع إغلاق أجهزة المحمول"

كل الناس ضحكت وسقفت لأن المحمول كان مقطوع  
أصلاً عن مصر كلها.

الخطبة كان فيها كلام متناقض

كلام يخلى الناس تسقف أوي للخطيب

وكلام يخلي الناس تضرب كف بكف

وماحدث كان عارف الراجل ده مع مين بالظبط

بمجرد ما اتقال السلام عليكم ورحمة الله سمعنا أول (تحيا

مصر)

هتافات كثيرة بدأت ترج الميدان، والأمن المركزي كان

مرعوب في هذا اليوم بشدة، وحتى قيادات الداخلية كان يبدو

عليها الهلع الشديد

كل الهتافات كانت تروح وتيجي وتستقر على هتاف واحد

بس

"الشعب..يريد..إسقاط النظام"

فضلنا نتجمع ونراوغ الأمن المركزي اللي كان بيحاول

يطوقنا

ذهبنا من قدام الجامع إلى شارع جامعة الدول العربية

اتحركنا بعدها على شارع البطل أحمد عبد العزيز والناس

كلها بتهتف ويقولوا للناس اللي بتفرج علينا من الشبايبك

والبلكنات: " يا أهالينا انضموا لينا".

فضلت اقابل كل اصحابي وزمائي والناس اللي بجههم

لقت نظري جداً ست في الخمسينيات من عمرها أول ما  
تشوفها لازم تفكرك بأملك على طول  
كانت عمالة تجري وفرحانة وهي بتقول " يا الله.. يا الله..  
يا الله.. يا الله"

ولا أجدعها شابة في العشرين من عمرها  
بعض الأهالي كانوا جايين عيالهم معاهم  
السلفيين اللي قال شيونخهم انهم مش هيشاركوا كان منهم  
ناس كتيرة انشقوا عن قرار الجماعة السلفية وبعض شيوخها  
الذين يتعاملون معهم بمنطق الباباوات.  
مسيحين كمان كانوا موجودين ومطنشين نصيحة البابا  
للأقباط "خليكم في بيوتكم واقعدوا ادعوا من أجل مصر".  
في شارع البطل أحمد عبد العزيز كانت المسيرات على مدد  
الشوف

تبص ورا تلاقي ناس، وتبص قدام تلاقي ناس والكل بيهتف  
"الشعب.. يريد.. إسقاط النظام"

"يا جمال قول لابوك.. شعب مصر بيكرهوك"

"إرحل إرحل يا مبارك.. السعودية في انتظارك"

كان فيه تصميم شديد جداً في عيون الكل

عزيمة عمري ما شفتها ولا تخيلت انها تكون موجودة عند

كل الناس دي

عزيمة ناس فعلاً صبروا كثير وحت لحظة "الحليم إذا غضب"

واللي ياما قلنا "اتقوا شره" ..

لحظة "الجمال" الذين صبروا ٣٠ عاماً زي ما قال البعض

الناس كانت منظمة لدرجة رهية

كانوا أكيد متفاظين من كلام حد زي الراجل الأمنجي

الأقرع اللي اسمه أسامة سرايا رئيس تحرير الأهرام اللي قال

دول ٢٠٠٠ أو ٣٠٠٠ واحد مايعبروش عن الشعب المصري،

أو ننوس عين جمال مبارك وشلتة وأشهر شرشوح في الوسط

الصحفي واللي اسمه عبد الله كمال اللي طلع يقول ان الناس

دي مدفوعة من الإخوان وبينظموهم جهات خارجية، أو

الكفيف سياسياً المعاق شعبياً اللي اسمه د.علي الدين هلال اللي

خسر تاريخه ومستقبله عشان يعيش فترة من حياته خدام

للسلطة، وهو بيهون من الناس ويقول دول ولا حاجة جنب

شعب مصر، أو القواد الشهر اللي اسمه صفوت الشريف اللي

الأغبيا مالفوش غيره عشان يتكلم ويحاول يهدي الناس في

التليفزيونات فراح مهيجهم زيادة.

كانت كل الناس رايجة تسقط النظام.. يجد مش هزار،  
وكنت من الناس اللي متوقعين ان الدنيا النهاردة هتولع، وان  
الدم ممكن يكون للركب، وان اليوم ده هيقى يوم تاريخي  
وهيفضل عند كل الناس مرتبط بمذبة أو بإسقاط نظام رغم ان  
بعض الناس من حسني النوايا قالوا ان الداخلية مش هتكرر غباء  
يوم الثلاثاء، وھتتعامل بحكمة عشان تعدي الأمور على خير،  
وطبعاً الكلام ده كان خيال علمي

فضلنا ماشين لغاية قرب الدقي

ثم بدأت القنابل المسيلة للدموع تستقبلنا

أول مرة أتعرض لها

عينك بتحرقك جداً

بيحصلك تهيج في الجهاز التنفسي

احتقان شديد في الجيوب الأنفية

صدرك يعلو ويهبط وأنت تبحث عن هواء تستنشقه

غسيل الماء غير مفيد

والخل بالنسبة لي كان مقرف وغير فعال

الحل العبقري كان البيسي

رحت اشترت بيبي وبقيت اغسل وشي وادعك عيني بيه  
بصراحة كان عبقري فعلاً

والناس المحترمة بدأت تجيب من السوبر ماركت اللي يلاقوه  
في سكتهم علب بيبي كتيرة جداً، ويزعوا على  
المظاهرين، واللي معاه ماكانش بيستخسر في اللي مش معاه

كله في اليوم ده كان يساعد بعضه

فضلنا مكملين لغاية شارع الدقي والأمن يتراجع

وصلنا لشارع التحرير والأمن يتراجع

لغاية ما سد الميدان عند شيراتون وقسم العجوزة

عربات الأمن المركزي منعت حد يمر وبدأت إطلاق

مكثف للقنابل المسيلة للدموع

شي أشبه بما تراه من قوات الاحتلال الإسرائيلي في قمع

الفلسطينيين.

وكان كل ما حد..هه..حد واحد بس كان يقول يالا

نضربهم، كان يلاقي كل اللي حواليه يصرخ

ويقول: "سلمية..سلمية..سلمية..سلمية"



مفیش لفظ خارج اتقال

مفیش حد ضایق حد

القنابل كانت بتزید رغم ان فيه بترینه قریة انما ماحدث من  
الداخلیة خالص فکر ولو للحظة فی سلامة أو أمن أي بنی آدم  
منا أو حتی من اللی قاعدین فی بیوتهم فی المنطقة المحیطة

كانوا فعلاً فی منتهی التهور والهمجیة والقذارة

ثم بدأت مرحلة الغبارة بإطلاق رصاصات مطاطیة

وشفنا فی اللحظة دى ناس كثیرة سايح دمها وجایة من  
الصفوف الأمامیة

وابتدا الموضوع یسخن أكثر وأكثر لغایة ما قبله جت فی  
بلکونة وولعت

الناس هاجت زیادة، وخصوصاً اننا عارفین کویس ان  
الإعلام هیصور المتظاهرن وكان هما اللی ولعوا فی البلکونة،  
ویقول علیهم مخربین

بعدها بدأ یقی فیہ کر وفر

بدأ یقی فیہ ناس ماسكة میکروفون هی اللی بتنظم  
المتأفات

بدأ هتاف جديد يقى موجود هز الناس كلها

"الله أكبر.. الله أكبر"

وبعدين بدأ هتاف تاني يعلى ويحمس الناس زيادة

"يااا رب.. يااا رب"

وبعدين لقيت خالد الصاوي من ضمن الناس اللي بتهتف

عمل هتافه الخاص بيه واللي الناس بدأت تردده وراه بعد ما

الضرب بدأ يزيد

"اضرب بمبة اضرب غاز.. احنا نزلنا وانتو خلاص"

ناس كثير رددت.. بس الكل رجع تاني للشعار الرسمي

للمظاهرة

"الشعب .. يريد.. إسقاط النظام"

بعد حبة من الشد والجذب والتعب الشديد، وبعد ما ظننا

اننا مش هنعدي أكثر من كده مهما حصل.. جاء المدد

ناس كثير جداً كانت جاية من ميدان الجيزة التحمت

بالمظاهرة اللي انطلقت من مصطفى محمود، وده أدى حماس

شديد للكل، وحض الأمن أكثر

بعد شوية الدنيا اتفتحت

مش عارف بالظبط إيه اللي فتحها بس كل اللي شفته كان  
مشجع جداً ومخيف في نفس الوقت

عند الشيراتون الناس كانت بتتهف لبتوع الأمن المركزي  
اللي هناك لأن الظابط قال بصوت عالي "ماحدش يضرب"

الناس بدأت تمثفلهم وتحبهم

والظابط الثاني اللي كان قاعد في المدرعة كان مرتبك

ساعات يحس انهم هيضربوه، وساعات يحس انهم بيحيوه.

إيده كانت مترددة بين إنه يطلع سلاحه أو إنه يشاور للناس  
ويشكرهم

كان منظر غريب جداً، وأظن ان الظباط دول مش هينسوا  
أبدأ تعامل الناس المتحضر معاهم.

مشينا ولقينا قبل محطة الأوبرا ٤ عربيات أمن مركزي

بتوعنا

آه بتوعنا

الناس طلعت فوقهم وظباطها هربوا وسابوا العساكر  
الغلابة جواها لايصين

كان أول مرة ف حياتي أشوف عربية أمن مركزي من اللي

كانت بترعب زمان مكتوب عليها كفاية، و يسقط حسني مبارك، والشعب يريد إسقاط النظام، وسلمية سلمية

الناس جوة المظاهرة كانت فرحانة وبترقص على العربية وهي رافعة علم مصر وكان مصر اتحررت فعلاً

فيه ناس راحوا جابوا ظابط برتبة نقيب من إيده وقالوله تعالى استلم العرييات "عشان ما حدش يقول اننا خربناها"، و"ما تخافش مش هنعملك حاجة" والنقيب كان ماشي ووشه في الأرض

عند مدخل الأوبرا من ناحية كوبري قصر النيل بدأ الغباء الحقيقي حين بدأ الأمن في استخدام الرصاص والخراطيش ناس كتيرة ماتت في اليوم ده

الإسعاف كانت بتيجي تشيل الشباب الغلابة اللي اتصابوا أو اتقتلوا

انما المنظر اللي مش هنساه واحد كان مضروب في رجله وف أماكن متفرقة من جسمه اللي جايب كله دم واصحابه شايلينه على عربية الإسعاف وهو مصمم يكمل الهتاف

الشعب.. يريد.. إسقاط النظام

القنابل بدأت تزيد، والرصاص بقى أزيد، والجرحى والقتلى

بقوا يزيدوا أكثر وأكثر، والمصيبة ان عربيات الأمن المركزي كانت بتدوس على الناس متعمدة انها تقتلهم، ومات فعلاً ناس كثير مدهوسين تحت عربيات الشرطة، ومع مرور الوقت بدأت رغبة في المقاومة الشرسة والانتقام تتولد عند الناس، وبدأ عدد من الطباط والعساكر اللي كانوا قريين من المتظاهرين وفي أماكن خدمة تانية بعيدة عن المظاهرة يلبسوا سويترات عشان يحبوا انهم طباط وأمناء شرطة خوفاً من المتظاهرين اللي بدأ بعضهم يقول ان المظاهرة كده مش هتبقى سلمية بعد الناس اللي اتقتلت.

ساعتها شفت نوع جديد من الناس بدأ يقى موجود ويفرض كلمته.

ناس وصلوا عشان يزودوا المدد ويلهبوا المظاهرات ويحسسوا الشرطة انهم ند ليهم، وان مش معنى ان الشرطة ماسكة بنادق وبتضرب رصاص انهم أقوى وان المتظاهرين ضعاف.

الناس اللي ساكنين في مناطق شعبية وعارفين أصول الخناقات ودمهم حامي وكرامتهم زي كرامتنا جميعاً غالية عليهم لأنهم مايمتلكوش غيرها

كل دول بدؤوا في التحول، وقالوا ان اللي هيتعرضلهم من

وبدأت دعوات البعض للرد على العنف بالعنف عن طريق

الطوب

بس الناس كانت بتهديهم، والرصاص أكثر من قدرتنا على  
وصفه، والقنابل المسيلة للدموع بدأت تعيني شخصياً بجد مش  
مبالغة

بقيت مش شايف حاجة غير ناس بتجري من مدرعات  
وعربات وقنابل بدأت تدخل على كوبري قصر النيل وتمنع  
الناس كلها من إنها تتقدم لميدان التحرير باستماتة

كانوا لما يرموا علينا القنابل ناس تمسكها وترميها عليهم تاني  
أو يرموها في النيل اللي تقريباً ما كانش فيه ولا مركب في  
اليوم ده، وكان النيل حب يبقى شاهد على ما يحدث دون  
إزعاج

دخلنا على الجزيرة وشارع سراي الجزيرة وشارع محمد  
عبد الوهاب، ومنين مامشينا كانت ناس كثير بتنضم لينا

مش عارفين منين بس عارفين انهم مننا مش علينا

علم مصر كان في كل حته ولا كأننا في نهائي كأس الأمم

فضلنا ماشين للزمالك

انضم للكل ناس نازلة من كوبري ١٥ مايو، وبدأت مصر  
تبقى عبارة عن سحابة دخان من كتر القنابل اللي على كل  
كوبري ومنفذ عليه متظاهرين

دخلنا الزمالك ولسة الناس بتزيد

طلعنا كوبري ١٥ مايو من عند العجوزة كانوا مستنيين  
بمئات العساكر وبدأ الضرب بين الطرفين والقنابل بتزيد

كنت تعبت جداً وبدأت فعلاً في الاختناق

وكان مهم بالنسبة لي أطمئن مراتي وولادي وعيلتي لأني  
ماكتش عارف إيه اللي بيتداع في التلفزيون وكانوا كلهم  
ميتين من القلق

أخيراً لقيت عربية شاورتلها وكان راكب فيها ناس وقتلهم  
ودوني أي حنة

الطرق كانت غريبة

وفي العربية عرفت ان مصر كلها خرجت

امبابه خرجت وشارع السودان خرج والكورنيش خرج  
وشيرا المظلات والخلفاوي عند جامع الخازندار.. كل الناس  
كانت برة بتهتف وبتواجه الشرطة

مش بس كده.. ده في نفس الوقت الناس خرجت في كل

محافظات مصر يقولوا كلمة واحدة

"الشعب .. يرد.. إسقاط النظام"

أخيراً لقيت مسترال وعرفت اني بقيت في امبابه في شارع  
اسمه ترعة السواحل

اتكلمت في البيت ولقيت الكل مرعوب فعلاً والصورة اللي  
بتنقل على الفضائيات والتليفزيونات مرعبة لأي حد بيتابع ،  
بس الكل خلاص أدرك انها ثورة

مصر كلها في ثورة حقيقية

الثورة اللي كنت رافض أسميها ثورة بقت ثورة فعلاً

كل الناس خرجت

صحيح لما رجعت الشراية كان مع بداية حظر التجوال  
اللي اضطر الرئيس انه يفرضه بعد ما نزل الجيش للشوارع  
وانسحبت قوات الشرطة وكأنها فص ملح وداب. إنما الساعات  
اللي بعد كده كانت الأمور بتطور فيها بسرعة منحلة في سكة  
انتصار الناس والثورة

الموضوع بدأ بعرييات الأمن المركزي والشرطة اللي تم  
إحراقها



وقرر مبارك انه يتزل الجيش ويفرض حظر تجوال، والناس  
استقبلت الجيش المصري المحترم اللي شايل علم مصر بمنتهى  
الحفاوة والاحترام بعد ما انسحبت الشرطة بطريقة فوضوية  
جداً

وبدا الانتقام

لم يبدأ ممن خرجوا من الثوار ، وأقسم على ذلك، وإنما بدأ  
من كل الناس اللي ليهم تار مع النظام في الأماكن العشوائية  
وأماكن تانية كثيرة جداً في مصر

بدأ تدمير أقسام الشرطة في كل مكان، ومقر الحزب الوطني  
الرئيسي على كورنيش النيل، وهو ده المكان الوحيد اللي انا  
متأكد ان فيه ثوار شاركوا في إحراقه

كانوا بيكسروا ويدمروا الرمز والعقدة اللي جواهرهم

الحزب الوطني كان لازم فعلاً يتحرق بالشكل ده وفي  
التوقيت ده

صحيح حزين على مكتبة المجلس الأعلى للصحافة اللي  
كنت بروح فيها أعمل أبحاث وانا طالب، بس الحزب الوطني  
كان طاغوت، والشرطة كانت سرطان ما ينفعش معاه أي  
علاج كيماوي، وكان لازم يستأصل

كانوا لازم ينكسروا في اليوم ده وبعدها كمان عشان لما  
بيجي حد فيهم يضرب حد تاني بالقلم يفكر ان ممكن القلم  
ده يقوم شعب بحاله، ولما بيجي حد فيهم يظلم بني آدم أو  
يعذبه يعرف ان الانتقام قريب منه جداً " ولكم في القصص  
حياة".

كل ده كان كويس

انما اللي مش كويس بجد: هو ظهور الغوغاء

الموضوع بدأ بشباب مثقف وواعي انضم له ناس كتيرة من  
أماكن وتوجهات مختلفة لكن كل دول كانوا محترمين

اللي ماكانوش محترمين هما الغوغاء اللي دخلوا بعد كده

بقت فجأة ثورة العيال السيس والشبيحة والحرامية  
والبطحية بعيداً عن ميدان التحرير

بدأ المستفيدين يظهروا عشان يقلبوا عيشتهم، وبدأت البلد  
تدفع تمن ان ماحدثش كان بيعبر الناس دي ولا بيحاول  
يساعدها أو يغير حياتها للأحسن

الموضوع كان باين جداً في مول أركاديا اللي اتنهب هو  
وكارفور المعادي، انما أكيد كان أكثر من كده في أماكن تانية  
كثير لقت نفسها بتنهب باسم الثورة.

كانت في اللحظة دي ثورة جياع

حاجة زي اللي عملها بلال فضل ف فيلم سيد العاطفي  
والناس قالتله ان ده عمره ما يحصل في مصر

حاجة مرعبة فعلاً

في وسط كل ده لقتني أسير لقناة الجزيرة والعربية والي بي  
سي والحرّة، ولقتني بحتقر فعلاً الإعلام المصري وبحتقر أنس  
الفتي وزير الإعلام المضلل وكاره لكل حاجة ليها صفة الرسمية  
وكان السؤال هو الراجل اللي اسمه حسني مبارك ده هيتكلم  
إمتي

هيطلع إمتي من الغيوبة اللي هو فيها

حس فعلاً والا لسة بيكابّر والأضيّشه بيقلوا له انما قلة

مندسة

والغريب انه طلع بالليل

بعد الساعة ١٢.. كأنه طالع في حفلة ميدنايت، ودي  
كانت نهاية اليوم الدرامية بالكلام التافه اللي قاله عن طلبه  
تقدم الحكومة لاستقالتها (ما قالش حتى انه أقالها)، وانه هيعمل  
بعض التغييرات، والمخدر الموضوعي اياه اللي الناس خلاص  
ما بقتش تصدقه.

الناس ما حستش في كلامه أي جديد، ولا أي صدق، ولا  
أي شعور بالمسئولية الحقيقية

وبدأ سقف مطالبها يرتفع. الراجل ده لازم يمشي.

ولقتني بسأل نفسي سؤال مهم جداً

هو الراجل ده لو كان طلع بالنوق من غير ثورة، ومن غير  
غضب، ولو كان سمع الكلام اللي صوتنا اتبج فيه في الدستور  
والجرايد الشريفة والمعارضة اللي بحق وحققي وعين عمر  
سليمان فعلاً نائب ليه من قبلها لما كان كارت محترم مش  
كارت محروق زي ما أثبتت الأيام وزى ما دمر هو نفسه. لو  
كان حسني مبارك ده غير الوزارة الفاشلة بتاعة نظيف اللي  
خرها وقعد على تلها وفضلنا نشتكى منها وهو يعاند ويقول  
انها أنجح الوزارات في تاريخ مصر. لو كان احترمنا واحترم  
نفسه وتاريخه وفكر يحاسب الوزرا رجال الأعمال اللي ريجتهم  
فاحت وخنقت البلد كلها.. بالذمة مش كنا هنحترمه شوية

هنغفر له شوية

هنعتبره عمل حاجة عدلة كويسة تسييلنا ذكرى كويسة  
كل ما نفتكره.

إنما إيه البطي ده.. إيه هذا القدر من النطاعة والتلكو والمشي

على قشر البيض

وعلى كل أهو حصل اللي حصل

بس تفتكر الناس هتفوق أكثر وتفضل تطالب بالمزيد والا  
هتسكت وتبطل من البنج المضروب اللي هو قاله

ده حتى رد فعله كان مخيب للآمال

الدنيا بتبوظ وبتحرق وهو طالع متأخر وطالع مايقولش  
كلام مهم زي اللي قاله اليوم اللي بعده بإنه هيعين نائب  
ويجيب الفريق أحمد شفيق رئيس وزراء بدل نظيف

للدرجة دي فيه صمم سياسي عن مطالب الناس عند

المستولين

للدرجة دي معاقين سياسياً

كنت بستغرب جداً

انما اللي استغربته أكثر حصل في الأيام اللي بعد كده

حصل لما الناس فضلت في التحرير صامدة مالهش غير

مطلب واحد

ارحل يا مبارك

فضلت صامدة رغم محاولات ناس كتيرة تصويرهم وكأنهم

عملاء، ورغم خطة الشرطة اللي استخبت وانسحبت انهم يعملوا إرهاب للناس في فترات حظر التجول، وانهم يضربوا رصاص في الهوا يفزعوا بيه الناس ويخوفوهم في بيوتهم، ويفتحوا السجون للمساجين يطلقوهم برة السجن ع الناس، وكانهم عاوزين الفوضى تحصل فيروح بعض الغلابة مستنجدين بيهم في مقابل عداوة لأي حد يردد أفكار الثورة.

وللأسف الشديد فيه ألعاب قنرة اتلعبت في الوقت ده.

المساجين اتربوا من السجون وطلقوهم على الناس، وحصل تخويف للناس وتهديد غير مباشر ليهم بانهم لازم يحافظوا على نفسهم ويواجهوا البلطجية وقاتلين القتلى.

كانوا بيحاولوا يوظوا أعصابنا يا عمر، ويخوفونا ويحسسونا ان الرعب اللي الناس بقت فيه بسبب المظاهرات، وان الناس اللي في التحرير لو رجعت بيوتها وبطلت الكلام اللي بتقوله الأمان والاستقرار هيرجعوا تاني على طول.

فيه أقدر من كده؟؟

بس الناس الواعية صعدت.

نزلت الشوارع، وعملت لجان شعبية، ووقفت ضد أي حد يحاول يروعها أو يسرقها وينهبها.

الناس قالت خلاص مفيش ذل وخوف تاني

كانوا ببياتوا في الشوارع أمام بيوتهم عشان يحرسوها،  
ويفتشوا العربيات، ويقبضوا على البلطجية واللي معاهم سلاح  
عشان يسلموهم للجيش

عملوا ده بمنتهى الاحترافية والجدعنة و الشجاعة

وأثبتوا انهم أفضل وأجدع من طباط الشرطة اللي كانوا في  
بيوتهم خايفين يترلوا، وبيساومونا عشان نرجع، ومرعويين من  
انهم يتعاملوا مع ناس هما عارفين قد إيه ظلموهم وعاملوهم  
معاملة المجرمين.

وطلع الفريق شفيق رئيس الوزراء الجديد في أول لقاء  
تليفزيوني ليه. طلع عشان يقول ان أمن المتظاهرين على رقبته  
وانه بيكفل لهم الحماية بنفسه.

لكن في اليوم التالي مباشرة الراجل ده ماطلعش قد كلمته  
ولا قد المنصب اللي اتخط فيه في ظروف حساسة وفي لحظة  
تاريخية كان ممكن يطلع منها بطل محمول على أعناق الناس  
اللي حبت شوية لسانه الحلو.

في اليوم التالي مباشرة نزل بلطجية مؤيدين للرئيس مبارك،  
ومدفعين من قيادات في الحزب الوطني، ورجال أعمال

فاسدين بسيوف وسنج وقنابل مولوتوف، وراكبين أحصنة  
وجمال، عشان يضربوا الناس اللي في التحرير، ودارت معارك  
كثيرة سقط فيها شهنا بس التحرير هو اللي انتصر.

هو اللي انتصر لأنه دافع عن نفسه عن عقيدة، ومبدأ مش  
زي التانيين كانوا ماجورين من أعضاء مجلس شعب فاسدين  
وأعضاء حزب وطني مرتزقة

انتصر بعد ما قلم للعالم صورة محترمة، وبعد ما اتعملت  
مستشفى ميداني من شباب الأطباء في قلب الميدان عشان تعالج  
المصابين وتستقبل الجرحى وللأسف الشديد..القتلى

بعد اليوم ده كان لازم حسني مبارك يرحل.

كفاياه دم وتشبث في الكرسي

كفاياه مكابرة وعناد

ومع مرور الوقت الناس ما اتنازلتش عن ده

مع مرور الوقت الناس هي اللي انتصرت بعد ما أذهلت  
العالم ونظموا أنفسهم بأروع صورة عشان يثبتوا أنهم  
متحضرين.

انتصروا بعد أكثر من مظاهرة مليونية نزلت فيها وشفقت  
الشعب المصري الحقيقي والشباب الواعي اللي يجد اللي



شفت فيها رجاله بتحافظ على الستات، وولا حالة تحرش واحدة، أو اعتداء، أو سرقة حصلت في الوقت ده في الميدان.

شفت الشباب وهما متطوعين انهم يحموا مداخل الميدان، ويفتشوا كل اللي داخلينه، ويتأكدوا من شخصيتهم وانهم مش داخلين بأسلحة أو داخلين يعملوا فوضى، بمنتهى الرقي والتحضر

شفت ناس بتجيب بطاين على حسابها وتوزعها على الناس اللي بتبات عشان مايردوش، وناس بتجيب أكل توزعه وقت ما بتقفل محلات الأكل.

شفت الاستشاري العالمي المهندس ممدوح حمزة وهو يشتري آلاف البطاين، ويخطط ازاى يعمل حمامات للناس اللي بتبات، وازاي يحافظ عليهم وعلى وحدتهم.

شفت محمد هاشم صاحب دار ميريت للنشر.. الراجل الوطني الجميل وهو فاتح الدار اللي مقرها في التحرير عشان الناس تبات فيها، ومع إن معرض الكتاب اتأجل وقتها، ومع إن خسايه كانت كتيرة، انما الراجل كان بيعجب أكل وساندوتشات بالآلاف ويعملها بنفسه، ويوزعها على الناس

اللي في الميدان، واللي عدد منهم كانوا بيروحوا ياتوا في مقر  
الدار اللي أصبحت بيتهم الحقيقي في الأوقات الصعبة دي.

شفت ناس ساكنة في الميدان فتحت بيوتها شخصياً  
للمتظاهرين عشان ياتوا وخصوصاً البنات اللي ماعرفتش  
تروح يوم موقعة الجمل واللي كل الرجال والشباب كانوا  
بيحموهم، وماشفتش ولا خناقة ولا قلة أدب وكأننا أصبحنا  
في المدينة الفاضلة.

شفت ناس جاية من الأقاليم وبتقول (لأ)، ومش راجعة إلا  
ما يرحل مبارك

شفت عشرات الآلاف وهما بيصلوا في وقت الصلاة في  
قلب الميدان، وأقباط يرسموا الصليب ويدعوا ويساعدوا  
المسلمين في الوضوء

شفت ربنا في الميدان بعظمته ورحمته وعدله ومغفرته.  
شفت أسماء الله الحسنى كلها في التحرير بتحقق على أرض  
الواقع من خلال ناس محترمين هم من أفضل من أنجبتهم مصر  
في تاريخها، وهما اللي كتبوا تاريخ جديد بدون ما حد يقول دي  
ثورتي أو ينسب اللي بيحصل ليه

وعشان كل ده الناس ماسابتش الميدان رغم كل شئ إلا لما







## اللي يقول لك.. قل له 😊

بعد مرور أيام قليلة من الثورة بدأت وسائل الإعلام مدعومة من النظام في استخدام أقدر طرق غسيل المنح للتأثير على الشعب المصري، وجعله يفقد تعاطفه وتأييده للشوار في التحرير عبر أساليب تشكك الناس فيما يحدث وتدفعهم لكره شباب الثورة واعتبارهم السبب في كل سوء سيحدث في البلد، ولذلك كان لابد من هذا المقال "

عزيزي الشاب الجميل في مواجهة جحافل البلطجية، وسائقي النوق العصافير في موقعة الجمل لتحرير التحرير من الكفار الملاحين، أو الشباب السييس الذين ضربوها صرمة وكبروا الجمجمة ولعنوا الثورة لأن الحشيش شح في السوق، أو الخائفين المرتعدين الذين لا يهمهم سوى أنهم: "يروحوا الشغل الصبح ازاي"، أو المحترمين الذين يرون فيما يحدث: "عيب وبتاع وشاي بالنعناع"، أو مستشفى الولادة التي تستقبل حالات الطلق الحامي ما قبل الولادة على التليفون لتوفير ولادة آمنة، والمسماة بالتليفزيون المصري وفرعها في قناة المحور الفضائية وعنابرها في دريم والحياة ومراحيضها في الفراعين

لما كثر العناد بعد البعاد، والغباء بعد الاختباء، والاستغراب  
لقرب رحيل الغراب، فقد ظهر علينا نفر من البشر، لا هم  
بمستقيمي النظر، ولا آكلي الجزر، خرجوا علينا من كل حذب  
وصوب وقد أصبحوا فجأة محيين للبلد التي لها حضارة سبعة  
آلاف عام، و خمس بطولات أمم أفريقية أربعة منهم في عهد  
الرئيس مبارك - بالإنجاز!! - وثلاثة منهم برعاية المعلم حسن  
شحاتة، وجدوا طريقهم إلى تليفونات الإعلام المصري  
العصري، الذي احترف الكذب والخداع والتدليس بشكل  
حصري؛ ليؤكد أن "حب الوطن فرض عليا أفديه بروحي  
وعنيا"، وأن المحتلين الغزاة لميدان التحرير خونة، وعملاء،  
ولديهم أجنداث، ونتائج، وساعة حائط أتت لهم من مكبات  
(سمير وعلي) التي توالي الشيعة الروافض في إيران اللعينة (على  
أساس ان فيها علي)، أو أنهم تناولوا الكنتاكي من الأمريكان  
مقابل ما يفعلون، بينما اكتفى الإخوان منهم بساندوتشات  
"مؤمن"، وأن الفلوس توزع عليهم مع الجوارى الحسان،  
والذهب والياقوت والمرجان، وأنهم أفسدوا البلاد ودمروا حياة  
العباد، ذلك لأنهم مستعجلين شوية، ويريدون لحسني مبارك أن  
يمشي الآن، وليس بعد ستة أشهر، أو لأن من يتحدث يرى  
الرئيس مبارك هو بابا وماما وأونكل أنور وجدي، وأنه قاد  
سفينة الوطن لنشعر معه بالأمن والأمان والاستقرار بدلاً من

جلوسنا في منازلنا على نار ونحن خائفين من بلطحية الشوارع  
والثوار الأشرار، وبعضهم في ذلك محقون في الشعور، لكنهم  
يريدون من يرد أمانهم إليهم، ويطلب عليهم، ويفهمهم  
الحقيقة، بطريقة دقيقة، طالما أنهم لم يفهموها بالسليقة، ولتكن  
السطور القادمة رداً يمكنكم أن تردوه، وتعلموه لمن تروه، فما  
أحوجنا إلى أن نتوحد، بدلاً من الذين يريدون لحركة الشباب  
أن تتبدد

هيا بنا نبدأ.

لما يقول لك : انتو مين؟

قل له : مفيش حاجة اسمها انتو واحنا..الناس اللي في  
التحرير دي هي ولادك وآباءك واخواتك.ناس عندهم مشاكل  
وياما اشتكوا من غير ما حد يسمعهم أو يعبرهم، ولما نجح  
الموضوع انضم لهم ملايين وملايين في كل مصر مش بس في  
ميدان التحرير، وكلهم اجتمعوا على إنهم كانوا عايشين في  
ظلم وانهم مش عاوزين يتظلموا تاني، وكلهم قالوا اللي كان  
نفسك تقوله وماقتهوش غير في شرك، وحققوا اللي كان  
نفسك تحققه وماحققتهوش، وهما هما اللي كنت بتشوفهم ناس  
هايفة، ومش هيغيروا، وهما اللي كنت لما تعدي عليهم تقول  
والله لو قعدوا يهتفوا للصبح مفيش حاجة هتغير، وهما اللي



انت اتبسّطت لما حققوا اللي نفسك فيه، وهما اللي اتقلبت عليهم لما النظام اللي عايزين يسقطوه بقى يخوفك، ويستخدم إعلامه انه يرعبك، وينشر الإشاعات اللي تدمرك لغاية ما كرهوك فيهم، وهما دول اللي لسة موجودين عشانك وعشان مستقبل ولادك.. يعني انت وهما واحد

لما يقول لك : كفاية كدة ما الراجل استجاب

قل له : الاستجابة الحقيقية لا تكون بالوعود، فلطالما سمعنا وعوداً ولم تنفذ، ولا بالإصلاحات، فلطالما كان الإصلاح وهمياً، وعلى مقاس فئة واحدة هي فئة الفاسدين والحاكمين لهذا البلد.

وبعدين استجاب لإيه ؟..

عشر سنين وأكثر بنقول له يسمع وما يسمعش.

نقول له يا سيدي .. ما يردش.

نقول له حبيبي .. ما يردش.

نقول له يا عم .. ما يردش ..

نعمله إيه؟؟.

نطلب نائب.. يقول لك :مفيش حاجة في القانون تجبرني)  
رغم انه شخصياً جاء عن طريق كونه نائباً، وماتلقوش على  
انتقال السلطة (رغم انه يعرف انها ستتقل بمجازر حين يقفز  
النوس ابنه بعد تمهيد الطريق له إلى الكرسي بالبراشوت).

نطلب إقالة وزير الداخلية بسبب فضائحه وتعذيب الشرطة  
للناس والاعتداء على المتظاهرين أو البلطجة على الناشطين  
السياسيين واعتقالهم دون وجه حق يروح معتقل ناس ومعذب  
ناس ويطنش.

نطلب إصلاحات في الدستور يقول لك خطر، وانا عارف  
مصلحتكم، ويجيلك حد ماهوش لازمة يقول لك انتو غير  
مؤهلين للديمقراطية.

تفتكر مهما عمل هنصلقه..، ومهما غير هنقول كده  
كفاية .. ماتبسطهاش أكثر من كده.

كل يوم الناس تقعد فيه في ميدان التحرير يياخلوا ويحققوا  
مكاسب كنا بننادي بيها وضحكوا علينا وقالولنا انها مستحيلة،  
أو انها محتاجة سنين، واهي عمال تتحقق في أيام.

النائب اتعين، والدستور هيتعدل، ووزير الداخلية الحقير  
اتشال، ورجال الأعمال الفاسدين اتنعوا من السفر، والوزراء

اللي كانوا بيبنزنسوا من وزاراتهم لصالح أشغالهم أهم هيتحقق  
معاهم، والأهم : ان الراجل اللي قال لك سابقى ما دام في  
الصدر قلب ينبض أهو أخيراً هيمشي، وابنه اللي كان مخطط  
ينط على كرسي الحكم .. أخيراً مش هيجي ولا هيحكمنا.

يقي لما تقول كفاية هقول لك : لسة

لسة دم ولادنا اللي ماتوا، واللي يقدرنا يحددوا مين من  
رجال الأعمال وبتوع الحزب الوطني أمروا البلطجية بالاشتباك  
معاهم وقتلهم.

ولسة دم ولادنا اللي ماتوا قبلها برصاص حي في عينهم  
ودماغتهم وهما عزل، ومابيرتكبوش أي عنف، ومصرين انها  
تبقى سلمية.

ولسة تار كل واحد خد قلم في يوم ظلم، أو مديره ظلمه  
في شغله لأن المدير مسنود، أو واحد فاسد سرق قوته وقوت  
أولاده.. كل دول لسة، وكل دول مش هنسيبهم خالص. فمش  
كفاية

ولو أيدك في النار وابنك اتقتل قدام عنيك برصاصة ف  
عينه، أو قناص نشه وهو ساجد بيصلي الفجر في ميدان  
التحرير زي ما واحد أعرفه حصل له كده، أو خد رصاصة في

دماغه وهو واقف في بلكونة بيتهم في شارع القصر العيني  
بيصور .. ساعتها بس هتعرف انه مش كفاية، واننا لسة في أول  
الطريق.

اللي يقول لك : مش عارفين نروح شغلنا من الناس بتاعة  
التحرير.. خربتو البلد منكم لله.

قل له: المرة الجاية نعمل الثورة يبقى صابح تاني يوم بعدها  
أجازة.

يا راجل وهل يعقل ان البلد اللي تعدادها ٨٥ مليون تقف  
عشان حبة ناس في ميدان، وهل يعقل ان واحد قعد في الحكم  
٣٠ سنة بلده تقع في ٣ ايام. ده دي لوحدها تستوجب ان  
انت شخصياً تترل الميدان، وتستوجب انه يمشي بدون أن يجزن  
أحد عليه؛ لأن ال ٣٠ سنة ما عملش فيها مؤسسات قوية قادرة  
على تسيير البلاد في أي ظرف طارئ

وبعدين سأمحي.. شغل إيه يا ابو شغل

الشغل اللي بتاخذ فيه ملايين، وغيرك بياخذه ملايين

الشغل اللي مرتبك فيه يخلص قبل نص الشهر، وبتقضيها

سلف، وقروض، وجمعيات.

الشغل اللي انت طول عمرك بتقول يا رب يزودوا مرتباتنا  
وماحلش يسمعك، وان زودوك يدوك ٢٠ أو ٣٠ جنيه زيادة  
مايقتش تجيب كيلو لحمه، والا الشغل اللي بتطلع كل سنة في  
عيد العمال وانت بتقول للريس وكأنك بتسول منه : المنحة يا  
ريس. الشغل اللي انت عارف كويس ان اللي يستحقوه  
مايوصلوهوش، وان اللي بيتعين جديد لازم يبقى بواسطة.

الشغل اللي انت بتروحه عشان تبقى فيه بطالة مقنعة.

الشغل اللي انت لما بيكون عندك ضمير، ولو عندك أفكار  
لتطويره يقول لك صاحبه أو مديره : "يعني انت الفلحوس اللي  
بتفهم وكلنا ما بنفهمش" ..، ويحطك في دماغه عشان تحبظ  
وتبقى ترس جديد في منظومة الفساد.

الشغل اللي لو لقيت فساد فيه بتخاف تبلغ عنه ويقولوك :  
كل عيش، وربي عيالك، وتقضي بقيت عمرك شيطان أخرس.

الشغل بتاع تستيف الورق عشان ماحلش يتكشف.

الشغل اللي من أول ما بتروحه بتحسب الساعات عشان  
تشوف هتروح إمتي، وتتفنن في تضيع وقتك هناك من غير ما  
تقضي مصالح الناس.

الشغل اللي لو بتطلع منه بتوصيات وحلول بترمي في



باقي ال ٨٠ مليون لإرادتهم وخدمهم.

أنا أحترم محبتك للرئيس، لكن نحن لم نعد نجه، فإذا كنا خرجنا لإسقاطه، وإسقاط نظامه، ودعونا للرحيل، فبدلاً من أن نتحدث أنت من بيتكم كن إيجابياً وافعل مثلما فعلنا وادعو لبقائه. لكن حينما تفعل ذلك افعله باحترام مثلما نادى شباب التحرير، واجعلها سلمية مثلما جعلها شباب التحرير، ولا تحتك بأحد مثلما فعل شباب التحرير، فإن فعلت غير ذلك فأنت مخرب ورئيسك الذي تجبه هو رئيس مجموعة من المخرين، كما أنك أضعف من أن تفرض مشيئتك ومشية من يتفقون معك في أفكارك باحترام، ولذلك أنت ضمن الأقلية ولست الأغلبية. أنت ورفاقتك مجرد ٢ مليون وعلى عينا وراسنا أما شباب ورجال ونساء ٢٥ يناير فهم الأغلبية الحقيقية التي ينبغي عليك احترامها .

اللي يقول لك :ده راجل زي ابوكم.. عيب كده

قل له : لو مبارك بابا تبقى ماما هي سوزان ويقى جمال أخويا وصفوت الشريف ابن خالتي وزكريا عزمي ابن عمي، والوزرا ولاد عمي، ومش بعيد حضرتك شخصياً تطلع ابن عمي وانا مش واخذ بالي.

رئيس الجمهورية يا سيدي موظف، والموظف يحاسب إن

أخطأ، ويكافأ لو أصاب، ويطرد لو تجاوز في خطاه وتسبب في موت وذل من حوله.

رئيس الجمهورية يا سيدي يأخذ راتبه من فلوسي وفلوسك وفلوسنا كنا، ولو بمنطقك يبقى أخطاء ٣٠ سنة تخلينا لازم نحجر عليه.

إحنا مش زيه هيتبرأ مننا ويقول اننا بتحركنا دول تانية وان عندنا أجنداث، لكن احنا بنكن له كل احترام حين يصيب، ونقدر تاريخه كأحد أبطال أكتوبر، ولا نطبق أبداً أفعاله الخاطئة كرئيس، ولذلك يجب الوقوف ضده حتى يرحل، وسيرحل

فإرادة الشعوب أقوى من إرادة الأفراد مهما كانت مناصبهم

والأيام بيتنا.. لو كنا احنا صح هيرحل، ولو كنا غلط هيرحل.

واللي هيرحل.. عمره ما هيرجع تاني.. أبداً.

وأخيراً: اللي يقول لك: اكلم مين لما اتفاوض مع شباب المتظاهرين

قل له : اطلب الخط الساخن بتاع كنتاكي 😊



# الشعب .. يريد .. إسقاط النظام

(أشهر ١٠٠ هتاف في ثورة ٢٥ يناير)

تفنن المصريون في هتافاتهم في ثورة ٢٥ يناير التي كانت "سلمية..سلمية"، والتي كانت تدعو الناس للاشتراك معهم مذكرة إياهم بأنهم واحد "يا أهالينا انضموا لينا"، وحتى من اكتفى بدور المشاهدة من البلكونات لم يسلم من دعوة مباشرة للترول حين كان ينظر له المتظاهرون وهم يهتفون به " انزل..انزل".

هتافات الثورة كانت أقوى من طلقات الأمن المركزي، والقناصة الخونة الذين ضربوا العزل وأنهوا حياتهم، فالطلقات توقفت، وانسحبت الشرطة بعد أن انكسرت تماماً، بينما لم تتوقف الهتافات التي سمعها العالم ولم يرد حسني مبارك ونظامه أن يسمعها أو يلقي لها بالاً، وإلى الآن لازلت أتساءل: لماذا لا يسمع الحكام أصوات شعوبهم؟.. ما الذي كان يضير مبارك شخصياً ووزرائه الفاشلين، ومساعديه الحمقى من الاستماع لأصوات الناس والاستجابة لمطالبهم بدلاً من اعتبارهم من القلة المنحرفة المندسة.

على مدى سنوات تظاهر الناس وهتفوا ولم يسمع أحد، واعتبروا هتافاتهم مدفوعة الأجر وممولة من الخارج ومدعومة بالإخوان المسلمين وموجهة من إيران وحزب الله وحماس.

اخترع النظام كل أنواع الأعداء لتشكيك الناس في المتظاهرين والمطالبين بحقوقهم، وأطلقوا عليهم كتاب البولدوج الصحفي في الصحف القومية من رؤساء مجالس إدارات، ورؤساء تحرير، وصحفيين، وماسحي جوخ انقلبوا جميعاً عليهم بعد سقوط النظام، وتنصلوا مما فعلوه من إهانات وتحرير مضامين أنها كانت أوامر، ومستخدمين الكلمة المستفزة الشهيرة التي يعتبرون أنفسهم فيها "عبد المأمور".

لو استجاب مبارك للناس برغبته الحرة، وبأسلوب يجعل الناس تشعر ان مبارك هو واحد منهم وليس إله من عجوة تم أكله بالكامل مع نهاية الثورة لكان أصبح بطلاً، ورئيساً تاريخياً جاءته أكثر من فرصة ليدخل التاريخ من بوابة العظماء ورفضها، ونصحه كثيرون وبحت أصواتهم وهم ينادون بإصلاحات حقيقية، وبتغيير جذري، وبإبعاد نتوس عين بابا وماما جمال مبارك عن السياسة التي دخلها بالواسطة ليصبح رئيساً للجمهورية، كانت الفرص تتوالى على مبارك لكن مبارك رفض أن يستجيب لها أو لنا، وهكذا كانت هتافات

ثورة ٢٥ يناير مطالبة بمطالب بسيطة ومبارك قادر على فعلها لكنه تجاهلها فارتفعت حدة المظاهرات، وارتفع سقف المطالب حتى وصل لرحيله، وقد تم ذلك رغماً عن أنفه وأنف المستفيدين منه.

هتافات ٢٥ يناير كانت تطالب بأشياء بسيطة "تغيير حرية.. عدالة اجتماعية"، أو كانت هتافات ضد الغلاء مثل "آه يا حكومة هز الوسط .. كيلو اللحمه بقى بالقسط"، أو "حسنى يه يا حسنى يه .. كيلو اللحمه ب ١٠٠ جنيه"، وهو هتاف معدل كان الناس يهتفون بمثله أيام السادات وقتما وصل سعر كيلو اللحم ل ٦ جنيهات فقط، لكن السادات لم يسمع حينها، وأسمها انتفاضة حرامية، واكتسب عداوات كثيرة أدت لاغتياله، والغريب أن الجالس بجواره كان مبارك الذي لم يتعلم أبداً من الموقف.

كان الناس قد ملوا الحكومة الغبية الي قال رئيسها بمجرد توليه المسئولية أن الشعب المصري غير مؤهل للديمقراطية.

الحكومة التي حدثت في عهدنا أزمات في رغيغ العيش لتعود الطواير على المخابز، وياع الرغيغ بما يقترب من الجنيه، بل وبجنيه أحياناً، وهي نفسها الحكومة التي جرت في عهدنا أزمة أناييب البوتاجاز في الوقت الذي تصدر فيه مصر

الغاز لإسرائيل بأسعار أقل بكثير من أسعار العالم، وأعلى بكثير من أسعاره عند المصريين.

الحكومة التي ارتفعت في عهدنا ديون مصر، وساءت الرعاية الصحية، وحدثت في عهدنا كوارث، وزادت نسب التضخم، وأصبحت مصر في عهدنا في قوائم الدول الأكثر فساداً، والأقل شفافية.

كانت الهتافات تتوالى في هذا اليوم" يا وزراء طفوا التكيف..مش لاقين حق الرغيف"، لكن لم يعد أحد يسمع، وبدأت عصيان الأمن المركزي تتحدث في الحادية عشرة مساءً ، وتكلمت الطلقات وخراطيم المياه لتفريق المعتصمين في التحرير، وهكذا ولد الهتاف الذي يمكن اعتباره الراعي الرسمي للثورات العربية، والذي توحدت به كل الفصائل .."الشعب..يريد..إسقاط النظام" .."الشعب..يريد..إسقاط النظام... وبدأ توجيه الاتهامات إلى رؤس النظام الفاسد الذين أصيبوا بالصمم أمام مطالب الناس، وبالغباء في التعامل معهم بمنتهى العنف بدلاً من احتوائهم، وراحت الناس تردد كلمة "باطل" مستمدين إياها من فيلم (شئ من الخوف) عن رواية ثروت أباطة، وهتافات أهل البلد فيه " جواز عتريس من فوادة باطل"، والناس التي تردد "باطل" .."باطل" ليسمع العالم شعب



تواصلت الهتافات ولم تتوقف أبداً. طالبت بكل شيء حر، وانتقمت من كل فاسد أو متواطئ في نظام مبارك، وكانت شديدة الرقي والتحضر وهي تؤكد على أنها "سلمية.. سلمية"، وكانت عبقرية حين وجد الجميع عمليات التخريب من الداخلية وأتباعها والغوغاء الذين ركبوا الموجة وخرّبوا في البلد بأكملها؛ ليصبح الهتاف الشهير حينئذ "اللي يحب مصر.. ما يجربش مصر"،، وحين نزل الجيش للشوارع استقبله الناس بترحاب شديد، فقد وجدوا وجوهاً مختلفة عن وجوه الشرطة التي تشعر معها انهم كانوا مصابين بعقد نفسية تجعلهم يرون الشعب المصري بأكمله شعب من المجرمين والمسجلين الخطر يجب التعامل معه بمنتهى العنف، وبدلاً من هتافات النيل من الشرطة جاءت هتافات الترحيب بالجيش "الجيش..

والشعب. إيد واحدة" ..

"الجيش.. والشعب.. إيد واحدة"

ثم تواصلت الهتافات العبقرية التي يمكن لكم لو ركزتم فيها أن تعرفوا عظمة وعبقرية الشعب المصري الذي كثف مطالبه في جمل بسيطة سمعها العالم بأكمله، والتي يمكن من خلالها تأريخ الثورة، ومعرفة إلى أي حد وصل الشعب المصري في شعوره بالذل والهوان في ظل نظام مبارك.

أترككم مع أشهر هتافات الثورة التي يمكنكم وضعها في مكان مضيء في الذاكرة، أو غرفة فسيحة من غرف قلوبكم؛ لتستخدموها في أي يوم ضد أي ظالم قد يدفعه حظه العاثر إلى التفكير - مجرد التفكير - في ظلم الشعب المصري.

- "ارفع صوتك زى الناس..إحنا كرهنا الظلم خلاص"
- يا جمال قول لابوك..شعب مصر بيكرهوك
- يا جمال قول الحق.. انت ناهبنا والا لأ
- لا لمبارك ويا الإبن.. لا للفردة والاستبن
- حضرات السادة الطباط..يايديكم كام واحد مات
- "ثورة ثورة حتى النصر..ثورة في كل شوارع مصر"
- "صحى الخلق وهز الكون..مصر بلدنا مش هتهون"
- يسقط يسقط الاستبداد
- الهلال ويا الصليب.. ضد القتل والتعذيب
- حسني مبارك يا عميل .. بعث الغاز وفاضل النيل
- قزلوا وردوا أنت وهي .. مصر هتفضل غاليه عليا
- الهلال ويا الصليب .. يقولوا لأه يا حبيب
- مصر حتفضل غاليه عليا..رغم الخونه والحراميه
- ارحل ارحل ارحل غور.. خلّي بلدنا تشوف النور

- ارفع ارفع الهتاف .. شعبنا حر ومش هيخاف
- اضرب اضرب يا حبيب .. مهما تضرب مش هنسيب
- مش عايزينه مش عايزينه.. ولا كلابه ولا زنانيه
- اصحى يا مصر وفوقى م النوم.. نهبوا ولادك يوم ورا

يوم

- ثوره ثوره في كل مكان.. ضد الخونه والاندال
- ثوره ثوره يا مصريين.. لجل ما نخلص م الخائنين
- اهرب اهرب يا جمال .. انت وابوك والاندال
- عَلِيَّ وَعَلِيَّ وَعَلِيَّ الصوت.. اللي حيهتف مش هيموت
- عَلِيَّ الصوت عَلِيَّ كمان.. لجل ما يسمع كل جبان
- حسني مبارك جلده تخين .. هو وعيلته مش سامعين
- حسني مبارك يا بليد .. شعب مصر مش عبيد
- يا جمال يا غراب البين.. خد ابوك وروحوا لزين
- عَلِيَّ عَلِيَّ عَلِيَّ الصوت.. النظام خايف يموت
- كل الشعب يقول وينادي.. حسني مبارك بره بلادي
- السرطان في كل مكان.. والغاز متباع بالمجان
- باعوا دمانا وباعوا كلاوينا.. وبنشحت احنا وأهالينا
- تسقط تسقط العصابه .. الزعيم ويا الديابه



- الكرامه والحريه ..مطلب كل المصراويه
- التحرير التحرير ..من حكم عصابة التزوير
- مصر بلدنا مش تكيه .. للهلبيه والحراميه
- شرطة مصر يا شرطة مصر .. انتو بقيتوا كلاب القصر
- افتح صدرك للحريه .. مصر حتفضل غاليه عليا
- عسكر عسكر عسكر ليه .. احنا فى سجن ولا ايه
- ايه بيحصل فى السويس .. دول اهلينا يا نخسيس
- بيعملوا علينا أسود..ويتسحلوا على الحدود
- الهلال مع الصليب..بكرة يا حسنى غيرك نجيب

والغريب أن مبارك لم يرحل رغم كل ما قيل، ورغم كل المطالبات، ورغم كل النداءات الدولية، ورغم كل الهتافات السلمية، وهنا تحولت الهتافات للسخرية والتحقير من إحساس مبارك ونظامه ورجاله، وباتت أشد حدة

- قولوهاله بالعبرى ..ميفهمش عربي"
- ارحل ارحل يا حبان .. يا عميل الأمريكان
- ارحل ارحل يا مبارك ..تل أبيب فى انتظارك
- ارحل ارحل يا سليمان .. مش عاوزينك انت كمان
- يا مبارك يا فرعون .. انت فى كل كتاب ملعون

- احلف بسماها وبتراها .. مبارك هو اللي خربها
  - شدى حيلك يا بلد.. الحرية بتولد
  - هما يلبسوا آخر موضه.. واحنا عايشين عشرة في
- أوضة

- ثورة ثورة يا شباب .. على الحاكم الكداب
  - شعب مصر ثور ثور .. على الحاكم الدكتاتور
  - لا طائفية ولا حزبية.. كلنا وحدة وطنية
  - هما ياكلوا فراخ وكباب.. واحنا عيشتنا هباب في
- هباب

- ارحل بقى يا عم.. خلى عندك دم
  - هيلاهيلاهيلاهيلاهيلا .. حسنى مبارك آخره الليلة
  - ثورة ثورة حتى النصر.. ثورة في كل شوارع مصر
  - روح يا مصيلحي قول لرئيسك .. مش عاوزين
  - مسامير في رغيفك (مصيلحي هو د.علي المصيلحي وزير
  - التضامن الاجتماعي المسئول عن رغيف الخبز والحالة المتردية
  - التي وصل إليها حيث كان الناس يجدون فيه مسامير وخشب
- (وزلظ)

- مش هنسيبك مش هنسيبك.. ولا هنسيب العادلي حبيك
- مش بنتخاف من الداخلية.. مصر بلدنا وغالية عليا

- ثورتنا ثورة شعبية .. ضد مبارك والحرامية
- الهلال ويا الصليب .. ارحل يا رئيس التعذيب
- باسم العشرة مليون عاطل .. نظامك يا مبارك باطل
- لا يا مبارك يا مفلسنا .. انت بتعمل ايه بفلوسنا
- باسم الخمسين مليون شاب .. لا لمبارك والإرهاب
- كل الشعب قالها خلاص .. لا لمبارك والأنجاس
- الميدان ده مقر الثورة .. والحزب الواطى بره بره.
- قلنا ثورة للتغيير .. قتلوا اخواتنا فى التحرير.
- يا مبارك يا خسيس .. دم المصرى مش رخيص
- يا مبارك خربت مالطة .. ارحل حافى من غير شنطة
- الجيش والشعب ايد على ايد .. مصر هتدخل عهد جديد
- الشعب فاق الشعب فاق .. كله عزيمة مفيش نفاق
- يا حربية يا حربية .. ليكى منى الف تحية
- آخر طلعة جوية .. رايحة بسرعة السعودية
- مش أحزاب ولا إخوان .. كل الشعب فى الميدان
- أوفياء أوفياء .. لدماء الشهداء .
- السعودية خسارة فيك .. اسرائيل أولى بيك

- حالو يا حالو .. الشعب كله حلو .
- يا مبارك يا طاغوت .. مش عاوزينك لو هنموت
- هما يقولوا شرق وغرب .. واحنا نقول انصرنا يا رب
- ارحل ارحل زى فاروق .. شعبنا منك بقى مخنوق
- كفاية كذب على الشباب .. لازم ترحل يا كذاب
- بنقولها لك بالملايين .. ارحل ارحل مش خايفين
- عاوزين حكومة حرة .. دي العيشة بقت مرة
- يا مبارك يا طيار .. جبت مين ٧٠ مليار
- واحد اثنين .. فلوس الشعب فين
- مش عاوزينك مش عاوزينك .. دم الشهداء بينا وبينك
- ارحل يعني ارحل .. ياللي ما بتفهمشي
- مش هنمشي .. هو يمشي / مش هنمشي .. هو يمشي
- اعتصام اعتصام .. حتى يسقط النظام
- مصر حرة .. وانت برة
- صفيت دمنا .. ارحل عننا
- ارحل يعني GO .. يا عالم فهموه
- ارحل كفاية دم .

- الشعب.. خلاص.. أسقط النظام
- الشعب.. يريد.. محاكمة النظام
- يا سوزان قولي للبيه... ربع قرن كفاية عليه
- يا سوزان قولي للبيه... كيلو العلس بعشرة جنيه
- هو مبارك عايز ايه ... عايز الشعب ييوس رجليه
- روح يا زين قول لمبارك.. السعودية في إنتظارك
- بكرة نقول كان قهر وعدى.. لما مبارك يرحل جدة
- شيلوا مبارك وخطوا خروف .. يمكن يحكم بالمعروف
- قول يا محمد قول يا بولس.. بكره مصر تحصل تونس
- يا مبارك بره بره .... عايزين مصر تبقى حرة
- ارحل ارحل يا فرعون ... دي رغبة ٨٠ مليون
- يا حرية فينك فينك ... حسنى مبارك بيتنا وبينك
- حسنى بيه يا حسنى بيه.. قولى حاصرت غزه ليه؟
- غلو السكر غلو الزيت... بكرة نبيع عفش البيت
- مصر وتونس ضي العين .. والحكام يغوروا الاتنين
- آه يا حكومة هشك بشك ... بكرة الشعب المصري يكشك
- باعوا الدولة وباعوا الغاز... دول عاوزين الولعة بجاز
- هما بياكلوا حمام وبط ... وكل الشعب جاله الضغط
- الشعب.. يريد.. محاكمة النظام

## عمر سليمان ورأفت الهجان !!

قبل أحداث ٢٥ يناير نظر المصريون إلى عمر سليمان نظرة إعجاب غير مبررة بالمرّة، واستمد الرجل شعبية غريبة لمجرد كونه رئيس جهاز المخابرات العامة المصرية الذي يحظى باحترام الجميع في مصر، ورشحه كثيرون نائباً للرئيس، وحلم البعض بأن يصبح رئيساً لفترة انتقالية يتم تعديل الدستور خلالها.

حب الناس لعمر سليمان كان غريباً فالرجل لم يتحدث يوماً قبل ظهوره الأول في أحداث الثورة الساخنة كنائب رئيس، ولم تبدر منه أي إشارات لأي مهارات في أمور السياسة الداخلية. صحيح أن الرئيس السابق كان يستعين به إدارة بعض الملفات الحساسة مثل ملف توحيد الفصائل الفلسطينية، وملف العلاقات المصرية الإسرائيلية، إلا أن الرجل ظل على غموضه وعدم حديثه.

تسرع الشعب في محبة الرجل الذي لم يكن يمثل لهم سوى أنه رئيس الجهاز الأمني المشهود له بالكفاءة والاحترام وهو جهاز المخابرات العامة المصرية، وربما كان هذا هو السبب الوحيد في محبة الرجل الذي تعاملوا معه وكأنه رأفت الهجان أشهر جواسيس مصر داخل إسرائيل، وزاد في ارتفاع أسهم سليمان عند المصريين قبل الثورة بسنوات فكرة كونه رجل

الظل الذي يظن الجميع أنه بطل، وأنه يقوم بأدوار بطولية في الخفاء من أجل مصر، فالذين أحبوا عمر سليمان هم محي المخابرات وروايات رجل المستحيل وشخصية أدهم صبري الشهيرة التي ابتكرها د.نبيل فاروق، والتي ساهمت بقوة في وضع صورة ذهنية رائعة لجهاز المخابرات في أذهان أجيال كثيرة تشير إلى قوته وكفاءة أفراده الشديدة.

قبل ٢٥ يناير بنحو ٥ سنوات لو كنت قد سألت أحدهم عما يتمناه من مبارك لأخبرك بأن يعين عمر سليمان نائباً له؛ ليصبح عمر سليمان رجل المخابرات القوي هو رئيس مصر القادم، لكن التجربة أثبتت للجميع أنهم بذلك كانوا سيأخذون أكبر مقلب في حياتهم، فقد أتت الرياح بما لا تشتهي السفن، وكان من مكاسب الثورة أن تكلم عمر سليمان إلى الناس، ليجده الجميع شخصية بلا كاريزما. لا تعرف الابتسامة طريق إلى وجهه الصارم، ولا يبدو عليه أي تمرس سياسي من أي نوع، فالرجل جاء في لحظات صعبة لكي يحل الموقف، ويساعد على تهدئة الناس، فإذا به يتكلم عن أن الشعب المصري لا يزال في حاجة لتعلم الديمقراطية، ومع كل يوم يمر من الثورة، ومع استمرار اعتصام الآلاف في ميدان التحرير ورفضهم لمغادرته، كانت الأيام تثبت أن عمر سليمان (ميج) سياسياً، وأنه "جه يكحلها.. عماها"، وأنه يقول نفس الكلام الماسخ الذي يقوله النظام الذي طالب المتظاهرون جميعاً بإسقاطه، ولو شئت للدقة

فلربما كان هو من لقن النظام هذا الكلام.

وهكذا وجدنا أنفسنا أمام محاولات تشويه للثورة من جانب عمر سليمان نفسه، فمرة يتهم الإخوان بتسيير المظاهرات، ومرة يتحدث عن الأجندات الموجودة عند متظاهري التحرير، ومرة يتحدث بأسلوب قاطع حازم صارم عن عدم تنحي الرئيس أو المطالبة برحيله، لأن هذا ليس من أخلاق الشعب المصري، والغريب أنه كان يردد نفس الكلام في جلسات الحوار الوطني الوهمي الذي دعا إليه العديد من التيارات، والتي بدأها مع الأحزاب الكرتونية المزيفة التي كانت تستقي أوامرها من أمن الدولة فيما سبق، والتي ليس لها أي دور فعلي على أرض الواقع، كما التقى سليمان العديد من شباب التحرير الذين لم يفهم هو أنهم لا يعبرون عن كل الناس، وأنه ليست لهم سلطة إجبار الآخرين أو إقناعهم بترك الميدان.

الأكثر ألاماً للجميع هو ما تردد عن دور عمر سليمان في تضليل الشعب المصري من خلال ما قيل عن توجيهه لأوامر للتليفزيون المصري بضرورة تضليل الناس والمشاركة في أكبر عملية خداع وتضليل وغسيل مخ تعرض لها الشعب المصري الذي قدموا إليه صورة ما يحدث وكأنها حلقة من مسلسل مصري حمضان يتم فيه تخوين الجميع، وتصوير الأمر وكأن ما



يجري في التحرير لا يمت بصلة لأرض الواقع في الوقت الذي كانت فضائيات العالم تعرض الحقيقة، ولا شئ سواها.

ومن حلقة إلى حلقة، ومن بيان إلى بيان، فقد عمر سليمان مع سبق الإصرار والترصد شعبيته التي لم يسع إلى تكوينها.

الغريب في الأمر أنه لا أحد يعرف حتى هذه اللحظة ماذا سيفعل عمر سليمان الرجل الذي لا يتسم، والذي تعدى سنه السادسة والسبعين عاماً؛ ليجد نفسه فجأة وقد ترك موقعه كرئيس جهاز المخابرات المصرية، وانتهى دوره كنائب لرئيس الجمهورية مع تنحي مبارك، وخسر تعاطف الشارع والمثقفين والشباب معه لبدو وكأنه - رغم كل بطولاته الخفية التي لا نعرفها - خسر كل شئ.

حتى صورة رأفت الهجان التي كان الناس ينظرون بها إليه.

# أسطورة

## ”الراجل اللي واقف ورا عمر سليمان“

لأن الشعب المصري هو الشعب المصري، وليس الشعب الانجليزي الذي يوصف بالبرود، ولا الشعب الفرنسي الذي يوصف بحبه للنبيذ والنساء والجمال على حساب أي شيء آخر، ولا الشعب النرويجي الذي يوصف بأنه الشعب النرويجي 😊، ولأن جيناته معجونة بخفة الدم والعفرتة، ولأنه عاشق للسخرية بكل أشكالها وأنواعها حتى قيل أنه إذا لم يجد ما يسخر منه سخر من نفسه، ولأن أذهان المصريين في اللحظات الصعبة مشغولة دائماً بالبحث عن (الإفيه)، ورؤية كل الأمور من زاوية عكسية، فقد كان لابد من أن تظهر هذه الأسطورة التي ستبقى في الوجدان الشعبي دليلاً على أن روح السخرية لدى الشعب المصري لا تعطلها الظروف الصعبة، وأكبر من أي تاريخ صلاحية.

كان عمر سليمان النائب السابق للرئيس السابق يظهر في بياناته الثقيلة بصوته الأجرش، وأسلوبه الممل في الإلقاء، وهو يحاول أن يطمئن الشعب المصري الذي بات لا يطمئن بمجرد رؤيته، وربما لهذا انصرف الشعب المصري، لا سيما شعب

الفيث بوك العظفم؁ من الصورة العامة القائمة إلى رؤية تفاصيلها؁ وهي ملحوظة مهمة جداً لعلماء الاجتماع الذين سىكتبون كثيراً عن الشعب المصرى وقت الثورة؁ حيث ملت الناس رؤية مقدمة الصورة فانصرفت لما يمكن أن يلفت نظرها ويثير مخيلتها فى الخلفية؁ وهكذا ولدت الأسطورة.

وكأى أسطورة. لا يعرف أحد من أطلقها لأول مرة ولا من روج لها حتى سرت بين الناس سريان النار فى المهشيم؁ فصار شعب الفيث بوك تحديداً فى انتظار الإفيه الجديد عن هذه الأسطورة.

الأسطورة هى أسطورة: الراجل اللى واقف ورا عمر سليمان.

تجاهل الجميع عمر سليمان؁ ونظروا للرجل الذى يقف خلفه بنظراته الصارمة؁ وعيونه الزائغة التى تثبت أن من سجل هذه البيانات أو أعد لها؁ أو أشرف عليها لا يفهم أى شىء فى علم الصورة ودلالاتها؁ ولا فى سيكلوجية تأثير الصورة بصرياً على الناس؁ وخصوصاً شباب الفيث بوك الذى أصبح موعده المفضل للالتفاف حول الشاشات المصرية فى ظل غياب المسلسلات هو (بيان عمر سليمان)؛ لىظهر فيه الرجل الذى يقف خلفه ولا يعرف أحد من هو على وجه التحديد.

وهكذا وجدنا أكثر من جروب على الفيس بوك يتحدث  
عن هذا الرجل ويسميه بهذا الاسم العبقري.. "الراجل اللي  
واقف ورا عمر سليمان".

وراح الجميع يتساءل من هو هذا الرجل الذي ينظر نظرات  
حادّة صارمة بعيون زائغة تشتت تركيز الناس عن عمر سليمان  
وتصرفهم إليه، وكانت أول صورة انتشرت له هي صورة  
ساخرة تقارن بينه وبين عدد من الشخصيات المعروفة،  
والغريب أن الرجل فعلاً كان يشبههم جميعاً بصورة ملفتة  
للنظر، فهو يشبه زين العابدين بن علي الرئيس التونسي  
المخلوع الذي هرب من بلده، وقيل أنه جاء بعقد عمل جديد  
إلى مصر في وظيفة الراجل اللي واقف ورا عمر سليمان، كما  
أن الرجل يشبه جداً حسام البكري المدير الفني السابق للنادي  
الأهلي وأحد أنجح أفضل مدربي الأهلي عبر تاريخه، كما أن  
صانع الصورة الشهيرة أشار إلى الشبه بين الراجل اللي واقف  
ورا عمر سليمان وبين الممثل شوقي طنطاوي أحد ممثلي  
مسلسل عائلة ونيس والمساعد الشخصي للفنان الكوميدي  
محمد صبحي، وأخيراً أوجد الناس شبيهاً في الشكل بين الراجل  
اللي واقف ورا عمر سليمان وبين المذيع الشهير جورج  
قرداحي مقدم برنامج من سيربح المليون.

لكن هذه الصورة لم تكن إلا قطرة من محيط وسط صور أخرى راحت تنهال على الإنترنت ويتناقلها الناس وهم يضحكون بشدة على الراجل اللي واقف ورا عمر سليمان والذي وجد نفسه يقف وراء كثيرين، فما هو يقف خلف هتلر في أحد اجتماعاته، وما هو يقف خلف حسام حسن وهو يصرخ على خط التماس في إحدى مباريات الزمالك، وما هو يقف خلف محمد سعيد الصحاف وزير خارجية العراق الأسبق، وأشهر (أبو لمعة) عربي بعد (أبو لمعة الأصلي)، وخلف جمال عبد الناصر ساعة التنحي، وخلف صدام حسين وقت الإعدام، بل أن البعض وضع صورته واقفاً خلف الموناليزا، وغيرها من الصور التي ضحك الناس عليها وسط كل هذه الظروف.

لكن الموضوع لم يقف عند مرحلة الصور حيث تجلت عبقرية الشعب المصري الساخرة في عشرات الإفيهات التي استهدفت الرجل الغامض وأضحكت الملايين

خذ عندك

● لو لم أكن مصرياً لوددت ان أكون الراجل اللي واقف ورا عمر سليمان

● أوباما يعرض الوقوف بجانب الراجل اللي واقف ورا

● المستحيلات أربعة.. الغول والعنقاء والخل الوفي والراجل اللي واقف ورا عمر سليمان

● حفظ الله مصر وأهلها والراجل اللي واقف ورا عمر سليمان

● الهتاف الجديد في ميدان التحرير.. " الشعب .. يريد.. معرفة الراجل اللي واقف ورا عمر سليمان"

● الجزيرة: مبارك سافر إلى دبي.. العربية: مبارك سافر إلى لندن... التلفزيون المصري: مبارك في شرم الشيخ.. والحقيقة هي أن مبارك في بيت الراجل اللي واقف ورا عمر سليمان

● الإخوة اللي بيتريقوا على الراجل اللي ورا عمر سليمان.. الراجل ده حارب في ٣ حروب واستشهد مرتين.. ياريت نقدره وكفاية.

● بعد الشهرة الكبيرة للراجل اللي واقف ورا عمر سليمان .عمر سليمان يغير اسمه إلى الراجل اللي واقف قدام الراجل اللي واقف ورا عمر سليمان!!

● ليس الفتى من قال هذا أبي لكن الفتى من قال أنا الراجل اللي واقف ورا عمر سليمان

● التليفزيون المصري: لا صحة لوجود الراجل اللي

●

واقف ورا عمر سليمان.. ده خداع بصري.

● لما الدنيا تضيق.. لا تلاقي حبيب ولا صديق.. أكيد هتلاقي الراجل اللي واقف ورا عمر سليمان

● بيان عاجل : صرح مصدر مسئول أن الراجل اللي واقف ورا عمر سليمان هو صاحب المايك وكان مستنيه يخلص عشان يلم العدة.

● الراجل مش بس بكلمته.. الراجل هو الراجل اللي واقف ورا عمر سليمان

● باراك أوباما : يجب أن نربي أبنائنا ليصبحوا كالراجل اللي ورا عمر سليمان.

● رئيس وزراء ايطاليا : لا جديد في مصر فقد وقف رجل ورا عمر سليمان كالعاده.

● ستولتنبرج رئيس وزراء النرويج : اليوم كلنا الراجل اللي ورا عمر سليمان

● هايتز فيشر رئيس النمسا : شعب مصر أعظم شعوب الأرض و الراجل اللي ورا عمر سليمان يستحق جائزة نوبل في الغموض

● هيفاء وهي تغير كلمات أغنيها إلى: رجب.. حوش الراجل اللي واقف ورا عمر سليمان عني

● هيلاري كلينتون تطالب الراجل اللي واقف ورا عمر

- ساويرس يخصص مكافأة مليون جنيه لمن يدلي بمعلومات حول الراجل اللي واقف ورا عمر سليمان.
- الوقفات في مصر: وقفة عيد الفطر - وقفة عيد الأضحى - وقفة الراجل اللي واقف ورا عمر سليمان
- الحكومة تعلن عن خط ساخن للإبلاغ عن أي معلومة تفيد في معرفة الراجل اللي ورا عمر سليمان.
- وزير الصحة: أنا قلق من انتشار مرض فوييا "الرجل اللي ورا عمر سليمان" حيث أصبح الشعب خائفاً و ينظر خلفه باستمرار في ظروف تمر بها البلاد تفرض علينا النظر إلى الأمام.
- أنباء غير مؤكدة : جلوس الراجل اللي واقف ورا عمر سليمان
- ٤ بنوك أوروبية تعلن عن تجميد أرصدة الراجل اللي واقف ورا عمر سليمان لحين الكشف عن هويته.
- الراجل اللي واقف ورا عمر سليمان يعترف بإنه الراجل اللي واقف ورا عمر سليمان.
- اللي بيتريق على الراجل اللي واقف ورا عمر سليمان يروح يقف هو ورا عمر سليمان ويقول لنا هيستحمل والا لا
- . عمر سليمان يتهم الراجل اللي واقف ورا عمر



سليمان بسرقة محفظته.

● بعد تنحي مبارك.. استقالة الراجل اللي واقف ورا  
عمر سليمان.

● الله .. الوطن .. الراجل اللي واقف ورا عمر سليمان

● أنا معصرك وانزل منك عيال صغيرين يقفوا بدل  
الراجل اللي واقف ورا عمر سليمان.

● وراء كل رجل عظيم .. الراجل اللي واقف ورا عمر  
سليمان

● واحدة كتبت: أنا عايزة أبقى المرأة اللي وقفت ورا  
الراجل اللي واقف ورا عمر سليمان

● محمد سعد يؤكد أن فيلمه القادم سيكون بعنوان  
اللمي اللي واقف ورا عمر سليمان

● اختر مما بين الأقواس .. في الوش مرايا وفي  
القفا.....( فلاية - سلاية - هدايا - الراجل اللي  
واقف ورا عمر سليمان)

● زاهي حواس يتقدم بطلب لضم الراجل اللي واقف ورا  
عمر سليمان للمتحف المصري باعتباره من الآثار

● دول عربية تطلب الاستعانة بالراجل اللي واقف ورا  
عمر سليمان لإلقاء بياناتها ضد الثوار

● مواصفات العريس المطلوب :ميسور الحال - يحترم المرأة - يشبه الراجل اللي واقف ورا عمر سليمان

ولأن الإفيه يحكم، ولأن الشعب المصري هو الشعب المصري فقد تطور الأمر إلى قصائد شعر تهكمية في الرجل، إضافة إلى أغنية تم تسجيلها بموسيقى وألحان أحد الشباب بلسان شاب كان الجميع يريدون تحديد مستقبله لكنه تحداهم وقال لهم أنا نفسي أطلع الراجل اللي واقف ورا عمر سليمان!!

بل أن أحدهم صنع له بيانات شخصية قال فيها

الإسم : الراجل اللي واقف ورا عمر سليمان

الوظيفة: الراجل اللي واقف ورا عمر سليمان

محل الإقامة : ورا عمر سليمان!!

أصبح الرجل شخصية مثيرة للضحك والتهكم، وأصبح الجميع يتفننون في إلقاء النكات والإفيهات عليه، لكن فجأة تبدل الموقف حين ظهر جروب قال أحدهم أنه منسوب لابن الراجل اللي واقف ورا عمر سليمان، وقال أنه يعيش في حالة نفسية سيئة، وأنه مقدم أركان حرب في مجموعة القتال الخاصة بالقوات المسلحة، وهكذا وجدنا - دون تأكد من صحة هذا الكلام - جروبات كثيرة تعتذر للرجل وتقول له "كنا بنهزر

معاك"، ونشر أكثر من جروب صورة للرجل، وتمادى أحدهم بمنتهى السذاجة لينشر معلومات خاطئة مضللة مفادها أن الرجل مبعوث خاص لأحد قيادات البلد ليضرب عمر سليمان بالنار في حال غير البيان!!

ولأن الموضوع مثير للسخرية فلم يصدقه أحد في البداية لولا أن نشرته بعض الصحف الورقية والإلكترونية ليتحول إلى ما يشبه الحقيقة، لكن الحقيقة أن صورة الرجل بالزي العسكري التي وضعوها لم تكن صورته، بل صورة أحد شهداء القوات المسلحة وهو ما يمكن التأكد منه بكتابة اسم الشهيد محمد عبد الوهاب كريدي على محرك البحث الشهير جوجل؛ ليتأكد الناس من الفبركة التي وقع فيها الكثيرون، وليعمقوا أسطورة الرجل الغامض، والمعروف باسم واحد فقط

الراجل اللي واقف ورا عمر سليمان

ملحوظة مهمة جداً: عدد النتائج التي تظهر على محرك البحث جوجل الشهير لكلمة الراجل اللي واقف ورا عمر سليمان تعدت ٦٠ ألفاً وقت كتابة هذه السطور

ملحوظة أكثر أهمية : لأن الشعب المصري هو الشعب المصري وليس شعباً آخر فقد أنشأ بعضهم صفحة على الفيس بوك بعنوان "الشجرا الخضرا اللي جنب العلم اللي ورا عمر سليمان"!!

ملحوظة أكثر أهمية من الاتنين اللي فاتوا: بعض الناس  
قابلت فعلاً الراجل اللي واقف ورا عمر سليمان ، وقال لهم أنه  
سعيد بشهرته، وأنه يحترم ويحب خفة دم الشعب المصري،  
وطلب بعضهم التقاط صورة معه لكنهم حسبما جاء في  
صورهم معه والتي انتشرت على الفيس بوك لم يقفوا  
جانبه..وقفوا وراه

# خطة العبط الإستراتيجي

كيف تخدع الشعب بمنتهى العبط دون معلم؟

تولى منصب وزير الإعلام في مصر في عهد مبارك ثلاثة وزراء.

الأول هو صفوت الشريف، والذي ورد اسمه ضمن المتهمين في قضية انحراف جهاز المخابرات التي انفجرت بعد نكسة ١٩٦٧...، والذي أظهر التحقيق الذي تم نشره في أكثر من موقع إلكتروني أنه كان يستغل الفنانة في أعمال منافية للآداب من أجل الوطن!! بعد تصويرهن في أوضاع مخلة في حياتهن الخاصة من أجل تجنيدهن، ثم استغلالهن في القيام بأعمال منافية للآداب للحصول على معلومات من مصادر ومسؤولين عرب وأجانب وشخصيات عامة.

كان صفوت الشريف إذن يعمل بمبدأ القوادين لكنه قواد شريف يعمل تحت رسمى ويحمل رخصة بذلك ويستأذن قبل أن يقوم بمثل هذه العمليات من رؤسائه الذين يسمحون له بذلك من أجل الوطن.. يعني من أجل مصر!!!

شغل صفوت الشريف إذن منصب وزير الإعلام لأكثر عدد

من السنوات في عصر مبارك، ثم جاء بعده رجل محترم اسمه  
ممدوح البلتاجي كان يشغل قبلها منصب وزير السياحة!!!!

والغريب في الأمر أن هذا الرجل الذي بدأ بكنس أتباع  
صفوت الشريف - الذي واصل عمله الرسمي كرئيس لمجلس  
الشورى - تم الاستغناء عنه بعد شهر قليلة، مما يثبت أن  
صفوت الشريف كان قوياً للدرجة التي تجعله يزيع من يليه من  
منصبه الذي تركه، وكأنه يتحكم في الرجل الذي سيجلس من  
بعده على كرسيه.

لكن الأغرب هو أن يتولى السيد أنس الفقي منصب وزير  
الإعلام، فالرجل الذي كان يشغل منصب رئيس الهيئة العامة  
لقصور الثقافة كان في الأساس راقصاً في فرقة رضا للفنون  
الشعبية، وها قد أصبح وزيراً للإعلام في الحكومة التابعة  
للحزب الوطني الديمقراطي الذي أعطى الكلمة العليا واليد  
الطولى للمهندس أحمد عز والذي كان بدوره عازفاً للدرامز في  
العديد من الفرق .

يالها إذن من مصادفة تاريخية من ينظر لها وحدها يجدها  
سبباً كافياً لكراهية مبارك ونظامه الفاسد. قواد من أجل الوطن  
وراقص فنون شعبية يحركان الإعلام المصري على أنغام عازف  
الدرامز ومحتكر الحديد في ظل حكومة من المتفعين والمستفيدين

ورجال الأعمال الحرامية الذين استغلوا مناصبهم لتحقيق أرباح مادية، أو لمجاملة أصدقائهم وأقربائهم على حساب الناس الغلابة؛ لتجاوز ديون مصر مبلغ التريليون جنيه، بينما هم يسبحون في ملياراتهم.

هؤلاء الذين حكموا مصر، ولعبوا في دماغ الناس البسطاء من مشاهدي القناة الأولى والفضائية المصرية، والذين قاموا بأغبي عملية خداع استراتيجي في التاريخ؛ ليخدعوا شعباً بأكمله على مدى ثلاثين عاماً بحجة ظروف، الوطن ومحاربة الخونة والعملاء.

بدا التلفزيون المصري مع بداية الثورة كأقصر ما يكون وهو يذيع برامج بمنتهى البساطة دون إذاعة خبر محترم مصاغ بطريقة مهنية حقيقية عن المظاهرات، ومع تصاعد الأحداث لم تكن للتلفزيون المصري كاميرا في ميدان التحرير الذي شهد أسخن الأحداث، واستسهل التلفزيون أن ينقل صورة من تحت ميناء مؤكداً للجميع أنها ميدان التحرير "بس احنا مش واخذين بالنأ".

كان الهم الأول للتلفزيون هو الإيحاء بأن كل شيء تمام، وأنه لا يوجد ما يمكن أن يقلق منه أحد، وأن قناة الجزيرة الوحشة العميلة الحقيرة الكنخة بنت البوبي تختلق الأخبار

وتعرض صوراً مزيفة، ولم يتعرض التلفزيون المصري للقنوات الأخرى مثل الي بي سي والسي إن إن والعربية و الحرة وفرانس ٢٤ والتي نقلت جميعها ما يحدث من مهازل مثلها مثل الجزيرة، لكنه غباء صناعة الأعداء الوهميين، والرغبة المريضة في اللعب بعقول ومشاعر الناس.

ومع مرور الوقت أصبح الخطاب الإعلامي في التلفزيون المصري يتركز حول المخربين في ميدان التحرير، وما يفعلوه الوطن من تدمير لخدمة مصالح أعداء هذا البلد، ثم ابتز التلفزيون المصري العديد من الشخصيات العامة للحديث عما يحدث، وسب المتظاهرين، واتهامهم بالعمالة، والانتماء لأجهزة مخبرات تنتمي لدول معادية مثل إيران، ولعب عدد من هذه الشخصيات دوراً أكثر حقارة ودناءة حين خرجوا ليسبوا المتظاهرين لتقول الفنانة سماح أنور أن المتظاهرين في التحرير عايزين الحرق، ويؤكد إبراهيم حسن أشهر رياضي متجاوز في مصر أنه يجب قطع الأكل والشرب والدواء عن الموجودين في ميدان التحرير حتى يرفعوا الراية البيضاء، ويقول الفنان طلعتزكريا أن الموجودين في التحرير يمارسون الرذيلة ويشربون الخمر، وتتوالى البذاءات، ومحاولات ملاحقة الأخبار التي تناقلها تلفزيونات العالم، مع المحاولات المستميتة لخلق رأي



عام يجعل الناس ترى أن أي رد فعل عالمي هو تدخل في الشأن المصري والسيادة المصرية، ويهول من الأحداث الموجودة في المناطق الشعبية، ويؤكد على أن الفوضى عمت الشوارع بسبب (العيال بتوع التحرير).

ثم تطور الخطاب الإعلامي لصورة أكثر حقارة تناست المهنية وشدت السيفون على الضمير الإعلامي ليستضيف التلفزيون المصري مجموعة من الشباب الذين زعم أنهم ينتمون لشباب التحرير وأنهم انشقوا عنهم بعد أن وجدوا أنهم عملاء، وأن هناك عناصر خارجية تحركهم، وتمادى أحدهم في خياله المريض ليؤكد أنه رأى بنفسه استمارات توزع على الآلاف في ميدان التحرير يقبضون بها أموالاً من ناس مشبهين

لكن النكته التي لا ينساها أحد كانت حين أكد بعض النومين مغناطيسياً من التلفزيون المصري وكومبارسات العرض المسرحي الرخيص الذي قدمه أنس الفقي وأعوانه أن المتظاهرين يتقاضون حق تظاهرهم ممثلاً في وجبات كنتاكي يتم توزيعها على الناس في الوقت الذي كانت جميع فروع محلات كنتاكي، وغيرها من محلات الوجبات السريعة مغلقة بسبب الأحداث، كما اتصل أحدهم ليكشف عن المؤامرة الدنيئة لشباب التحرير الذين يرمون بقنابل " البلوتوث " على المؤيدين

لمبارك، ولم يكن غريباً أن هذا الشخص عرف نفسه بأنه صاحب محل موبايلات.

المشكلة أن التلفزيون المصري حين قام بهذا الأداء الإعلامي الركيك والمبتذل في غسيل مخ الناس لم يلعب الموضوع بالطريقة الصحيحة، ولم يقدم نجاحاً حتى في فشله، فقد قام بالتضليل على الطريقة القديمة، وبنفس الأساليب الستينية الشهيرة. يعني فشل حتى في الفشل!!

خذ عندك مثلاً ما لفت نظر الجميع في المكالمات الكثيرة التي تم استقبالها بمنتهى السهولة في التلفزيون، والتي استغلها في إثارة الرعب عند الناس من فكرة رحيل مبارك، وهي في الغالب لا تبدأ بكلمة (ألو) وإنما بصراخ من عينة الصراخ الذي لا يستقيم أن تسمعه إلا في مستشفيات الولادة؛ ليؤكد المتصل أن مبارك هو كل شيء، وأن رحيله سيقرب البلاد إلى فوضى، وأن البلطجية تحت البيوت سيثرون الشغب، ويدخلون ليدبحونهم في البيوت، مع وابل من الدعوات والشتائم في المتظاهرين والمطالبين بالتغيير.

شخصياً كان أكثر ما استفزني فزلكة عدد من المذيعين المغمورين في تحليل الأمور وتوجيه رسائل للمتظاهرين للانسحاب، ومحاولة تشكيك الناس فيهم عبر الرسائل المتكررة

بأن مطالبهم تم تحقيقها، وأنه لا داعي لأن يكملوا اعتصاماتهم، وكانت مهزلة كبيرة حين نقل التلفزيون المصري صورة منطقة ماسبيرو وقال عنها المذيع محمد المغربي أنها صورة ميدان التحرير ولا كأننا سائحين لا نعرف الفرق بينهما، لمجرد أن يرد على قناة الجزيرة وهو يردد بين الحين والآخر بمنتهى الكذب والتضليل أن الصورة تعني عن ألف كلمة، وأن هذا هو ميدان التحرير يبدو فيه كل شيء على ما يرام!!!

المشكلة الأكبر للتلفزيون المصري في خطة غباؤه الاستراتيجية التي اتبعها أنه بعد نجاح الثورة لم يعد لدى الناس أي ذرة ثقة في أي شيء يقال من خلاله، فقد كانت لديه الفرصة لإثبات أنه تلفزيون الناس والشعب وليس تلفزيون فئة بعينها أو بالأحرى أسرة بعينها هي أسرة الرئيس السابق، لكنه فقد احترام الناس له بعد عملية غسيل المخ التي قادها والتي تورطت فيها جميع قياداته بلا استثناء في منتهى التواطؤ ليعيد إلى الذهان صورة الإعلام المصري المهترئة بعد نكسة ١٩٦٧ والتي احتاج بعدها إلى سنوات ليتعافى من آثار خيابته وكذبه وتضليله، ويكفي التلفزيون المصري الآن مهانة وانحداراً في المهنية أن تولاه أشخاص مثل صفوت الشريف، والراقص أنس الفقي. كما يكفي أنه لم يقم بدوره في إعلام وإخبار وتعليم الناس.. بل قام الناس بالتعليم عليه.. وللأبد.

## دليل الحاكم الغبي

في الواقع لا شيء يثبت أن الثورة في أي مكان قد نجحت إلا الحكام أنفسهم. هم الذين يتغابون، وهم الذين يقومون بردود أفعال تعطي إشارات بنجاح الثورات، ثم أنهم هم الذين يتنحون أو يتنازلون، وفي النهاية.. يهربون.

قام أغلب الرؤساء العرب وأعوانهم من أجهزة الأمن التي تحميهم بأغبي الخطوات لمواجهة مظاهرات شعوبهم التي سرعان ما تحولت مع هذا الغباء من مظاهرات محدودة الأعداد إلى ثورة شاملة دمرتهم وحطمتهم تماماً.

فعلوا ذلك بنفس الترتيب، وبنفس الخطوات، ولا كأنهم يتعلمون من بعضهم البعض، ولا كأنهم يملكون عقولاً أو أنظمة حقيقية قادرة على إدارة أزماتها أو احتواء شعوبها بدلاً من دفع هذا الشعوب إلى الانفجار، ولذلك يجب أن تستبشر خيراً رغم قسوة المواجهات ، فهناك مؤشرات لنجاح ثورتك

● إذا اعتبر النظام وأعوانه أن المعارضين هم قلة منحرفة مندسة، بينما باقي الشعب (فلة شمعة منورة)، وغير راضين عن الفوضى التي يريد المتظاهرين إشاعتها ( منتهى إثارة الفوضى هو أن تقول هذا الكلام وكأنك تدعو لحرب أهلية

وصدمات بين أبناء الوطن الواحد).

● إذا أكد النظام وأعوانه أن المتظاهرين دائماً من أصحاب الأجندات الخارجية .

● إذا اعتبر النظام أن أي نقد هو تجاوز، وأي شكوى هي إثارة للشغب، وأي وقفة سلمية هي تعطيل للمرور) سلمولي على موكب سيادته وموكب فخامته)، وأي مطالبة بالحقوق قلة أدب.

● إذا أسند الأمر لغير أهله ( يعني خريج تجارة يبقى وزير خارجية"أحمد أبو الغيط"، ومحاسب في بنك يبقى أمين لجنة سياسات"جمال مبارك")، وللبلهاء وذوي الاحتياجات السياسية الخاصة ممن معهم شهادة معاملة أطفال (ما تعلىش..تقريباً الحزب الوطني على بعضه)...، ولازلت أذكر تصريحات رسمية لأحد المسؤولين أكدت أن مواطنين أشعلوا النار في أنفسهم أمام مجلس الشعب لم يكونوا ينوون الانتحار ( آمال بيتدفوا يا روح خالتك)

● إذا لم يقدم الإعلام الرسمي أي إشارة إلى الثورة والمظاهرات والاحتجاجات اعتبرها. وكأنها لم تحدث على الإطلاق، بحيث يواصل التليفزيون تقديم برامج الطبخ والصحة

والجمال في الوقت الذي يسمع الناس في بيوتهم أصوات الرصاص وهتافات المتظاهرين ويشمون رائحة الغازات المسيلة للدموع، وتواصل الصحف تغطيتها للثورات والكوارث في دول العالم الأخرى ( الأهرام بجمالة قدزها كتبت مانشيت عن المظاهرات..في لبنان!!!)

● إذا واجه الأمن المتظاهرين بالضرب والقنابل المسيلة للدموع، مع الاستخدام المفرط في القوة، وضرب الرصاص المطاطي.. هذه علامة خير. هذا النظام بوليسي وغي ويظن أن الرصاص لازال يخيف الناس، بينما أثبتت الثورة في تونس ومصر والأحداث في ليبيا والبحرين واليمن أن الرصاص الذي يطلق إنما يطلقه الحكام على أنفسهم لأن كل شهيد يقع، وكل مواطن يقتل يوجب من اشتعال الثورة، ويساعدها على الاستمرار إن لم يكن من أجل التخلص من الذل والفساد فعلى الأقل من أجل الانتقام لمقتل العزل ( عدد شهداء مصر الذين قتلهم الشرطة في عصر مبارك وحده أكثر من عدد شهدائها في حروبها مع إسرائيل)

● إذا اتخذ النظام قرارات غبية تهدف لتعطيل الاتصالات سواء من خلال أجهزة المحمول ( فين أيام الإشارات) أو خدمة الإنترنت(نظم الناس أنفسهم في يوم جمعة الغضب دون حاجة

إلى أي وسيلة اتصال)...، والغريب أن هذا ما يحدث (بجذافيره) وربما بنفس الترتيب في بلادنا العربية التي استيقظت شعوبها من سباتها العميق

● إذا دعا المسئولون إلى الحوار.. في الغالب هي دليل على أن النظام مرتبك، فهو لم يدع لحوار حقيقي طيلة حياته، ودعوته الآن تؤكد أنه الطرف الأضعف الذي يريد هدنة لالتقاط الأنفاس لكي يعيد تنظيم صفوفه وينتقم، والأفضل حينئذ هو عدم الجلوس إلى أي مائدة حوار أو مفاوضات لأن ذلك يجهض جهود الآخرين ويؤجل تحقيق مطالب الثورة.

● إذا رقص النظام رقصة الاسترbitz السياسي. في البدء يقول أن المتظاهرين عملاء وتحركهم أجنادات ودول ويسمعون الفضائيات العميلة ( أول ما يقول كده اعرف انهم قصدهم على الجزيرة)، ثم يقول أن المتظاهرين مخربين، ثم يقبل الحكومة) هما ولاد اللذين دول السبب اني مافهمتكوش..هما اللي وقعوا ما بينا منهم لله)، ثم يبحث عن شخصية يظن ( وبعض الظن إثم) أنها مقبولة ليعينها بجانبه ( يمكن يتبطو شوية لما يلاقو حد تاني واقف جنبي)، ثم يعلن رئيسه أنه زاهد في الحكم (كفاية عليا ٣٠ سنة.. كده رضا)، ثم يعلن عدم ترشحه لفترة جديدة (عشان تعرفوا قيمتي يا بني آدمين)، ثم يعلن أن أبناءه لن

يترشحوا ( الولاد خدوا اللي هما عاوزينه واكتفوا)، ثم يعدل الدستور الذي طالما طالبه الناس بتعديله ولم يستجب (معلش اصلي كنت بيربش ساعتها)، ثم يخرج في خطابات مضحكة تثير الضحك أحياناً والغثيان في أحيان أخرى (أووووع)، ثم يبدأ في دعوتهم للتفاوض (تعالى لحمو يا ولا .. والا انت ما بتجيش غير بالشاكاليتة!!)، ثم يستخدم الخطاب العاطفي (ده انا قد جدكم..ده انا بتاع الماضي كله..ده انا بابا يالا)، ثم يبعث برجاله لتهديد الناس وترويعهم (خلي البلطجية بتوعي يعلموهم الأدب)، ثم يدرك أخيراً أنه يجب أن يرحل (بس همشي يوم الجمعة عشان يكون أجازة وماحدش ياخذ باله)، وهكذا يظل يخلع في ملابسه السياسية حتى تظهر سوءته فيخرج من اللجنة ويتزل - غالباً - إلى شرم.



# مصر ترفع الشعار

٥٠ شعاراً من ميدان التحرير

"حان الآن وقت التنحي حسب التوقيت المحلي لجمهورية مصر العربية، وعلى الحكام المقيمين خارجها عدم مراعاة فروق التوقيت"

هكذا تخيلت في أحد الأيام شعاراً يمكن أن يرفعه الناس في كل أرجاء مصر. كان حتماً لم أصدق أنه يمكن تحقيقه، وظلت الجملة تراودني لأكتبها في رواية أو مقال أو على استيتوس في فيس بوك، لكن الشعارات الأكثر براعة، والأشد إيلاماً، والأعمق تأثيراً كانت تلك التي حملتها مصر أثناء ثورة ٢٥ يناير التي لم تتوقف عند تنحي الرئيس مبارك وتنازله عن سلطاته، بل امتدت خلال الأيام التي تلت التنحي كنوع من الفرحة أحياناً، والتشفي في أحيان أخرى.

مصر التي رفعت شعارات تنادي بالحرية والعدالة ذهبت بعيداً بشعاراتها المبدعة المتألقة التي أثبتت أن الشعب المصري ليس فقط خفيف الظل، بل أنه أكثر شغوب العالم في عبقرية التعبير عن رأيه بلافتات شاهدها العالم كله.

ومع كل يوم يمر من الثورة، كان الشعب ينفذ حكم الإعدام البطيء النافذ في نظام مبارك بهذه اللافتات بمنتهى خفة الدم التي جعلت قنوات إخبارية عالمية مثل البي بي سي و السي إن إن تفرد تقاريراً مطوّلة للحديث عن هذه اللافتات.

فإذا كنت ممن لم يسعدكم الحظ للوصول إلى ميدان التحرير، فهذه أشهر اللافتات التي رفعتها مصر.

● مبارك.. طير انت ( سلامات لعمر طاهر اللي كتب

الفيلم)

● إرحل بقى.. إيدي وجعتني

● أنا دكتور سنان..، وجاي اخلع مبارك

● اللهم ارفع عنا الغلاء والبلاء.. و ابو علاء

● إرحل بقى.. عايزة استحمي

● انصرف.. أعوذ بالله من الشيطان الرجيم

● إرحل بقى عايز احلق

● أهم إنجازات الثورة المصرية : إقالة الحكومة الأردنية -

رفع قانون الطوارئ في الجزائر - إعلان الرئيس اليمني عدم

ترشحه - قمع الشعب السوري قبل أن يفكر في الثورة -

تعهد الرئيس العراقي بعدم ترشحه.. عقبال ما تفهم يا بعيد

● إذا الشعب يوماً أراد الحياة، فلا بد أن يستجيب  
(البقر).

● ارحل بقى مراتي وحشتني.. (متزوج من ٢٠ يوم  
فقط)

● الصعايدة يجولولك : لع.

● جمعة الرحيل ، سبت الغضب ، أحد الزعل ، إثنين  
القهر ، ثلاثاء الطفش ، .... يخرب بيتك إرحل بأه

● أونكل حسني ممكن حضرتك تخلصنا بأه و ترحل  
علشان بابا يغير الجزيرة و يفرجني على كارتون.. توقيع: طفلة  
مصرية

● رسالة من تلميذ مصري : إلى أعزائي المتظاهرين في  
ميدان التحرير .. بخصوص الثورة اللي شغالة عندكم ...  
ماتنسوش أنها حتدخل في مادة التاريخ و إحنا اللي بنحفظ ا ..  
فاختصروا من فضلكم.

● أفلام مبارك تقدم .. فيلم (إحمي بيتك)..بطولة حبيب  
العادلي والبلطجية.

● زهقت من كتناكي..عاوز لحمه

- القراءة للجميع..والظلم ع الجميع
- الصعايدة قالوها .. ارحل احسن انت عارف
- كتتاكي مغلقة يا غبي
- عفواً يا ريس.. لقد نفذ رصيدكم
- لو كان عفريت كان انصرف
- خلع الضرس ٢٥ جنيه..خلع مبارك ٢٥ يناير
- ارحل بقى عشان عندي حضانة
- عنواني ميدان التحرير..انت عنوانك إيه
- نبأ عاجل : مبارك يحاول إحراق نفسه أمام مجلس الشعب مطالباً بتغيير الشعب
- حتى لو طلقت سوزان..مش هنرحل م الميدان
- المنوفية تعتذر للشعب المصري ( المنوفية هي محل ميلاد مبارك)
- ارحل بقى.. الولية عايزة تولد والواد مش عاوز يشوفك
- انجز يا عم ورانا ثانوية عامة

● لو مش عاوز جدة.. فيه الرياض .. فيه الدمام.. أقول

لك: روح الصين

● مبارك يتحدى الملل

● لو كان هو دكتوراة في العناد.. احنا معانا نوبل في

الصبر

● ارحل بقى عايز ادخل الحمام

● انت فين يا بن علي.. حسني بيدور عليك

● مبارك.. تاريخ انتهاء الصلاحية ٢٥ يناير

● للبيع.. رئيس سابق.. استعمال ٣٠ سنة، أو للبدل

بجلاط.. الوسطاء مفيش مشكلة بس نخلص

● اضحك.. الثورة تطلع حلوة

● ثورة سباع مش ثورة جياع

● يا بارد.. يا بخت من زار وخفف

● انجز وارحل.. ماصدقنا الزمالك هياخد الدوري

● رابطة نجاري مصر تستفسر من مبارك.. ما نوع الغراء

الذي تستخدمه؟

● يا عمر سليمان .. أجندتك حمرا

● يا عمر سليمان .. أنا بطلت الأجندة .. وجبت  
كشكول سلك

● الشعب + حرية - ١ = حياة مستقرة

● يا مبارك صبح النوم.. النهاردة آخر يوم

● البلد بلد ابونا والفاستدين عاوزين يطردونا

● أغداً ألقاك؟؟.. لا طبعاً .. مش عاوز اشوفك تاني

● باي يا مبارك.. موبايلات بقى

● انت رحت فين يا ريس.. احنا كنا بنهزر معاك

● إلى الرئيس المخلوع.. دي كانت الكاميرا الخفية .. نذيع

والا لأ

بكرة هتخرج مذلول باكي... واحنا هنا كل الكنتاكي

## هوامش على دفتر الثورة

قبل الثورة كنت أحد الذين سخرُوا منها وظنوها مثل غيرها من المظاهرات العادية لكن على نطاق واسع قليلاً، وستنتهي مثلما تنتهي كل مرة بضرب الناس وعودتهم لبيوتهم...، ومع ذلك وجدت نفسي أنزل للشارع وأدهس سخريتي على الأرض لأشارك فيها، ووجدتني أكتب ملاحظات على استيتوس الفيس بوك أحب أن تقرؤها.

صحيح أنها غير مرتبة.. لكنها من القلب، وسأتركها لأولادي حتى يعرفوا موقف والدهم آنذاك

● لكل الناس الفاسدين وأعوان النظام السابق ولحاسين جزم مبارك من السياسيين والصحفيين وأساتذة الجامعات والمثقفين النص لبة والرياضيين وعديمي الضمائر والفنانين المخنثين وقاذفي الناس في التحرير بالباطل.. لقد وجدنا ما وعدنا ربنا حقاً حين قال عز وجل "إن الله لا يغير ما بقوم حتى يغيروا ما بأنفسهم"، فهل وجدتم ما وعدكم الرئيس وأعوانه حقاً. اذهبوا غير مأسوف عليكم.

● أثناء السلب والنهب الذي حدث عرفت أن مكتبة ديوان في الاسكندرية تعرضت لسرقة الكمبيوترات والأجهزة الإلكترونية، بينما ترك الحرامية الكتب..للأسف لم أكن معهم 😊

● لم يكن للثورة المصرية أن تنجح لولا توجيهات سيادة الرئيس مبارك

● ردود أفعال النظام السابق المتأخرة جداً بالنسبة لما حدث في ٢٥ يناير يثبت أن النظام كان عبارة عن سلحفاة معاقة ذهنياً وعندها شلل أطفال، فهي بطيئة في الفهم، بطيئة في التحرك. بطيئة في الاستجابة

● نحن في زمن الفتن..، والذين لوثوا سمعة كنتاكي قادرين على الطعن في شرف ماكدونالدز وبيرجر كينج، وليس بعيداً أن تصل مخططاتهم الدنيئة لكشري أبو طارق..ارحمنا يا رب

● زعلت جداً ان الناس في التحرير ضربت تامر حسني بس. ده كان المفروض يلسوعوله طيبسيبسيبسيب قلبه، ويخلوها تاكله عشان بابا حسني يطبطب عليها، وبعدين اللي في التحرير يا نجم الجليل ماينفعش تسبلهم عنيك وتتنحج وتكشف عن شعر صدرك فيصدقوك .. اللي في التحرير عندهم جهاز



كشفت رجولة... وانت سقطت في الاختبار.

● المشكلة ليست في الهجمة لكن في الهجمة المرتدة.  
مبارك سقط للأبد لكن الموضوع أكبر من مبارك الآن. ما فساد، والسماسرة، وتجار السلاح، وضباط الشرطة المرتشون من تجار المخدرات، والبلطجية، ورجال الأعمال الحرامية، وراكي الموجة الذين انكشفوا، ونصابي أراضي الدولة، ومصاصي دماء الشعب، والوسطاء، والصحفيون المرتزقة، ودعاة السطان، ومضحكي الملك، وفنانين الوكسة والندامة، ولاعي الكرة مع أبناء مبارك في الصالة المغطاة. كل هؤلاء سيحاولون الانتقام

● كان فيه ولد اسمه محمد. لما مات مصر كلها حزنت عليه وتعاطفت مع أبوه، وعزوا جده اللي ذالهم وظالمهم. محمد علاء مبارك الله يرحمه.. لماذا لم يضع الرئيس مبارك وعائلته وأتباعه والمطالبين ببقائه في أذهانهم أن ٤٠٠ شاب من خيرة شباب مصر قتلوا بسبب مبارك، وأنهم في الأساس عند أهاليهم مثل محمد علاء مبارك عند باباه ومامته وجدو وتيته وعمو. دم ولادنا غالي يا ريس لا تكفيه انت ولا عيلتك.

● واحب أقول لكل من يسأل عن مصدر ثروة مبارك

وبعد بحث شديد وسؤال مصادر موثوقة تبين أنها أرباح مكتبة الأسرة.

● واللي بيقول ان دول مش كل المصريين يتزل يشوف الناس اللي على الحق. مسلمين ومسيحيين. سلام ومعاقين وصم وبكم وأقزام. ولاد وبنات. ليبرالين ومتزمتين وإخوان وسلفيين وطلبة جامعات خاصة وطلبة إعدادي حكومي وناس هاي كلاس وناس تحت خط الفقر. كل دول مصريين، وكل دول يجبوا مصر، ويكرهوا الظلم وعمرهم. ما هيطاطوا لحد تاني أبداً

● وقال لك ان عمر سليمان هيصدر تعليماته بإيقاف حملات التخوين والعمالة في التلفزيون المصري. طب سعادتك هو مين اللي اداهم الأمر يعملوها..، ويا ترى كلفتكم كام وجبة كنتاكي انتو كمان

● فضلت تصرخ في التلفزيون : لااااااااااا.. بنحك يا ربييس.. ماتسيناااااااااا.. لااااااااااا.. آاااااا.. آاااااا.. آاااااا، وبعدين الحمد لله. ربنا نتعها بالسلامة .. وولدت..، ومن هنا نتعلم أن الولادة في الثورات لا تتم في المستشفيات بل على القناة الأولى وقناة المحور

● كل شوية شباب التحرير بيحققوا مكاسب.. كل

شوية حاجات بتتغير عشان موقفهم اللي ناس كتيرة بتهاجمه  
وبتشوههم.. كل شوية هما بيكبروا وناس.. كثير بيصغروا..،  
والمشكلة اللي الناس مش واخدة بالها منها انهم اختصروا  
الموضوع في شباب موجودين في ميدان ولم يسألوا أنفسهم :  
ألا يعد فشلاً أن تتوقف بلد من أجل شباب موجودين في  
ميدان.. أليس هذا دليلاً على فشل سياسات ٣٠ سنة.

● واحد في التليفزيون دلوقت يقول لك ان الأمير بتاع  
جماعة الإخوان المسلمين اللي كان في اللجان الشعبية اللي  
بتحمي ميدان التحرير ماكانش عاوزني أخرج وكان فيه  
استمارات بتمضي للانضمام.. يا جدعان الأمير ده في  
الجماعات الإسلامية بتاعة زمان مش في الإخوان المسلمين  
بتوع دلوقت.. والكذب مالوش رجلين يا جدعان إن كذبت  
اكذب صح الله يكرمك عشان نصدق

● واحدة طلعت تشتم في المتظاهرين مع عمرو أديب  
وتقول ان عيالها أربع سنين ونص وخمس سنين ما بيتزلوش.. يا  
فندم.. بمنتهى الاحترام والله.. حضرتك خلفتي كل بعد ٥ اشهر  
ازاي.. دي ما حصلتش على أيامنا

● اللعبة دلوقت بقت حرب نفسية مع حرب  
الشوارع. الشائعات تنتقل من مكان إلى مكان عبر عناصر

أمنية. في مترو الأنفاق مخبرين متوزعين في كل مكان. الشرطة  
مختلفة لسة ومالهش أثر حقيقي رغم تأكيدات وزير الداخلية  
الجديد انه مش راجع بيتهم الا لما يحقق الأمن. رجال الأعمال  
وأصحاب المصالح يدافعون الآن عن بقائهم والناس صدقت  
التليفزيون المصري. اللي خلى بتوع الفيس بوك صدقوا  
وبيشتموا اللي نزل.. الناس دي تستحق الحاكم ده والفساد  
ده.. يا خسارة

● إحنا نصلي استخارة. لو حلمنا بميدان التحرير يبقى  
احنا مكملين، ولو حلمنا بحسني مبارك يبقى نتوضى ونصلي  
استخارة من جديد عشان غالباً وضوءنا كان فاسد

● عمر ابني بيقوللي هو ينفع بعد ما حسني مبارك يخلص  
ألعب وي..، وهكذا فهم عمر أن العائق الوحيد أمامه للعب  
هو مبارك، وادي العيل الصغير اللي عنده خمس سنين كرهك  
.. ارحل بقى بكرامتك فلقتنا

● كل التقدير للفريق طيار حسني مبارك بطل الضربة  
الجوية في حرب أكتوبر ١٩٧٣، وكل الأسى والأسف  
والرفض لما فعله بنا الرئيس مبارك الذي وصل بنا لهذا الوضع  
من الفساد والنهب لهذا البلد. مصر خلاص صحيت م النوم،  
ومش هتنام تاني.. أبداً

# آخر كلام

كانت هذه هي أشهر رسالة انتشرت بعد تنحي مبارك

وربما كان فيها فصل الخطاب

وآخر كلام يمكن أن أكتبه في هذا الكتاب

" من النهارده دي بلدك إنت، ما ترميش زبالة، ما تكسرش  
إشارة، ما تدفعش رشوة، ما تزورش ورقة، اشتكي أي جهة  
تقصر في شغلها، ما تمشيش عكسي، ما تدخلش من باب  
الخروج في المترو، ما تعاكسش البنات، ما تقولش وأنا مالي..

وراعي ربنا"

تحيا مصر

# الفهرس

٥	إهداء
٧	ملحوظة
١١	مفتح
١٥	شكراً
١٧	يوميات الثورة
٣٥	كان فيه مرة ثورة (حدوته كومبو لعمر وتقى)
١٥٣	الشعب .. يريد.. إسقاط النظام (أشهر ١٠٠ هتاف في ثورة ٢٥ يناير)
١٦٦	عمر سليمان ورأفت الهجان !!

- ١٧٠ أسطورة"الراجل اللي واقف ورا عمر سليمان"
- ١٨١ خطة العبط الإستراتيجي كيف تخدع الشعب  
بمنتهى العبط دون معلم ؟
- ١٨٨ دليل الحاكم الفبي
- ١٩٣ مصر ترفع الشعار"٥٠ شعاراً من ميدان التحرير"
- ١٩٩ بكرة هتخرج مذلول باكي..واحنا هناكل  
الكتناكي "هوامش على دفتر الثورة"
- ٢٠٥ آخر كلام



**ادعيلهم**  
واكتب لهم كلمة



LE 15.00